


BWALU BULONDA

BWÀ NSÒMBELU WANYÌ

 Twinyikaayi mitu yetu katanci kakese bwa disambila.

Taatu wetu wa mu Dyulu wa ngâsà, mbya dyèsè bushuwa mutudi bapete mushindu wa kuseemena kûdi Wêwè, Nzambi ne Musungidi wetu. Biikale tuumvwa musambu ewu udi ukemesha wa ne: *Wêwè Udi Munène's Wè*, bidi bitwenza luzakalu mu mubidi bwalu tudi bamanye ne Wêwè udi munene. Nenku tudi tulomba ne bunene Bwebe bumweneshiibwe cyakabidi kutudi, mu mapingaja emu, patudi twakula apa. Nenku nshoobo nyeyi yânkwâci mêmè, bwa musangu wa kumpala kukaadi bidimu byâbûngì, wa kuteeta bwa kwalukila mu matuku akaadi mapite a nsòmbelu, ne ndi ndomba bwa Wêwè kumpa dikanda ne—ne bîndi naabi dijinga, Mukalenge, bwa kwikala pa dîbà edi. Nenku enzaku bwa bilema byanyi byônsò bya mu nsòmbelu biikale bwa bakwabo anu bu lubwebwe lwa kutupikila, ludi lufwanyine kubafikisha pabwîpi Neebe menemene. Twenzeleku nanku, Mukalenge. Enzaku bwa bangenzâmpèkââtù bamone bidyacilu bya makàsà pa lusenga lwa bikondo, bwa baamona mwa kulombodiibwa too ne kûdi Wêwè. Bintu ebi tudi tubilomba mu Dînà dya Mukalenge Yesu. Amen.

Nudi mwa kusòmbaayi.

² [Mwaneetu Glover udi wamba ne: “Udiku mwa kusambidila mishwala eyi kumpala kwa wêwè kubanga anyi?”—Muf.] Ne disanka dyônsò. [“Kudi *yaya* ne *eyi* idi ikengela kusambidila.”] Mbîmpè, mukalenge, twasakidila. Bu mudi munsantu ewu, Mwaneetu Glover, ûndi mumanye kukaadi mpindyewu bidimu ndambu, mvwa mupete dyèsè dya kwikalaku nende katanci makeelela diloolo. Nenku yêyê wangambidi bwa...uvwa mulaadika mu bulaalu ndambu wa dîbà, mwikishe. Nenku mpindyewu, ne bidimu makumi mwandamutekete ne bitaanu bikaadiye naabi ebi, nyêyê ewu walukila mu mudimu wa Mukalenge. Mêmè ncyèna ne cyabibidi cya dicyoka dîmvwâ naadi to pângûmvù bwalu abu. Mvwa ndyambidila ne ndi mucyoke, kadi ncyèna—ncyèna ngela meeji ne ndi mucyoke to. Nyewu ufuma ku dinteekela kaaba aka ndambu wa mishwala, mu—mu mushindu wa bibombi bya mikanda, ne bikwabo, mudiyi isanganyiibwa ne mimana kwikala myaluja.

³ Mpindyewu, yônsò wa kunudi mu myaba idi cisanji cifika, anyi apa, udi ujinga umwe wa ku mishwala eyi, ne wêwè muswe... Angelus Temple utu uyituminangana ku musangu ne ku musangu, dîbà dyônsò. Udi anu mwa kufunda mukanda

kutuma kuneeku ku Angelus Temple ne nebayisambidile, bwalu mêmè nènùnàadikilè ne cintu aci m'Mufundu. Mmulayi wa Nzambi.

⁴ Ne bu byòbì mwa kwikala ne nudi nujinga bwa mêmè kusambidila umwe wenu, mona's, nêngikale ne disanka bwa kwenza nanku. Udi anu mwa kumfundila mukanda kuntumina mu kasheete kaa mikanda 3-2-5, 325, Jeffersonville, tudi tubala ne: J-e-f-f-e-r-s-o-n-v-i, l ibidi, e. Jeffersonville, Indiana. Anyi pawikala kuyi uvuluka kasheete kaa mikanda, funda anu "Jeffersonville" cyanaana. Nkaacimenga kakese, kaa bantu batwa ku binunu makumi asatu ne bitaanu. Bantu bônso mbammanyè muntwamu. Nenku tudi bafwanyine kwikala ne disanka dya kusambidila mushwala ne kukutuminawu.

⁵ Nenku, mpindyewu, tukaadi batutetuute dyakalenga mu kwenza kwa cyòcì eci, bwalu...Nenupete kakanda kaa nyungulukilu pamwe ne cyòcì eci, bwa ne kudi bantu pa buloba bujima biikale basambila dinda dyònsò pa dîbà citeema, ne pa dîbà dikumi ne ibidi ne pa dîbà isatu. Nenku nudiku peenu mwa kudifwanyikijila, pa buloba bujima eku ne eku, dîbà kaayi dya bufuku didi dikengela kubiikabo bwa kwenza diine disambila edi. Nenku piikala bantu aba binunu makumi, kuvudija ku binunu, batuma masambila kudi Nzambi pa dîbà dimwedimwe adi bwa mudimu wa bwambi ewu, masaama enu, Nzambi kênàku mwa kuàbènga nansha. Nenku mpindyewu twètù, bu mündi ngamba, katwena ne ndongamu miteeka to, katwena baswe kupeta dikuta dya ku mfranga nansha. Tudi anu... Piikalabi ne tudi mwa kunukwacisha, ke citudi bavwile apa nunku ewu. Nenku tu-...

Muntu mukwabo nyewu ulwa ne dibuki dikwabo dya mishwala.

⁶ Mpindyewu, wêwè kuyi ne mushwala úvwà mwa kujinga kutuma to, ee, nanku's udi anu ufunda mukanda cyanaana, nanshà nanku. Wêwè kuyi naawu dijinga mpindyewu to, uwulame mu Mukanda wa Byenzedi, mu Bible, nshapita wa 19. Nenku newikale mudi kakaba kakese katooke katwikala mwa kukutumina, ne mēyì a dikuumvwija mushindu wa kwanji kutonda mpekaatu yebe dyambedi. Nenku (Twasakidila) mushindu wa wêwè kutonda mpekaatu yebe. Kwênàku ne cya kuteeta bwa kupeta cintu kampanda kudi Nzambi paudi kuyi mwanji kudilengeja kumpala kwa Nzambi to. Nwamonu anyi? Ne pashiishe nebakuumvwije mwômò amu bwa kubiikidisha beena mutumba beebe bwa bôbò kubwelamu, ne mpaasata webe. Wêwè mwikale bwalu ne muntu mu mwoyi webe, anji nda kabulongolole dyambedi, nenku walukile. Nenku pashiishe nusambile, nwênzè disangisha dya milombo mu nzubu mwenu, mwikale mwase mushwala mwine ewu ne mpengele ku kaputulu keebe kaa mwinshi aku, nenku mwikale witabuuja Nzambi. Nenku pa mèbà asatu awu, dituku dyònsò, nekwikwale bantu mu

nyungulukilu yònsò wa buloba biikale munkaci mwa kusambila, dikwatakanangana dya masambila mu nyungulukilu wa buloba.

⁷ Nenu mpindyewu bwalu bwakushaadi wèwè, kabiyiku bya ufuta kantu to, tuma wèwè anu cyanaana. Nenu—nenu, mpindyewu, katwakukufundila mukanda tukwandamuna bwa kukutacisha bu kunana kwa dibanza anyi bwa kukwambila ndongamu kampanda utudi nende to. Tudi baswe bwa wèwè kutwa ndongamu kampanda nyama ku mikolo, kadi twètù katwena—katwena nende nansha umwe wa wèwè kutwa nyama ku mikolo to. Wamonu anyi? Pa nanku wèwè. . . Kì mbwa kumanya mwaba ùdi musòmbèle to, cidi anu mbwa dyumvwangana cyanaana ne bwa mudimu kampanda wa bwambi wa Mukalenge, utudi tuteeta kuyiisha kumpala.

⁸ Mpindyewu twinyikaayi mitu yetu. Nenu pawikala mu citupa cya buloba cidi cisanji cyumvika, ikala muteeke mushwala webe mwaba awu, utekepu anu cyanza cyebe wèwè mwine patudi tusambila apa.

⁹ Mukalenge wa ngàsà, nyewu tuKutwadila tubuki tukese etu, pàmwäpa tumwe twa ku twòtò tudi tumweka bu tunkooci tukese twa mwànà wa mu diboko, anyi—anyi kavwalu kakese kaa mwinsi mwa muteelu, anyi mukolo wa tunshesheete tukese, anyi—anyi cintu kampanda, mushwala, biikala mwa kuya kudi babeedi ne badi mu ntatu. Mukalenge, mbilondeshile ku Dìyì Dyebe ke patudi twenza cyòci eci. Bwalu tudi tubala, mu Mukanda wa Byenzedi ne, bavwa bangata mishwala ne tulùlù, bivwabo balengeshe mubidi wa musadidi Webe, Pòlò, bwalu bavwa biitabuuja ne Nyuma Webe uvwa pambidi pa muntu awu. Nenu nyuma ya bukooya iwva ipatuka mu bantu abu, ne ntatu ne masaama bivwa byumuka pambidi paabo, bwalu bavwa biitabuuje. Nenu mpindyewu tudi tufika ku dyumvwa, Mukalenge, ne twètù katwena Pòlò Munsantu to, kadi tudi bamanye ne Wèwè uci mushaale anu Yesu. Nenu nyewu tudi tulomba bwa Wèwè ufileku buneeme ku diitabuuja dya bantu aba.

¹⁰ Ne baakamba musangu kampanda ne Izaleela, pavwaye uditacisha bwa kutumikila Nzambi, wakakwacika mu buteyi, mbù kumpala kwabo, mikuna ku nseke yònsò, ne cilwilu cya Pâlò cyenda ciseemena. Nenu muntu kampamda wakamba, ne: “Nzambi wakapwekesha mèsù kutangidila mu Dikunji dya Kapya, ne mèsù a cijji, nenu mbù wakakwacika bwòwà ne wakadisaka paanyima, ne wakapenga kajila kaa Izaleela kuyiilaye too ne ku buloba bulaya.”

¹¹ Eyi Mukalenge, pwekesha cyakabidi mèsù, piikala tubuki etu mwa kuteekiibwa pambidi paa babeedi bu civulukilu cya Dìyì Dyebe didi ne mwoyi. Nenu disaama dikwacike bwòwà, tangidila mu Mashi a Mwànà Webe, Yesu, Yèyè wákafwà bwa difuta dya cibawu edi. Ne mwena lukuna akwacike bwòwà ne

uumuke, bwa bantu aba babwele mu mulayi, wa ne “Kumutu kwa byònsò,” ne ke dijinga Dyebe adi ne “tutante mu bukole bwa mubidi.” Enzaku bwalu abu, Taatu, bwalu tudi tubituma biikale ne lwidì alu—ne lwidì alu mu mwoyi wetu. Ne ke cidi kiipacila keetu. Tudi tubituma mu Dîna dya Yesu. Amen.

Twasakidila, Mwaneetu Glover. Twasakidila, mukalenge.

¹² Mpindyewu, bu mudibi ne diloolo edi ke dyoya dya citupa eci cya ditabuluja, ncyèna mumanye ne byapita ku bisanji anyi kabyakupita, kadi ndi muswe kwambila (piikalabi kabiyi bipita ku bisanji to) bateeleji ba ku bisanji ne, edi disangisha ndimwe dya ku a mîmpè menemene ânkaadiku mwenze kukaadi bidimu byàbûngì, byàbûngì. Ndyenzeke diikale dilamakanangane, kadiyi lutatu, ne dinanga dipite, disangisha dya beelangane maboko dînkaadiku mêmè ewu mubwele kukaadi ntanta mule.

¹³ [Mwaneetu wa balume kampanda udi wamba ne: “Tudi ku bisanji too ne pa dîbà inaayi ne tusuna dikumi ne tutaanu, mwaneetu. Ne bantu mbakuteeleje, mu sud mwònsò mwa Californie, ne mu bidiila mwamwa, ne mu mazuwa a mâyi. Tudi tupeta maaluu adi afumina kudibo. Pa nanku wêwè udi ne musumba munene wa bateeleji, binunu ne makumi a binunu.”—Muf.] Twasakidila, mukalenge. Abi’s mbilenga bya dikema. Ndi ne disanka dya kuumvwa aci. Nzambi anubeneshe bònsò.

¹⁴ Ne mêmè ntu anu misangu yònsò ne kaaba kaa pabwaku munda mwa mwoyi wanyi bwa Angelus Temple, bwa mushindu udiye mwimanyine Evanjeeliyo wa Yesu Kilisto. Nenku, mpindyewu, eci—eci cidi cimweka bwanyi mêmè bu cya cintangila anu mêmè nkaayaanyi mpindyewu. Mbimweke anu bu ne, paanyima paa mêmè mumane kutwilangana ne muntu ne muntu ne mêmè mumone bwîmpè bwa nyuma udiye nende, mbyenze anu bu ne ndi umwe wenu kupita mushindu ûntù kwònsò eku. Nzambi anubeneshe, ke disambila dyanyi ndyôdi adi. Nenku. . .[Bateeleji badi batuuta bikashi—Muf.] Twasakidilaayi, ne mwoyi wanyi wònsò.

¹⁵ Mpindyewu, bavwa bafile dimanyisha ne leelu ewu mwawa kwakula neenu ndambu cyenze bu muyiiki pa ne: *Bwalu Bulonda Bwà Nsòmbelu Wanyi*. Aci nci—ncintu cikole bwanyi mêmè. Ewu musangu newikale wa kumpala ûndi muteete bwa kulenga bwalu ebu kukaadi bidimu. Ne ncyèna mufwanyine kwikala ne dîbà dya kubusunsula to, kadi neciikale anu katupa cyanaana. Ne, mwômò emu, ndi mwenze bilema byàbûngì, mwenze bintu byàbûngì bivwa kabiyi mu byôbi to. Nenku nênjingè ne, nwênù badi mu myaba idi bisanji byumvwika ne nwênù badi mwaba ewu aba, kanulu kwangata bilema byanyi bu mabwe a cilendwishi to, kadi bu mbwebwe ya kutupikila bwa kutamba kunuseemeja pabwîpi ne Mukalenge Yesu.

16 Pashiishe, diloolo edi, nebikengele kwabanyabo twarta twa disambila bwa mudimu wa dyondopa dya babeedi diloolo edi. Mpindyewu, patudi twakula bwa *mudimu wa dyondopa*, kî mbwena kwamba ne twètù netwondope muntu kampanda to, “netusambidile muntu kampanda.” Nzambi ngudi wondopa. Yèyè mmudileeje anu wa ngàsà menemene kùndi, bwa kwandamuna ku disambila.

17 Nenu mvwa ngakula ne mulongolodi wa ndongamu wa mutangadiki kampanda mumanyike bîmpè, mwaba ewu kukaadi cikondo, nenku—nenku bavwa bakonka ne mbwa cinyi yèyè mutangadiki ewu katu usambidila babeedi. Nenu mutangadiki awu kwandamunaye mu—mulongolodi wa ndongamu wa masangisha aanyi mèmè, wamba ne: “Byôbì ne...” Mutangadiki ewu utu witabuuja mu dyondopa dya kudi Nzambi. Kadi yèyè anu mudidinge mubange kusambidila babeedi, mbifwanyine kwimanyika mudimu wende bwalu ekeleeziya nyidi imutuudila mfranga. Ekeleeziya yàbùngì, kabidi yàbùngì ya ku yôyi ayi, kayitu yitabuuja dyondopa dya kudi Nzambi to.

18 Pa nanku ndi mpeesha mutangadiki awu buneeme ne kaneemu bwalu mmulame kaaba kende, kaaba kende kaa mudimu. Pàmwäpa uvwa anu mufwanyine... Mèmè ncyèna mufwanyine kwangata kaaba kende to, ne ndi ngela mpata bwa ne yèyè mmufwanyine kwangata kaanyi kaaba. Twètù bônso tudi ne kaaba muntu ne muntu mu Bukalenge bwa Nzambi. Tudi bônso batwangane nkundu. Mapà mashiilangane, kadi Nyuma umwepele. Mishindu ya dimwenesha mishiilangane, ke cîmvwà njinga kwamba aci, kadi Nyuma umwepele.

19 Nenu, mpindyewu, diloolo edi midimu neibange... Ngela meeji bavwa bame ne cibilu cya dimba dya mijiki didi dibanga pa dîbà isambombo ne tusunsa makumi asatu. Nenu, mpindyewu, pawikala pambelu mu bitupa bidi bisanji byumvwika, bwela uteeleje cyôci eci. Cidi... Neciikale cilenga be, mmutuci misangu yônso.

20 Nenu pashiishe ndi njinga kwamba ne twarta twa disambila netwabanyiibwe dyakamwe padi edi disangisha dijika, padibo anu batangalaja edi disangisha apa, pawikala apa mwikale ujinga karta kaa disambila. Mbammanyishe mwômò anu anu mu tusunsa tukese emu ne, mwanaanyi wa balume anyi Mukalenge Mercier anyi Mukalenge Goad, bôbò ke biikala mwa kwabanya twarta twa disambila. Wèwè shaala anu mwaba ûdi musòmbe awu. Disangisha didi dyenza anu ditangalaka, shaala anu musòmbe mu nkwasu webe bwa bânà baa balume abu bamone mwa kupweka kupicila mu mulongo ne kwabanya twarta twa disambila ne lukasa lwônso. Nebyenzeke mu bisasa mwamwa anyi panshi apa, nansha penyi, nzubu ya panshi anyi mwaba wônso uwikala awu, ushaale anu mu nkwasu webe nenku bânà baa balume abu nebamanye ne udi apa mbwa karta kaa

disambila. Nenku diloolo edi netusambidile babeedi. Nenku piikalala Nzambi kayi mushintulule meeji aanyi to, ndi muswe kuyiisha pa cyena bwalu eci diloolo edi: *Wèwè Mutùleejè Taatù, Aci Necitùwishè.*

²¹ Mpindyewu ndi njinga kubala bwa cyena bwalu kampanda mu mapingaja emu, bwa kubanga anu *Bwalu Bulonda Bwà Nsòmbelu*, cidi cisanganyibwa mu Mukanda wa Ebelu, nshapita 13, nenku tubangilaayi apa pa . . . Ndi njinga kwamba mvensa wa 12.

Ke bwa cinyi Yesu kabidi, bwa kumonaye mwa kujidila bantu ku mashi ende, wakakenga pambelu paa ciibi.

Nenku tuyaaayi . . . kudiye pambelu paa cituudilu, bambule bundu bwende.

Bwalu panwapa katwena ne cimenga cidi cishaala kashidi nansha, kadi tudi tukeba cicilwalwa.

²² Mpindyewu ke kubala nkwaku kwa mushindu awu. Bwalu, nudi numona, piikalaci ne mbwalu bulonda bwa nsòmbelu, anyi ne ncintu kampanda citangila muntu, kî ng'aci citudi tutumbisha nansha, nangananga maalu a kale a—a muntu, piikalawu mafiike fitutuu bu aanyi kunu. Kadi mvwa ngela meeji ne, twètù babale Mufundu, Nzambi mmufwanyine kubenesha Mufundu awu. Nenku meeji aanyi ngôwò aa:

Nгаа ne panwapa katwena ne cimenga cidi cishaala kashidi nansha, kadi tudi tukeba cicilwalwa.

²³ Mpindyewu, ndi mumanye ne nutu banange Los Angeles nwamba kufwa. Nudi ne bukenji bwa kumunanga. Ncimenga cinene, cilenga. Ne mîshî yaci idi inyangà cibwashibwashi ayi ne bikwabo, nansha nanku ncimenga cilenga, kuulu kwîmpè. Kadi cimenga eci kacyakushaala kashidi to, cidi ne cya kwikala ne ndekeelu waci.

²⁴ Ngâkiimana mu Loomo (mwaba mene uvwa bakalenge banene) ne bimenga bivwabo badyelela meeji ne bavwa mwa kubyasa bwa kabiyi mwa kufwa abi, kadi bikaadi bikengela kuumbula makàsà makumi abidi bwa kushiisha kapeta bibuwa byabi.

²⁵ Ngâkiimana mu myaba ivwa ba-Pâlò biikale ne makalenge abo manene ayi, kadi udi mufwanyine kuumbula mu buloba bwa kupeta mwaba mwine uvwa ba-Pâlò bakookeshile awu.

²⁶ Twètù bônso tutu baswe kwela meeji bwa cimenga cyetu ne mwaba utudi basòmbèle. Kadi vulukaayi ne, kacyakushaala anu kacya ciimana to.

²⁷ Pâmvwà mwânà mutekete mvwa ne ciibidilu cya kuya ku mucu munene kampanda wa érable. Mu ditunga dyetu twètù tudi ne mabaya a makole àbûngî. Ne pashiishe tuvwa ne mici ya érable miine eyi, mici ya érables ya nsukaadi, itudi tubiikila ne “mici mishile ya érable” ne “mici miteketingane

ya érables.” Muci munene muleemule wa kafyondo ewu, ke uvwa mucu mutambe kwikala mwîmpè kumona. Nenku pâmvwâ ngalukila mfumina ku madimi, ku midimu ya dikosa bisoosa bya kwelela nyama ne—ne ya dinowa, mvwa munange kwikala nya ku mucu munene ewu ne—ne kusòmba mwinshi mwawu ne—ne kutangila muulu amu. Nenku mvwa mwa kumona matamba awu, manene ne a bukole miikale anyunga ne lupeepele, mucu munene wa kafyondo. Nenku mvwa ngamba ne: “Udi mumanye, ndi ngitabuuja ne ewu mucu newikale mwaba ewu munda mwa nkama ne nkama ya bidimu.” Kî nkwanji kupita matuku to kûndi mukatangile mucu mwine wa kale awu, ukaadi anu cikuuku.

²⁸ “Bwalu panwapa katwena ne cimenga cidi cishaala kashidi nansha.” To, cintu nansha cimwe pa buloba apa cinudi mwa kutangila kaciyena mwa kutungunuka to. Cidi ne cya kwikala ne ndekeelu. Cintu cyònsò cidi cifwa eci cidi ne cya kushiila dibenga kufwa kaaba. Pa nanku nansha twêtù bavwije njila yetu myalabale eyi mîmpè ya mushindu kaayi, nansha twêtù biibake nzubu yetu milenga ya bishi, yònsò idi ne cya kuya, bwalu panwapa cintu nansha cimwe kaciyena mwa kutungunuka to. Anu Cidi kaciyi cimweka aci ncyatungunuka.

²⁹ Ndi mvuluka nzubu utuvwa basòmbèle, uvwa nanzubu wa kale wa mici mumeta ne malaba. Mémè. . . Pàmwâpa mingâ misangu bààbûngì kacya kabatu banji kumonaku nzubu mumeta ne malaba to. Kadi yêyè awu uvwa mumeta ne malaba pambidi pònsò, ne mici miine ayi mile ya mâlekâ ivwa ku nzubu wa kale awu, mvwa mémè ndyambidila ne nzubu awu uvwa mwa kushaala bidimu nkama. Kadi, nudi bamanye, leelu ewu mwaba mwine uvwa nzubu awu ukaadi nzubu myasshila bantu kudi mbulamataadi. Pashiilangane bikole. Bintu byònsò bidi bishintuluka. Kadi. . .

³⁰ Ne mémè mvwa ne ciibidilu cya kumona wanyi taatu, uvwa muntu wa citupa, kâmpimpinyàmâ, ne bukole bwa kanzèkelè, ne yêyè uvwa umwe wa ku bantu baa bitupa bavwa batambe kwikala ne bukole bâmvwâku paanyi mumanye. Mvwa mupetengane ne Mukalenge Coots, mulumyana uvwaye wenza nende pa ciibidilu midimu ya kuupula mici, uvwa mukosolodi wa mici, nenku kukaadi bu cidimu cijima nanku awu, Mukalenge Coots ewu mmulunda wanyi mwîmpè be, mwikale mulami wa mu Première église Baptiste, nenku uvwa wamba ne: “Billy, bivwa bikengela wêwè ewu kwikala muntu wa bukole bwa kanzèkelè.”

Ke mémè ne: “To, ncyêna naabu to, Mukalenge Coots.”

³¹ Yêyè ne: “Bu wêwè mufwane papa webe, nunku’s udi naabu.” Yêyè ne: “Mémè ngâkamòna muntu awu, ne bujitu bwa livres de poids lukama makumi anaayi [kilô 64], ubweja nkaayende mucu mu dikaadika, wa bujitu bwa livres de poids nkama citeema [kilô

408].” Uvwa mumanye anu menemene mushindu uvwa ukengela kwenza. Uvwa ne bukole. Nkaavwaku mumonemone pavwaye walukila kumbelu bwa kwowa mâyi ne kudilongolola bwa didya dya mundaamuunya, pavwa Maamu mwa kumubiikila.

³² Kabidi tuvwa ne mucu wa kale wa pommes pambelu mu bulà bwa kumpala kwa nzubu, nenku kuvwa kabidi mici isatu anyi inaayi myele mulongo mu diya dya kumfundu. Nenku anu mu mucu wa pankaci awu muvwa lumwenu lwa kale, lùkaavwà lupandike, lumwenu, lunene. Lwikale lulamika ku luseke lwa mucu ne misonso mibendamija. Inudi mwènù benji baa mabaya badi munkaci mwa diteeleja aba bafwanyine kubiikila ne “bikudikidi bya bilàmbà.” Bavwa bayibendamije bwa kukwacisha lumwenu alu kaaba kamwe. Kabidi pavwa cisaku cya milonda cya kale. Mbanganyi bakaadiku bamone cya mil- . . . cisaku cya milonda cya cyena kale? Mèmè ndi anu mwa kucimona.

³³ Ne pashiishe pavwa cibasa cikese cya kwowelapu byanza, ciikale anu dibaya dikese diikale ne mukolo mwiname mwinshi, mulamikila ne musonso ku mucu aku. Ne kampompi kakese, kaa kale, kaa soufre mwaba awu katuvwa tupatula naaku mâyi, nenku twowela mâyi ku mwine mucu wa kale awu. Nenku Maman uvwa ne ciibidilu cya kwangata mifuku ya bikùnyî ya makula uyenza bu nsùmê wa kudikupula naayi. Kudiku muntu ukaadi mudikupule ne nsùmê wa mufuku wa cikùnyî wa bukula bwa mâmpà anyi? Ee, kadi ngâdyûmvù ne ndi kwetu pambelu mpindyewu. Nenku miine nsùmê ya minene, mipapakane ya kale ayi! Ne pavwaye utwowesha mâyi twètù bânà bakese, uvwa mwa . . . kuumvwa anu bu ne udi akuuvula dikoba misangu yônsò iwaye utunyaanuna. Nenku ntu anu mvuluka nsùmê wa kale wa mufuku wa cikùnyî wa bukula bwa mâmpà awu. Nenku uvwa upululaku ndambu wa nshinga, wenza tu-màlendà tukese, bwa kumulengeja mu mushindu kampanda.

³⁴ Mbanganyi bakaadiku balaale pa mààtèlâ a bisoosa? Ee, nê—nêngâmbè’s maalu we! Mbanganyi bakaadiku bamanye civwa musaamu wa bisoosa? Ee, Mwaneetu Glover, mèmè’s ndi kwetu kumbelu mpindyewu, cya bushuwa’s! Mààtèlâ a bisoosa, ee, kî nkwanji kwenza matuku àbûngî menemene ândi mushiyangane naawu to, ne civwa . . . Kaa, s’ntulù—s’ntulù tulenga be, tatalale. Pashiishe mu mvù wa mashika batu bangata bulaalu bwa kale bwa masala a nzoolo baadijapu, nudi bamanye, nenku pashiishe bikengela kutubwikila cipese cya ntenta lwa ku mutu kwetu eku bwalu nêjè uvwa upeepuka ubwelela mu mi—mi—mitanta ya nzubu awu, nudi bamanye, muvwa mabaya a bipese-bipese a kale awu mafwanyine kwikala mabendame, nudi bamanye, nenku nêjè mwikale udifinda ubwelelamu. Nenku, kaa, ndi mwa kubivuluka bimpè be.

³⁵ Nenku pashiishe Papa uvwa ne ciibidilu cya kwikala ne bùloosù bwa myedi. Mèmè . . . Mpindyewu bwa eci necinupapule.

Buwwa bwenza ne bizubu bya matala, bùloosù bwa myedi bwenza ne bizubu bya matala. Uvwa mwa kwangata nsabanga wa cisukula uvwa maamu mwenze awu, umulongolola umulaabakaja ku cibanga ne bùloosù bwa bizubu bya matala abu, nenku ukoono myedi ne kapaaya kaa kale kaa cikwacilu cile. Nenku mu dyalumingu uvwa mwa kwangata ma—mabeji a mikanda, upayika ku nshingu wa muteelu, bavwa bavwala nshingu ya miteelu ya bindundu nenku biikale babilamakaja ku nyungulukilu wa nshingu wa muteelu awu mushindu ewu bwa kwenza ne ntu—ntu—ntutu kayilu kulaabakana ku nshingu wa muteelu awu. Nukaadiku bamone bacyenza anyi? Mona's, ekelekele, ekelekele!

³⁶ Ndi mvuluka kasulu kakese kaa kale lwa kwinsi kwaka, kutuvwa tuya kanwa màyi, tutunta màyi etu mu lutobo lwa kale. Mbanganyi bakaadiku bamone lutobo? Ee, mbanganyi kunudi eku badi bafumine ku Kentucky, twamb'eku twamb'eku? Eyo, ee, tangilaayi anu beena Kentucky kuneeku. Ee, ekelekele, mèmè's—mèmè's ndi ku...Mvwa ndyambidila ne bônso bavwa beena Oklahoma ne beena Arkansas balwe muneemu emu, kadi mbyenze anu bu ne beena Kentucky badi muncaki mwa kumwangala balwa muneemu. Ee, mbajandule piitoolu mu Kentucky kukaadi anu ndambu wa ngondo, nudi bamanye, pàmwäpa ne ke pakaadi bamwe baa kudibo babange kumwangeela kuneeku.

³⁷ Nenku pashiishe ndi mvuluka pavwa Papa walukila kumbelu wowa byanza bwa kudyä byakudyä bya mundaamuunya, uvwa mwa kubunya maboko a muteelu, ne tuboko tukese tupimpile atu. Nenku pavwaye ukonya maboko apu, udyela màyi kwisù, misunya ya maboko ayi yipata mu maboko makese a muteelu awu. Nenku mvwa ngamba ne: “Udi mumanye's, papa wanyi nealaale afike too ne ku bidimu lukama ne makumi ataano.” Uvwa ne bukole bwa dikema! Kadi walu kufwa ne bidimu makumi ataano ne bibidi. Nwamonu anyi? “Panwapa katwena ne cimenga cidì cishaala kashidi to.” Ncya bushuwa. Katwena mwa kutungunuka to.

³⁸ Mpindyewu twäsàayi kaalwendu kakese tũng, twètù bônso. Kudiku anu muntu ne muntu wa kunudi eku mwab'ewu udi ne bwalu bulonda bwa nsòmbelu wende, anu bu mèmè ewu, nenku bitu bimpè kwendakanaku mu kajila kaa bivulukilu ku musangu ne ku musangu. Kanwena nwelaku peenu meeji nanku anyi? Kwanji kwalukila cyanyima, nenku twètù bônso twalukilaayi paanyima ndambu, twalukila ku malabula a mafwanangane a patucivwa bânà.

³⁹ Nenku mpindyewu citupa cya kumpala cya bwalu bulonda bwa nsòmbelu wanyi. Nèmbülengè anu kakese, bwalu bukaadi mu mukanda ne bantu bàábũngì badi ne mukanda mwine awu.

⁴⁰ Batu bandelele mu kazubu kakese kaa ku mikuna, lwa mu mikuna menemene mwamwa ya mu Kentucky. Bavwa ne kaacibambalu kamwe katuvwa basòmbele, kakayi ne panshi peela nshaamenda to, nansha mene mabaya malamika panshi to, kavwa panshi piikale anu buloba. Nenku cikuuku cya mucu, lusongo lwa cikuuku cikosa ciikale ne mikolo isatu, ke civwa etu meesa. Nenku tu-Branhams twa twânâtwânâ twônsò atu tuvwa tuungwila tunyungulukile mwaba awu, ne pambelu ne kumpala kwa kazubu kakese kaa kale aku, twikale tudivwanda mu malaba pambelu apu, byenze anu bu ne mmusumba wa tu-opossums twikale tudivwanda mu lupwishi pambelu apu, nudi bamanye, twakunyi twanyi twônsò twa balume atu. Twêtù tuvwa citeema cijima, ne kânâ kaa bakaji kamwepele, kaa bwalu kavwa kacimone munkaci mwa musumba mujima wa bânâ baa balume awu. Bitu bikengela twêtù kumuneemeka too ne leelu ewu bwa bintu bituvwa benzenze mu matuku miine awu. Yêyè kavwa mwa kwikala uya neetu mu myaba kana yônsò to, tuvwa mwa kumwipata tumwaluja, bu muvwaye mwânâ wa bakaji. Pa nanku kavwa mwa kutwala biine abi to, nudi bamanye. Nenku tuvwa ne. . . Nenku bônsò. . .

⁴¹ Ndi mvuluka ne lwa paanyima paa meesa awu tuvwa ne nkwasu anu ibidi, miikale myenza ne bizubu bya mici. Ivwa anu ntuci twânâ twa hickory tutwangaja, ne mu ntaku mwikale mulukakaja bizubu bya mucu wa hickory. Kudiku muntu ukaadi mumone nkwasu wa bizubu bya mucu wa hickory anyi? Eyo. Ncidi anu mwa kuumvwa kabidi muvwa Maman wakula. Kaa, paanyima paa matuku patwakabwela mu nzubu muvwaye mwa kupeta panshi palamika mabaya, ne twine twânâ atu twambula pa mikolo mushindu *ewu*, mwikale unyungisha nkwasu wa kale awu mwikale udila panshi apu ne ntung, ntung, ntung. Ne ndi mvuluka mûmvwâ nkwata twânâ atu bwa katupatuku pambelu to, pavwaye ne cya kwikala wowa mâyi anyi cintu kampanda, uvwa mwa kulaadika nkwasu panshi ne kumukudimuna kasekeseke mwikale mujike mu mushiku wa mbelu amu, bwa twânâ atu katupatuku to pavwabi bikengela ne aye ku musulu bwa kasuna mâyi, ne bikwabo.

⁴² Nenku Maamu uvwa ne bidimu dikumi ne bitaanu pângââkalediibwâ, Papa uvwa ne dikumi ne mwandamukulu. Nenku mêmè ke uvwa wa kumpala ku bânâ citeema abu. Nenku batu bandondele ne dinda dyakandelabo adi. . .

⁴³ Mpindyewu, tuvwa bapele baa dikema, bapele baa ku bapele bônsò. Nenku katuvwa nanshâ ne dididiishi mu kiine kazubu kakese aku to. Kavwa ne kantu bu kaaciibi kakese kaa mabaya kavwabo bunzulula. Ndi ngela mpata bwa ne nwênù aba nukaadiku bamone kaacintu kaa bu nanku awu. Kaaciibi kakese kaa mabaya kiikale kunzuluka pa mwaba wa dididiishi, nushaala bakâlamè kunzulula mundaamuunya kadi kukinjila bufuku. Katuvwaku mwa kuteemesha nzembu anyi

nansha piituloolu mu matuku miine awu to, tuvwa ne cituvwa tubiikila ne “mwëndù wa mafuta a ngombe.” Mpindyewu, ncyêna mumanye ne nutuku bamanye ne mwëndù wa mafuta a ngombe uvwa ncinyi to. Ee, ncinyi cinutu. . . Ne nwênù biine nukaadiku basumbe. . . bateemeshe dinungu dya mucu wa pin? Bwa kwangata anu dinungu dya mucu wa pin kadi kuditeemesha ne kuditeeka pa mbwikidiji wa dikopo dya mabeele, didi diteema. Nenku ke. . . difwima mwîshî ndambu, kadi kabavwa ne nkwasana ne meesa ne tubadi to, byôbi biine, bwa ne nebinyanguke ne mwîshî. Pa nanku. . . kazubu kavwa kakwata mwîshî. Mwîshî uvwa ukokeka anu bîmpè bwalu kuvwa musaka mwalabale kuvwawu mwa kukokiibwa. Nenku bivwa. . .

⁴⁴ Nenku baakandela mu mu—mu matuku 6 a ngondo mwinâyî, cidimu cya 1909. Mu bushuwa bwa bwalu, nudi bamanye, aci cidi cyenza ne ngikale ne bidimu bipite pa makumi abidi ne bitaanu mpindyewu. Nenku ewu, dinda dyakandelabo adi, Maamu uvwa ulonda ne baakunzulula dididiishi adi. Mpindyewu, katuvwa nansha ne bangangabuka to, kuvwa muleleshi mukaji kampanda. Anu. . . Ne mwine muleleshi awu uvwa nkaaku mukaji. Nenku pângââkalediibwâ ne ntwadijilu wa kudila kwanyi, ke—ke Maamu pende kujingaye bwa kumona mwanende mwine awu. Ne—ne yêyè mwine pende ucivwa anu mwânà wetu wa mabeele pa ludimi ewu. Nenku paakunzululabo kaadididiishi kakese aku, anu pa kabundubundu menemene, bu pa dibâ itaanu nanku awu. Ke. . . Kuvwa kanyuunyi kakese kakole kakunze mu cyâdî kasòmbè ku luseke lwa kiitwitu kakese. Ne nwênù bônso nukaadi bamone fôtò waku mu—mu mukanda wanyi wa bwalu bulonda bwa nsòmbelu wanyi. Kanyuunyi kakese kakunze mu cyâdî kavwa kasòmbè mwaba awu kiikale anu kimba ne mwaku mwônso.

⁴⁵ Mêmè ntu anu misangu yônso munange tunyuunyi tukunze mu cyâdî atu. Mpindyewu, nwênù nsongalume idi mu myaba idi bisanji byumvwika, kanwashiku tunyuunyi twanyi atu to. Nudi numona, twôtò atu tudi—tudi—tudi. . . Ntunyuunyi twanyi mêmè. Nwênù nukaadiku buumvwe mwanu utu bantu beela wa kanyuunyi kakunze mu cyâdî, mwakapetaku cyâdî cikunze? Nêngîmanè kaaba aka ndambu. Mushindu wakapetaku cyâdî cikunze. . . Kuvwa eku Mfumu wa bamfumu mwikale ùpunga ne lufu dituku kampanda ku Nkuruse, Yêyè mwikale ukenga kakuyi muntu nansha umwe mufwanyine kulwa kudiYe to. Kavwa ne muntu nansha umwe wa kuMukwacisha to. Nenku kuvwa kanyuunyi kakwabo kafiikuluke kavwa kaswe bwa kajuula misonso ya ku Nkuruse ayi, ke kwikalaku anu kenza kubuuka kuya ku Nkuruse aku kiikale kaswa kujoomona misonso ayi. Kavwa katambe bukese mu mushindu wa kakayi mwa kajuula misonso ayi to, ke kôkò kuvwijaku kaacyâdî aku kakunze kunzuu ne mashi. Nenku kubangila anu apu ke kaacyâdî

aku kushaalaku kakunze. Kanùkăshiku to, nwênù nsongalume. Kalekelaayi.

⁴⁶ Kavwa kasômbe ku luseke lwa dididiishi aku, kiikale kadila mùtù tunyuunyi twa cyâdi cikonze twimba amu. Ke—ke Papa kusakaye kaadididiishi aku paanyima. Nenku mbenze anu basaka kaaciibi kàvwà kiikale kaadididiishi aku paanyima, Bukênkè bunudi numona mu fôtô bwabwa e kubwelabu bwenda bunyunguluka mu dididiishi amu, mudi maamu ulonda, kulwa kulembelelabu kuulu kwa kalaalu. Kaaku kadi ke kupangaye cya dyamba.

⁴⁷ Mpindyewu, tudi...katuvwa famiye wa batendeleedi to. Beena wetu famiye mbeena Katolike. Mêmè ndi Irlandais ku nseke yônsò ibidi. Taatu yêyè udi Irlandais lukama pa lukama, Branham. Maamu udi Harvey; kadi, tatwëndè wakasela mukaji wa ba-Indiens baa Cherokee, ke aci kukosa kaamudibu kakese kaa mashi a ba-Irlandais aku. Taatu ne Maamu bubidi bwabo kabavwa baya mu ekeleeziya to, nenku baakaselangana pambelu paa ekeleeziya ne kabavwaku bôbò ne ntendeleelu nansha wa kânà ewu to. Nenku mwine mundekeelu mu mikuna mwamwa kamuvwa nansha ekeleeziya wa Katolike mwine ewu to. Pa nanku baakalwa ne bantu baa kumpala baakalwa kusômba muneemu emu, ba-Branhams babidi balwe paabo, ne ku bôbò abu ke kudi kulopokele lukongo lujima lwa ba-Branhams elu; ke ndelanganyi ya famiye awu nyôyi ayi.

⁴⁸ Nenku ke kuunzululaye...Paakunzululabo dididiishi edi ne paakiimana Bukênkè ebu muntwamu, baakapanga ne cya dyenza. Papa uvwa mumusumbile (mudi Maman mwambe) tunsalabeeta tupyatupya tubidi bwa difika edi. Ukaavwa kacya wimana ne...maboko mu cilambà cya pa cyâdi cya cinsalabeeta cya kale aci, mùvwà bantu baa mu diitu ne bakosolodi baa mici benza mu miine matuku awu. Ke cyôci aci kubenza bwôwà.

⁴⁹ Ee, paanyima paa mêmè mukumbaje pàmwâpa matuku dikumi, anyi cintu bu nanku awu, ke kuyabo naanyi ku ekeleeziya kampana wa ba-Baptistes uvwabo babiikila ne “Bukalenge bwa Opossums,” ekeleeziya wa ba-Baptistes wa Bukalenge bwa Opossums. Ke dînà dijima paadi ndyadi. Muvwa muyiishi mwendakanyi mukulakaji, muyiishi mukulakaji wa ba-Baptistes baa cyena kale uvwa upicila muntwamu musangu bu umwepele nanku awu mu ngondo ibidi. Mu...Bantu bavwa mwa kudisangisha bwa kwenza kaadisangisha kakese, bavwa mwa kwimba ndambu wa misambu, kadi bavwa bapeta diyishi misangu ne misangu dîbà dya dipicilamu dya yêyè mwendakanyi wa pa kabalu ewu. Bavwa bamufuta ku cidimu cyônsò mufuku wa maoji ne ndambu wa bintu bya mushindu awu, nudi bamanye, bivwa bantu badima bwa kumupa. Nenku muyiishi mukulakaji ewu uvwa mulwe, ke mwaba awu yêyè kungenzela disambila mêmè bu kânà katekete kaa balume. Ke lwanyi lwendu lwa kumpala lwa kuya mu ekeleeziya ndwalu.

50 Bu mu cidimu cya . . . kupita ndambu bidimu bibidi nanku awu, cikeena-kumona cya kumpala kwenzekaci.

51 Ee, bakaavwa bambilangane lwa mu mikuna mwônsò amu ne Bukênkè ebu bwakabwela. Nenku bavwa bateeta bwa kufwanyikija bwalu abu. Bamwe baa kudibo bavwa bamba ne civwa ne cya kwikala nsèsà ya dîbà mikatwe mu lumwenu mu nzubu amu. Kadi paamu kamuvwaku lumwenu to. Ne dîbà diine kadivwa dyanji kupatuka to, pacivwa anu pacyacya paa menemene, pa dîbà itaanu wa dinda. Nenku pashiishe, kaa, ke bôbò kuBulekela mene anu nanku awu. Nenku pânkaavwà bu . . . ngela meeji bidimu bu bisatu nanku awu . . .

52 Mpindyewu, bikengala ngikale ne meeji matooke. Kudi bintu mwaba ewu bindi nciyi muswe kwamba to, nenku ndi njinga kupeta mushindu wa kubyepuka bwa nciikadi mwa kubyamba to. Kadi paabi, bwa kwamba bulelela, bikengela anu kwamba bulelela nansha buktangile wêwè mwine anyi butangile famiye wenu. Kwikala ne meeji matooke pa bwalu abu, nenku pa dîbà adi bitu misangu yônsò anu bya mwomumwe.

53 Bwa wanyi taatu yêyè bivwa bwalu bukole bwa kwikalaye mutendeleedi. Yêyè uvwa nsongalume wetu wa menemene wa ku mikuna uvwa unwa maala ku musangu ne ku musangu, dîbà dyônsò. Nenku wakabwelakana mu cilumbu kampanda mu mvita, muvwa bantu babidi anyi basatu bambe kufwa pavwabo balwangana apu, beelangana mazaji, batwangana twele, muvwa mu difesto dya mushindu kampanda lwa mu mikuna mwamwa. Nenku Papa uvwa umwe wa ku babundyanganyi mu miine mvita ayi, bwalu byakenzeka ne mulunda wende kampanda baakamutapa mputa, nenku yêyè awu kukuma muntu kampanda nkwasu. Nenku uvwa . . . Muntu awu kupatulaye keele ne ukaavwa anu ne acyompeke mulunda wa Papa awu keele aku bu mukaavwaye mubambidikila panshi, bwa kumucyompekaku mu myoyi, ke Papa kumusungilaye. Ivwa ne cya kwikala mvita ya kâmpudimàta ya yenza ne bwôwà, bwalu bôbò, ku mwine ntanta uvwabo basanganyiibwa awu lwa mu Burkesville mwamwa, ntanta wa kilomeeta yâbûngi, baakatuma munene wa bampulushi, mubande pa kabalu, bwa kwipatanganaye ne Papa.

54 Nenku muntu awu ukaavwa panshi mwikale ùpùnga ne lufu. Mbifwanyine kwenzeka ne bamwe baa ku beena famiye wabo biikale munkaci mwa kuteeleja. Nênteelè dînà dyende, Will Yarbrough ke dyende. Pâmwäpa bavwa . . . Ngela meeji bamwe baa kudibo badi mu Californie, bânà bende baa balume. Kadi yêyè awu uvwa mpomba mufuunyinyanganyi, muntu munene wa bukole, wâkashipa mwanende wa balume mulela ne mulonda wa ku lupangu. Pa nanku yêyè—yêyè awu uvwa muntu wa bukole bwa kanzêkelè wa cikisu cibi be. Ke kwenzekaku mvita mikole ya twele pankaci pende ne Papa. Ke Taatu kwamba kushipa

muntu awu, ke kukengelabi bwa anyeeme uumuke mu Kentucky ne asabuke musulu alwe too ne mu Indiana.

⁵⁵ Nenku uvwa ne mwanaabo wa balume uvwa musòmbèle, mwine musangu awu, mu Louisville, Kentucky, uvwa mwikale cindonda cya mfumu wa midimu wa Wood Mosaic Saw Mills mu Kentucky, mu Louisville. Ke Papa kulwaye kupeta tùùtwëndè awu. Papa ke uvwa mwânà mutekete ku bânà baa balume, mu bânà dikumi ne mwandamutekete. Nenku ke kulwaye kupeta tùùtwëndè awu, piine apu mpaakayaye kwenza cidimu cijima. Kavwa ne mushindu wa yêyè kwalukila to, bwalu mbulamatadi uvwa wenda ukebangana nende. Nenku pathiishe patwavu kuumvwa luumu lwa mwaba uvwaye usanganyibwa mu mukanda mutufundila, mutwa byâlà mu dînà dya cyanaana, kadi ke cyakambilaye maamu mushindu wa kwikalaye uumvwa maluba a kuvwaye.

⁵⁶ Nenku ndi mvuluka dîngà dituku ne kasulu kaa mâyi (kazubu kakese aka) kavwa anu mumfundu menemene mwa nzubu. Ne—ne mu ciine cikondo aci paanyima paa...Kudi ngondo citeema...dikumi ne umwe ya dishiilangana pankaci paanyi mêmè ne mwakunyaanyi wa balume udi mundonde, ne yêyè mwine ucivwa ukalaba. Nenku mwya ne lusakalabwa lunene mu cyanza, nenku mwikale nteeta bwa kumuleeja mûmvwà ne bukole bwa kukupa lusakalabwa alu mu bitoci bya kale, muvwa kasulu aku kapatuke mu buloba kadi kwenza buloba bwa bitoci. Ke mêmè kuumvwa kanyuunyi, kiikale kimba kuulu ku mucu. Ke mêmè kutangila kuulu ku mucu aku kadi kanyuunyi aku kubuuka e kuyaku, nenku, nkenze anu kaya, Dîyi kwakula naanyi.

⁵⁷ Mpindyewu, ndi mumanye ne nwênù nudi nudyambidila ne mêmè ncivwa mwa kwela meeji ne kuvuluka biine abi to. Kadi Mukalenge Nzambi Yêyè udi Mulumbulwishi wanyi, wa buloba ne maulu ne wa byônsò bidimu, mmumanye ne ndi ngamba bulelela.

⁵⁸ Kanyuunyi aku, nkenze anu kabuuka kaya, Dîyi kuumukila mwaba uvwa kanyuunyi aku mu mucu amu, cyenze bu cipeepele cikwate mu kiiwtitu, ke Dyôdî ne: “Wêwè ewu neusombe mu cimenga cidi pabwîpî ne New Albany.” Nenku ntu musòmbèle, kubangila anu mwine musangu ûmvwà ne bidimu bisatu awu too ne dîbà ditudi edi, mu ntanta wa miles isatu [kilomeeta 4,8] ne New Albany, Indiana.

⁵⁹ Mêmè kubwela e kwambila maamu bwalu abu. Ee, yêyè kudyambidila ne mvwa anu ndoota anyi cintu kampanda.

⁶⁰ Paanyima twêtù kumwangala kulwa mu Indiana paavu Taatu kulwa kwenzela muntu mukwabo mudimu, Mukalenge Wathen, muntu mubanji. Yêyè ke mwena byengelu bya maala bya Wathen Distilleries. Ne yêyè ke uvwa musangishe ne bisumbusumbu binene bya mfranga; udi ne miliyô búngi

cyanaana, ne ba-Colonels baa Louisville, ne—ne ndundu wa baseball, ne bikwabo. Nenku ke twètù kusòmbela pabwípì apu. Nenku Papa bu muvwaye mulanda, kabidi bu muvwaye kayi mwa kupanga kunwa maala to, ke yèyè—yèyè kuya ku dyenga dya whisky mu—mu cyengelu kampanda.

⁶¹ Nenku cyakampa diteeta dikole bu muvwabi ne mèmè ke uvwa mukulu ku bânà. Bivwa bikengela mèmè kwikala kulwa kusuna mâyi ne kuya naawu ku cyengedi aku, bwa kwikala kutalaja mbungu ayi pavwabo benza whisky awu apu. Pashiishe kubangaye kuàpàana, ne pashiishe kupetaye byengedi abi bibidi anyi bisatu. Mpindyewu, aci ke citupa cîndi nciyi muswe kulonda to, kadi mbulelela.

⁶² Nenku ndi mvuluka dîngà dituku, mfumina ku diyeebe aku, ngenda mbanda mutangile kumbelu, ndila mwadi. Bwalu lwa kumfundu kwa nzubu aku kuvwa dijiba, divwa...muvwabo ne ciibidilu cya kukosela mabwe a màayi màkasà. Bààbûngì beenu mbavuluke cikondo civwabo ne ciibidilu cya kukosa mabwe a màayi màkasà bàkaâtèèka mu musenga wa mabaya. Ee, mushindu awu ke uvwa Mukalenge Wathen ulama mabwe a màayi màkasà lwa mu musoko amu. Nenku Taatu ke uvwa mwe—mwendeshi wende wa mashinyi, mumwendeshidi wa mashinyi ende yèyè mwine. Nenku cikondo kulwaci...dijiba edi dyùle ne mishipa ne pavwabo baya kakosa mabwe a mashika bwa kulwa naawu kuàtèèka mu musenga wa mabaya, pashiishe pavwa mabwe a màayi màkasà awu enguluka mu muvù wa luuya lukole pavwawu apweka, avwaku bu matooke ngela meeji, matooke bikole bu mabwe a màayi màkasà a mu dijiba, nenku bavwa mwa kwenza naawu mudimu, kabiya bwa kuànwà to, kadi bwa kulama mâyi miikale ne mashika, kuàtèèka ku nyungulukilu wa mbekeci yabo ne mabeele, ne bikwabo.

⁶³ Nenku dîngà dituku mvwa nsuna mâyi kumfundu ku mpompì aku, uvwa mu ntanta wa mpangu bu inaayi nanku awu. Mvwa ngela mbila mikole kudi ewu yònsò uvwa kayi muswe kuàpeta, bwalu mvwa mufume mu kalaasa kadi bânà baa balume bònsò bapatuke baye ku dijiba, bakalobe mishipa. Mèmè paanyi mvwa munange anu kuloba. Nenku ke bòbò bònsò baye kaloba pa kuumusha mèmè, nenku mèmè ke uvwa ne cya kusuna mâyi a kuya naawu ku cyengedi aci. Mu bushuwa bwa bwalu, ekelekele, abi bivwa bikengela kushaala mutete ku mishiku, bivwa bikandika. Nenku mèmè...Civwa ndutatu lwa menemene. Nenku ndi mvuluka mûmwà ndwa kuntwaku ne mwânankàsà ûmwà mutuute ku cikuuku, nenku mvwa mujîngile cizubu cya ditala mwinshi mwa mwânankàsà awu bwa kalu kubwela lupwishi. Ukaadiku peebe mwenze nanku awu anyi? Kupayika anu cizubu cya ditala mwinshi mwa mwânankàsà webe mushindu *ewu* kadi kukuswika mwonji. Cidi cishaala cilame mwânankàsà awu mutadika muulu mwenze bu mutù wà nkuvu, nudi bamanye, mutadika muulu. Wèwè's

uvwa mufwanyine kundonda kumpeta kwônsò kûmvwà nya, ne cizubu aci cya ditala mwinshi mwa mwânankàsà; mwaba ûmvwà mumutuucile ku cikuuku awu, nudi bamanye. Ncivwaku ne bisabaata bya kuvwala to. Ne twêtù biine katuvwaku tuvvala bisabaata to, misangu mikwabo too ne cyabibidi cimwe cya movù wa mashika. Twêtù bavwale, mpatuvwa... bivwa anu bituvwa mwa kwangula abi, bivwa muntu kampanda mufwanyine kutupa pende abi. Kadi bwa bilàmbà kaayi, mbivwa pende muntu wa luse mwa kutupa.

⁶⁴ Ke mêmè kwimana mwinshi mwa mucu awu, nenku mvwa musômbemù mwikale anu ngela mbila mikole (civwa mmu ngondo wa citeema), bwalu mwa muswe kuya kaloba, bivwa bikengela nsune bipanza bya mâyi byâbûngî ne tumbekeci tukese twa mâyi a byapanshi bya nsukaadi, twikale anu bule *ebu* cyanaana, cyabibidi cimwe cya gallon [litre 1,89], bwalu ncivwa anu kânà kakese kaa bidimu bitwe ku mwandamutekete. Nenku mvwa ndwa kuâpôngolwela mu cipanza cinene ne pashiishe kwalukila kasuna tumbekeci tukwabo tubidi kadi kwalukila, kuâsuna ku mpompi aku. Ke mâyi atuvwa naawu awu. Nenku bavwa ne cya kuya kwenza mbungulu mujima wa whisky wa misela ya matala bufuku abu, bantu biine abu ne Papa, kumbelu aku.

⁶⁵ Nenku mvwa ndila mwadi, ke dyakamwe mêmè kuumvwa cintu kampanda cyenza mutooyi bu wa mvunda, cintu bu nunku ewu (mpindyewu, ndi ntekemena ne kî ndîyi dikole dipitepite to), cyenza ne “Wuuuussssh, wuuuussssh,” mutooyi anu wa nanku awu. Ee, kuulu kuvwa kutalale kakuyi mutooyi to, ke mêmè kuzenzakana. Nenku bwa nwênù kumanya’s, kamvunda kakese, ngela meeji ne nutu nubiikila twa nanku awu ne ntuumvundambyda? Mu movù awu wa automne wa cidimu batu bààka mu budimi bwa blé, nudi bamanye, mabeji ne bikwabo, mu movù wa automne kuntwaku, mabeji awu akaavwa mabange kushintuluka diikala. Nenku mvwa nsanganyiibwa mwinshi mwa mucu munene mutooke wa cilombalomba awu, uvwa pabwîpi ne pankaci paa diyeebe ne nzu—nzubu. Nenku ke mêmè kuumvwa mutooyi awu. Ke mêmè kuzenzakana, kuvwa kutalale kakuyi mutooyi to anu mudiku mu nzubu ewu emu. Kakuyi dibeji dinyunga ku lupeepele mwaba kampanda, anyi cinyi to. Ke mêmè kudyambidila ne: “Awu mutooyi udi ufumina penyi?” Ee, mêmè kudyambidila ne: “Udi ne cya kwikala kule ne mwaba ewu.” Ncivwa anu kânà. Ke mutooyi awu kwenza wenda ubanda wenda ubanda.

⁶⁶ Mêmè kwambula tumbekeci twanyi atu ne kwela kabidi lubila misangu ibidi kadi kwasa lwendu ngenda ndonda kajila aku, mvwa mwikishe. Nenku mvwa mfuma anu ku dyenza dya ndambu wa makàsà mwikale ngumukilapu, ngumukila mwinshi mwa matamba a mucu munene awu, nenku, kaa, ekelekele, ke kwenzabi mutooyi wa mvunda. Ke mêmè kukudimuka

bwa kutangila, nenku kuulu aku lwa pankaci paa mucu awu pavwa mvunda mukwabo, mukwate mu mucu awu mwikale unyunguluka unyunguluka, mwikale unyungisha mabeji awu. Ee, mêmè ncyakeelaku meeji a cintu kampanda cya cikemesha pa bwalu abu to bwalu mu ciine cikondò aci cya cidimu, mu movù wa automne, mona's, mvunda ya nanku ivwa anu yenza kulwa. Tukese. . . Tutu tuyibiikila ne "mvunda." Nenku yôyi—nenku yôyi itu ijuula lupwishi. Nutu nukaadi bayimonemone mushindu awu mu cipeela. Ncintu cimwecimwe aci. Ke mêmè kujooja, kadi kaciyi cilekela to. Bu pa ciibidilu citu anu lupeepe lutuuta musangu umwe nanku awu, pashiishe lùya, kadi eci cikaavwa cishaale muntwamu tusunsa tubidi anyi tupite apu.

⁶⁷ Ee, mêmè kwasa kabidi lwendu ngenda ndonda kajila. Ke mêmè kukudimuka kabidi bwa kutapa dîsù. Nenku paalu Cyôci aci kwenza, Dîyi dya muntu dyumvwika ku maci anu mudi dyanyi edi emu, dyamba ne: "Kunu maala, kunu mfwanka, anyi kukooyishiku mubidi webe mu mushindu kana wônsò to. Nekwikale mudimu wa wêwè kwenza pawakola." Mona's, cyakamba kumpa bwôwà bwa lufu! Nudi bafwanyineku kudicinkila muvwa kânà katekete mwa kudyumvwa amu. Mêmè kulekelela tumbekeci atu panshi, e kuya kumbelu ngenda nyeema ne mwanyi mwônsò, ngenda ngela mbila dîyi dyamba kumpata.

⁶⁸ Nenku kuvwa nyoka ya ntòòkà mu citupa aci cya buloba, nyoka's, miikale ne lulengu lwa dikema. Maamu kwelaye meeji ne, bu mûmvwà ngenda ngendela ku mwelelu wa lupangu pâmwäpa dikàsà dyanyi ndikadyate ntòòkà nenku ke yêyè kubanga kungipacila bwa kumpeta. Ke mêmè kumutupikila mu maboko, ngela mbila mikole, mumwele kâpa ne mumuupukile. Ke yêyè kwamba ne: "Mbwalu kaayi, mbakusume kudi nyoka anyi?" Kunkenketaye pambidi pajima.

Mêmè ne: "To, Maman! Kudi muntu mu mucu wawa naka."

⁶⁹ Ke yêyè ne: "Kaa, Billy, Billy! Kolesha mwoyi tûng?" Ke yêyè ne: "Wêwè ukaavwa mwimane kadi kulaala tulu anyi?"

⁷⁰ Mêmè ne: "Tohu's, maamu! Kudi muntu mu mucu wawa naka, Yêyè ke wângambidì ne ncinu maala anyi mfwanka to."

⁷¹ "Kunwa ma-whisky ne—ne bikwabo bintu." Paabi's mvwa nya kafila mâyi ku cyengedi cya maala a kapyä, pa diine dîbà adi menemene. Ke Yêyè awu kwamba ne: "Kunu maala anyi kukooyishiku mubidi webe mu mushindu kana wônsò to." Mbwena kwamba ne masandi, nudi bamanye, nenku mwanaanyi. . . ku bunsonga bwanyi ne bakaji. Nenku ku dyanyi dimanya, ncitu musangu wanyi nansha umwe mupeteku dipiila dya bwalu abu to. Mukalenge utu munkwacishe ku bintu abi, ne bu mûndì ntungunuka nenujandule bwalu abu. Ke mwaba awu ne: "Kunu maala anyi kunu mfwanka, anyi kukooyishiku mubidi webe to, bwalu nekwikale mudimu wa wêwè kwenza pawakola."

⁷² Ee, mêmè kucyambila Maman, ke—ke yêyè kunseka anu cyanaana. Nenku mvwa anu ntudika ne mwadi. Yêyè kubiikidisha ngangabuka, ke ngangabuka ne: “Ee, cidiye naaci ndibinduluka cyanaana, kwajiki.” Ke maamu kundaadika mu bulaalu. Ke mêmè, kubangila anu diine dituku adi too ne ku leelu, nciitu mupicileku kabidi ku mwine mucu awu to. Mvwa ngumvwa bwôwà. Nkaavwa mpwekela anu ku luseke lukwabo lwa lupangu, bwalu mvwa anu ndyambidila ne kuvwa muntu kuulu kwa mucu aku ne Yêyè awu ke uvwa wakula naanyi, Diyì dinene dya panshi dyakaakula adi.

⁷³ Nenku pashiishe cintu bu cya ngondo mujima paanyima paa cyôcì aci, mvwa nnaya mààbî ne baakunyi baanyi baa balume, pambelu mu bulà bwa kumpala kwa nzubu. Ke dyakamwe mêmè kuumvwa cintu cya pabwaci pambidi. Ke mêmè kwimanyika kadi kuya kasômba ku luseke lwa mucu. Nenku tuvwa anu ku mwelelu menemene wa Musulu wa Ohio. Ke mêmè kupwekesha mêsù kutangila lwa ku Jeffersonville, ke mêmè kumona cilamba cijuuuka cikosolola mwaba awu, pa musulu awu, ciya too ne dyamwamwa dya musulu. Ke mêmè kumona bantu dikumi ne basambombo (mêmè kubabala) bakuluka muntwamu bafwa mu musulu awu. Mêmè kubwela mu nzubu lubilu kwambila maamu, kadi yêyè kwelaye meeji ne mvwa mulaale tulu. Kadi baakalama bwalu abu munda, nenku paakapita bidimu makumi abidi ne bibidi kubangila pa dîbà adi cilamba cya Municipal Bridge cîdiku mpindyewu eci (cya bwena citu bààbûngî beenu basabukilapu aci panudi nusabukila mwaba awu) cyakakosolola musulu awu kaaba kamwekamwe aku, ne bantu dikumi ne basambombo kufwabo pavwabo biibaka cilamba aci bwa kucifikisha dyamwamwa dya musulu.

⁷⁴ Kacituku cyanji kupangila bwa kwikala cilelela menemene to. Anu bu munudi nuCimona mwaba ewu mu dibalaasa emu, Citu anu nanku dîbà dyônsò.

⁷⁵ Mpindyewu, bavwa beela meeji ne mvwa anu mubinduluke cyanaana. Byôbî biine, mêmè ntu muntu mubinduluke, aci ncilelela. Kabidi, nwênù baswe kutangila bîmpè, bantu badi—badi batambe kwina mina ku maalu a nyuma batu anu babinduluke.

⁷⁶ Tangilaayi beedi baa tusala ne baprofeta. Tangilaayi William Cowper udi mufunde musambu udi mwende luumu awu wa ne: “Kudi mpokolo mûle ne Mashi, makoka mu mijilu ya Emanuwele.” Nukaadiku . . . Nutu bamanye musambu awu. Mvwa mwimane ku lukita lwende kî nkwanji kwenza ntanta mule to. Mwaneetu Julius, ngela meeji, ncyêna mumanye to, to . . . eyo, ncyà bushuwa, uvwa neetu kuntwaku ku lukita lwende aku. Nenku—nenku kuntwaku, paanyima paa yêyè mumane kufunda musambu awu, disonsodiibwa kuumumuka, kubangaye ukaadi wenda ukeba mu—musulu wa kudylaye bwa kudishebeya. Nudi numona, Nyuma ngukaavwa mumuumuke.

Nenku bantu bu mudi beedi baa tusala ne bafundi ne. . . anyi kî. . . ndi nswa kwamba baprofeta.

⁷⁷ Tangilaayi Eliya, paakiimanaye pa mukuna kubiikidishaye mudilu mu dyulu ne kubiikidishaye mvula mu dyulu. Pashiishe paalu Nyuma kumuumuka, s'wakanyeema ku dimukanyina dimwepele dya muntu mukaji. Ke Nzambi kumusangana ukaadi mudikokele mu nyongolo, paanyima paa matuku makumi anaayi.

⁷⁸ Tangilaayi Yona, ne disonsodiibwa dikumbane pavwa Nzambi mumulaabe bwa kuyiishaye mu Niiniwa mwamwa, mu mushindu wa ne—wa ne cimenga cya bunene bwa St. Louis ewu baakanyingalala bavwale mifuku ya nsaka. Kadi pashiishe paalu Nyuma kumuumuka, cyakamwenzekela ncinyi? Tukaadi tumusangana ku mutu wa mukuna pakaavwa Nyuma mumane kumuumuka, ulomba Nzambi bwa amushipe. Nenku, nudi numona's, ndisonsodiibwa. Nenku padi maaluu aa enzeka, bidi—bidi bikwenza cintu kampanda.

⁷⁹ Pashiishe ndi mvuluka pângààbangi kukola. Mêmè kulwa nsongalume. (Nêndwijakajè bwa mmone mwa kucijikija mu katanci kakese kadi kalonda aka.) Pângààlu nsongalume mvwa ne mmwenenu anu mùtù nsongalume yònsò eyi. Mvwa. . . nya mu kalaasa, mpeta bansongakaji abu. Nudi bamanye, mêmè mvwa ne kudiciina kwa dikema, nudi bamanye. Ke ndekeelu wa byònsò mêmè—êmè kupeta mulunda mukaji. Nenku anu bu bânà baa balume bònsò baa batekete aba, baa bidimu bitwe ku dikumi ne bitaanu aba, ngela meeki. Nenku—nenku ewu, kaa, uvwa mulenga be. Ekelekele, uvwa ne mèsù bu a nyuunyi wa nkuci, ne mènù bu masanga, ne nshingu bu wa ntuubà, kadi uvwa yèyè—yèyè mwine mulenga be.

⁸⁰ Nenku kansongalume kakwabo, yèyè. . . tuvwa balunda, ke kwangataye kashinyi kaa kale kaa tatwèndè kaa Ford modèle T, nenku twètù kupunga dîyi bwa kupatuka ne nsongakaji yetu ayi. Nenku tuvwa ne cya kupatuka naabo, mu kashinyi aku. Tuvwa ne mfranga mikumbane bwa kusumba gallons ibidi [litres 8] ya kasoloonyi. Bivwa bikengela twètù kwambulula lukata lwa nyima lwa kashinyi aku bwa kukatemesha ne manivelle. Ncyèna mumanye ne nutu bavuluke ciine aci anyi kanwena bavuluke, bwa nwènù kumanya's, kukatemesha ne manivelle. Kadi tuvwa—tuvwa tuya anu bîmpè.

⁸¹ Nenku mêmè mvwa ne ndambu wa bicycle mu mpaaya, ke twètù kwimana pa kaaba kakwabo kakese bwa kupeta. . . mvwa mushindu wa kupeta sandwich mujima mwela munyinyi wa ngulube ku cicyele cimwepele. Mushindu awu, kaa, mêmè's mvwa mubanji, mvwa mwa kuyisumba inaaayi mijima! Nwamonu anyi? Nenku patwakamana kudya sandwiches yetu ayi ne banwe Coca, mêmè kuya kapingaja milangi. Kadi cyavu kunkemesha, ndi mwenze anu mpatuka anyi, (bakaji bakaavwa

babange kujimija ngâsà mu cikondo aci, anyi kujimija bukaji) nkuci wanyi mukese mwine awu uvwa munkaci mwa kunwa mucu wa mfwanka.

⁸² Ee, mêmè kwônso eku ntu misangu yônso ne wanyi mmwenenu pa bidi bitangila mukaji udi unwa mfwanka, ne ncitu mushintulule aci to nansha kakese kuumukila anu ku ciine cikondo aci. Neya bushuwa. Ke cintu cidi citambe kwikala cya ciipanshi cidiye mwa kwenza. Ke bushuwa bwa menemene mbwabu. Ke mêmè—mêmè kudyambidila ne mvwa... Mpindyewu, cyapu cya mfwanka ncifwanyine kulumbatangana naanyi bwa bwalu ebu, kadi, nyawu nwwambila, cidi anu ndiyele dya dyabulu. Ke mushipyanganyi ne munyangakaji wa mutambe bunene udi ditunga edi dipete nyêye awu. Ndi mufwanyine kwitabaku bwa mwanaanyi wa balume kwikalaye mukwaciki wa maala pamutu paa kwikalaye munu wa mfwanka. Ke bulelela mbwabu. Ndi mufwanyine kwitabaku bwa mukajaanyi ikale mulaale panshi, mukwacike maala, pamutu paa mêmè kumumona ne mucu wa mfwanka. Mushindu awu ke udi . . .

⁸³ Mpindyewu, Nyuma wa Nzambi udi naanyi ewu, piikalabi ne ke Yêye awu Nyuma wa Nzambi (mûdi mufwanyine kwela lukonko lwa mpata), wêwè munu wa mfwanka newikale ne dyakalenga dikese menemene pawafika kwaka, bwalu aci cidi anu . . . misangu yônso. Nutu numona bwalu abu pa cibumba cya cyambilu apa, mushindu udiYe ucipiisha. Neintu cidi cyenza bwôwà. Nudisake kule naaci. Nwênù bainâbânzà, pawikala ukaadi mupiile mu bwalu abu, bu wêwè mwa kuswa, mu Dîna dya Kilisto, epuka cintu aci! Cidi cinyangakaja bukole bwebe bwa mubidi. Necikushipe. Neci- . . . Nka—nkansere ku bûngi bwaku.

⁸⁴ Bangangabuka's batu bateeta bwa kunudimwija. Kadi pashiishe mushindu mwine udibo mwa kunusumbisha biine bintakanyi abi's we! Bu wêwè mwa kupweka kuya ku cisumbishidi cya manga wamba ne: "Sumbaayi. . . Ndi njinga kusumba kansere kaa mushinga wa bicyele makumi ataanu." Mona's, s'mbafwanyine kulwa kubeela mu buloko. Kadi paudi usumba mfwanka wa mushinga wa bicyele makumi ataanu, cidi anu ncintu cimwecimwe aci cyûdi usumba. Ke mudi bangangabuka bamba. Kaa, edi ditunga didi dîzûkilà mfranga edi. Mbibi be. Ncishipyanganyi. Bikaadi bicijaadikiibwe.

⁸⁵ Ee, pângâakamônà kânà kaa bakaji bulengaku aku kiikale kadifyela, ne mucu wa mfwanka awu mu cyanza, bwalu abu bwakamba kunshipa, bwalu mvwa mundamunda mumunange anu cya bushuwa. Ke mêmè kudyambidila ne: "Ee . . ."

⁸⁶ Mpindyewu, batu banginyike ne ndi "mukinyi wa bakaji," nutu bamanye aci, bwalu ntu misangu yanyi yônso mwikale ndwishangana ne bakaji mu mushindu kampanda, kadi ncitu ndwishangana ne nwênù Bânà beetu baa bakaji to. Cîndi mêmè

ndwishingana naaci mmushindu udi bakaji baa cyena leelu aba benza maaluu. Ncya bushuwa. Bivwa bikengela kutwabo bakaji bîmpè nyama ku mikolo.

⁸⁷ Kadi ndi mwa kuvuluka muvwa cyengedi cya maala cya taatu ciikale citambula kuntwaku, bivwa bikengela mêmè kwikala kuya kuntwaku ne mâyi ne bikwabo, mmona muvwa nsongakaji kayiyi nanshà ne bidimu dikumi ne mwandamutekete, dikumi ne mwandamukulu, biikale kuntwaku ne balume baa bukole bûnkaadi mpindyewu ebu, bakwacike. Nenu bivwa bikengela bôbô kwenzabo ne ku mèsu kubatenduke pa kubapa café kafiike, bwa kwalukilabo ku mbanza yabo bwa kwipikilabo baabayaabo byakudya bya diloolo. Kaa, cintu cya mushindu awu, mvwa ngamba ne: “Ndi. . .” Dyanyi dîyi dya kadyuwu cikondo aci divwa ne: “Kî mbakumbanyine dizaji dîmpè disukula bwa kubashipa naadi to.” Ncya bushuwa. Ne mêmè mwine mvwa nkina bakaji. Ncya bushuwa. Nenu bikengela ngikale ntabaleela kantu kônso mpindyewu, bwa kubenga kwikala anu ndyambidila cintu cyôci cimwecimwe aci.

⁸⁸ Nanku, kadi mpindyewu, mukaji mwîmpè ndisanga dya mushinga mukole ku cifulu cya butumbi cya mulume. Bivwa bikengela bamupe luumu. Yêyè. . .Maamu wanyi mêmè’s mmukaji, nansha mukajaanyi, kabidi mbalenga kwîsù. Kabidi ndi ne binunu bya bânà beetu baa bakaji beena Kilisto bândi mêmè ewu nneemeka bikole. Kadi bu bôbô–bôbô mwa kuneemeka cidi Nzambi mubénzè aci, buumaamu ne buumukalenge–mukaji bwa bushuwa ebu, abi’s mbîmpè. Yêyè udi cimwe cya ku bintu bitambe bwîmpè byakapabo mulume kudi Nzambi, mmukaji wa nzubu. Pa kuumusha lupandu, mukaji wa nzubu ke cintu cidi citambe bwîmpè piikalaye mukaji wa nzubu mwîmpè. Kadi yêyè kayi mwîmpè to, Solomo wakamba ne: “Mukaji mwîmpè ndisanga dya mushinga mukole ku cifulu cya butumbi cya mulume, kadi wa—wa bilumbu anyi udi kayi mwîmpè mmâyi mu mashi ende.” Nenu aci ncya bushuwa, ke cintu cidi citambe bubi cidi cifwanyine kwenzeka. Pa nanku mukaji mwîmpè. . .Wêwè ne mukaji mwîmpè wa nzubu, mwaneetu wa balume, bivwa bikengela wêwè kwikala umuneemeka mu mushindu mutambidile. Ncya bushuwa, bivwa bikengela wêwè kwenza nanku. Mukaji wa cya bushuwa! Nenu, nwênù bânà, panwikala ne maamu wa cya bushuwa udi ushaala kumbelu uditacisha bwa kunukuba, ulama bilâmbâ byenu bisukula, unutama mu tulaasa, unulongesha maaluu a Yesu, bivwa bikengela nwênù kuneemeka maamu mukulumpe wa kalolo awu ne byônso bidi munda mwenu. Bivwa bikengela nwênù kuneemeka mukaji awu, eyowa’s, mukalenge, bwalu mmaamu wa cya bushuwa.

⁸⁹ Batu baakula bamba bwa dipanga kulonga didi ku mikuna ya mu Kentucky. Nudi nucimona muneemu mu bintu bya

lukutukutu bifwikakaja ebi. Bamwe baa ku baamaamu bakulampe baa kuntwaku abu mbafwanyine kulwa muneemu mu Hollywood emu kadi kunulongesha nwênù baamaamu baa cyena leelu aba mushindu wa dikolesha bânà beenu balela. Mwanende yêyè awu alukile anu kumbelu bufuku kampana ne nsuki misaluke yônsò, ne mishiku. . . biffinunuka, (nudi nubiiikila bintu abi ne mbinganyi apa?) bilaabu bidibo badilaaba kwîsù abi, ne nkanzu mwikale yônsò ne mifudi lwa ku luseke eku, mupatuke kacya waya bufuku bujima, mukwacike, mwaneetu, uvwa mwa kukosa dimwe dya ku matamba a ku lusongo lwa mucu wa hickory nenku kêna mwa kupatukaku kabidi to. Nyawu nnwambila's, mmufwanyine ku- . . . Nenku nwênù biikale ne ndambu wa byôbì abi bipicidile apu, nuvwa mwa kupeta Hollywood mutambe bwîmpè mu nyungulukilu emu, ne ditunga ditambe bwîmpè. Ncya bushuwa. Mbulelela. "Wâteetaku kwikala wa cyena leelu's," adi—adi's ndimwe dya ku mayele a dyabulu.

⁹⁰ Mpindyewu, kânà kaa bakaji aku, pângākātàngidi, mwoyi wanyi kubangawu anu kumata mashi. Ke mêmè kudyambidila ne: "Kakwacikwetu."

Ke yêyè kwamba ne: "Kaa, udi ukeba mucu wa mfwanka anyi, Billy?"

Mêmè ne: "Bwǎlâ's, inǎbànza." Mêmè ne: "Mêmè ncitu nnwa mfwanka to."

⁹¹ Yêyè ne: "Mpindyewu, wambi ne kutu uja maja." Bavwa bakeba kuya ku dija dya maja kadi mêmè nciyi muswe abi to. Nenku bavwa bamba ne kuvwa maja lwa muntu mwamwa, mwaba uvwabo babiikila ne Sycamore Gardens.

Ke mêmè ne: "To, ncitu nja maja to."

⁹² Yêyè ne: "Mpindyewu, nyawu ne kutu uja maja, kutu unwa mfwanka, kutu unwa maala. Utu uumusha lwebe luteetuku bishi?"

⁹³ Mêmè ne: "Ee, mêmè ntu muswe kuloba ne ntu muswe kutwa buluwà." Abi kabivwa bimusankisha yêyè to.

Ke yêyè ne: "Angata mucu wa mfwanka ewu."

Ke mêmè ne: "Bwǎlâ's, inǎbànza, twasakidila. Ncitu nnwa mfwanka to."

⁹⁴ Nenku mvwa mwimanyine pa ditama dya mashinyi. Kuvwa cidyacilu pa tushinyi twa kale twa Fords atu, panwikala bavuluke, nenku mvwa mwimanyine pa ditama dya mashinyi apu, bu mutuvwa basòmbèle mu nkwaswa wa paanyima, yêyè ne mêmè. Ke yêyè kwamba ne: "Muwǎmbì ne kwèna muswe kunwa mucu wa mfwanka?" Yêyè ne: "Patudi twètù bânà baa bakaji biikale ne dikima bakupite wèwè."

Ke mêmè ne: "Bwǎlâ's, inǎbànza, ncyèna ngela meeji ne ndi muswe kwenza aci to."

95 Yèyè ne: “Mona’s, cilumaacikaji naanyi we!” Ekelekele! Paanyi’s mvwa muswe kwikala Bill munene wa mubi awu, pa nanku ncyà bushuwa ne mêmè—mêmè ncivwa muswe bya bu cilumaacikaji abi to. Nwamonu’s, mêmè mvwa muswe kwikala mwedi wa makofi wa tuyaayi tukamone, ke wanyi mmwenenu nyawu ùmvwà nende pa bivwa bitangila nsòmbelu. Pa nanku mêmè kwamba . . . “Cilumaacikaji! Cilumaacikaji!”

96 Ncivwaku mwa kutwala aci to, ke mêmè kwamba ne: “Mpeeshe mfwanka awu!” Cyanza cyolola, mêmè kwamba ne: “Némuleejè ne ndi cilumaacikaji anyi to.” Mêmè kupatula mucì wa mfwanka awu kadi kubanga kutapisha kaci kaa alameeta. Mpindyewu, ndi mumanye ne nudi. . . Mpindyewu, ncyèna mwambule bujitu bwa binudi nwela meeji nansha, ndi mwambule bujitu anu bwa kwamba bulelela. Pânkaavwà ne ntapishe kaci kaa alameeta aku, mwangate dipangadika dya kunwa mucì wa mfwanka awu anu bu mûndì mupangadike bwa kwambula Bible ewu emu, nwamonu’s, mêmè kuumvwa cintu cyenza ne: “Wuuuusssh!” Mêmè kuteeta kabidi, nciyi mwa kuùfikisha ku mishiku to. Ke mêmè kwasa mwadi, mêmè kwimansha cintakanyi aci panshi. Kubangabo kunseka. Neku mêmè kwalukila mwetu lwa makàsà, mbanda ngenda mpicila mu budimi, kadi kusòmba mwaba awu, mwikale ndila. Neku—nenku civwa nsòmbelu wa bwalu bukole.

97 Ndi mvuluka dituku kampana diwva Papa upweka mutangile ku musulu ne bânà baa balume. Mwaneeu wa balume ne mêmè, bivwa bikengela twangate bwâtù bwa twêtù kwikala tubanda tupweka ne musulu, twenda tukebangana ne milangi ya kwikala kwelamu maala a whisky. Tuvwa tupeta cicyele cimwe bwa milangi dikumi ne ibidi, patuvwa tuyangula ku mwelelu wa musulu. Neku Papa uvwa naanyi, ne uvwa ne umwe wa ku milangi ya mibeetelele ayi. . . Ngela meeji ne ivwa mmilangi iwva ibwela bu cyabibidi cimwe cya pint [centilitres 25]. Neku kuvwa mucì muupuke ne lupeepele, nenku Taatu. . . Neku muntu ewu uvwa nende, Mukalenge Dornbush. Mêmè ke uvwa ne bwende. . . Uvwa ne bwâtù bulenga bwa dikema, nenku mvwa nkeba kumulengeleela bwalu mvwa muswe kwenza mudimu ne bwâtù abu. Buvwa ne ciludiki cîmpè kadi bwanyi kabuvwa nansha ne ciludiki ciine to. Tuvwa anu ne mabaya a kale atuvwa twita naawu. Neku bu yèyè mwa kundekela ngenza mudimu ne bwâtù abu. . . Pa nanku, yèyè nguwva mwenze masoudures ne mwenzele Papa byengedi. Pa nanku yèyè. . . Bòbò kusòmba pankaci paa mucì awu, nenku Papa kwela cyanza mu mpaaya wende wa paanyima ne kupatulaye kalangi kakese kaa whisky, kumupaye ne yèyè kubikula twalà, kwalujilaye Papa ne yèyè pende kubikula twalà, ke kukashikikaye panshi paa kaamutoloku kakese kavwa kapatuke ku luseke lwa mucì awu. Ke Mukalenge Dornbush kukambula, kwamba ne: “Kwata, Billy.”

Mêmè ne: “Twasakidila, mêmè nci tu nnwa maala to.”

⁹⁸ Yèyè ne: “Branham wetu ewu, kuyi unwa maala?” Yònsò wa kudibo wakafwa ne bikumba ku makàsà, pamwe ne bònsò. Ke kwambaye ne: “Branham wetu ewu, kuyi unwa maala?”

Mêmè ne: “To, mukalenge.”

“To,” ke Papa awu, “mêmè’s ndi mukoleshe cilumaacikaji.”

⁹⁹ Papa wanyi mêmè umbiikila mêmè cilumaacikaji! Mêmè ne: “Twala mulangi awu!” Ke mêmè kukangula cijiku civwa ku mushiku wa mulangi aci, ne dipangadika dya kuànwa, kadi pânkaavwà ne ngatonkwele mukana: “Wuuuussssh!” Mêmè kupingaja mulangi kadi kuvukuta lubilu ne mwanyi mwònsò mwikale mpwekela mu budimi, ngenda ndila mwadi. Cintu kampana kacivwa mwa kundekela ngenza cyôci aci nansha. Nwamonu anyi? Ncyèna mufwanyine kwamba ne ndi mwîmpè to (nkaavwa anu mumane kwangata dipangadika dya kuànwa), kadi n’Nzambi, ngàsà, ngàsà udi ukemesha ke uvwa umpangisha bwa kwenza bintu abi. Mêmè mvwa muswe kubyenza, mêmè mwine, kadi Yèyè nguvwa kayi mwa kundekela mbyenza to.

¹⁰⁰ Paanyima ke mêmè kulwa kupeta mwânà wa bakaji pânkaavwà ne bidimu bitwe ku makumi abidi ne bibidi, uvwa mulenga be. Uvwa mmwânà wa bakaji uvwa uya mu ekeleeziya, wa ba-Luthériens baa cyena-Allemagne. Dyende uvwa Brumbach, B-r-u-m-b-a-c-h, dyumukila ku dîna dya Brumbaugh. Uvwa mwânà wa bakaji mwîmpè maalu. Kavwa unwa nanshà maala nanshà mfwanka to, anyi—anyi mene kavwa uja maja anyi cinyi to, mwânà wa bakaji mwîmpè maalu. Mêmè kwendakana nende ndambu wa cikondo, ne mvwa mwa . . . Cikondo aci, ne bidimu bitwe ku makumi abidi ne bibidi, mvwa mupete mfranga mikumbane mu mushindu wa kusumba ne mashinyi a kale kaa Ford, ke mêmè . . . tuvwa tupatuka pamwe mutuvwa tupunga dîyi. Nenku, mu cikondo aci, kakuvwa ekeleeziya wa ba-Luthériens pabwîpi to, bôbô bakaavwa bamwangale buumuke mu Howard Park baye mwamwa.

¹⁰¹ Pa nanku bavwa . . . mwambi kampana, wa bwana wânkanjidila mu bwambi mu église Baptiste Missionnaire, Docteur Roy Davis. Mwaneetu wa bakaji Upshaw, mwine wâkatûma Mwaneetu Upshaw kûndi, anyi wâkayiikila nende bwa bwalu bwanyi awu, Docteur Roy Davis. Nenku yèyè uvwa uyiisha, ke kupetaye Première église Baptiste, anyi kudi—kudi . . . Ncyèna ngela meeji ne civwa Première église Baptiste to, anyi, civwa m’Mission- . . . bamubiikila église Baptiste Missionnaire mu Jeffersonville. Nenku yèyè nguvwa uyiisha mwaba awu mu ciine cikondo aci, nenku tuvwa mwa kuya mu ekeleeziya mu diloolo, nenku . . . nenku tuvwa mwa kwalukila. Nenku ncyakashaalaku mudishiye mwena ekeleeziya awu kacya to, kadi mvwa anu munange kuyamu nende. Bu muvwabi ne

cìvwà ne bwalu mu meeji aanyi civwa mbwa “kwikala kuya nende,” bikengela ngikale ne meeji matooke.

¹⁰² Nenku mu diya nende amu, dîngà dituku mêmè... Yêyè uvwa wa mu famiye wa bantu baa maalu mîmpè. Ke mêmè kubanga kudyambidila ne: “Udi mumanye, udi mumanye, kabyena bikengela ngikale njimijila nsongakaji wawa dîbà dyende to. Aci kî—aci kî ncîmpè to, bwalu mmwânà wa bakaji mwîmpè maalu, mêmè paanyi mulanda ne—ne mêmè...” Bukole bwa mubidi bwa wanyi papa bukaavwa bunyanguke, nenku mêmè—mêmè... Kakuvwa mushindu wa mêmè kupetela mwânà wa bakaji bu yêyè awu nsòmbelu to, yêyè ukaavwa mwibidile kwikala mu nzubu mulenga ne tapis myela panshi.

¹⁰³ Ndi mvuluka tapis wa kumpala ûngààkamònàku, ncyakamanya ne civwa ncinyi to. Ngâkendela kumpenga kwende. Ngâkadyâmbidila ne ke cintu civwa citambe bwîmpè cînkaavwâku mumone kacya bandela. “Mmunyi mudibo mwa kwadija cintu bu cyôci cyacya panshi?” Ke tapis wa kumpala ûngààkamònàku kacya. Uvwa—uvwa umwe wa... Ndi ngela meeji ne batu bamwinyike ne “tapis wa cyâtà.” Ndi mwa kucibiikila bibi. Mushindu kampanda wa “nkodi” anyi cintu kampanda cidibo balukakaje, nenku ciikale cyadija panshi. Ciikale cya diikala dya mâyi a matamba ne dikunze, ne bilongo binene bya rose bizola lwa munkaci amu, nudi bamanye. Civwa cintu cilenga kumona.

¹⁰⁴ Nenku ndi mvuluka ne ngâ—ngâkangata dipangadika dya ne anyi mvwa mmwasa bwalu bwa dimusela, anyi mvwa ne cya kubilekela bwa kushiila muntu kampanda mwîmpè amusele yêyè, muntu uvwa mufwanyine kwikala mwîmpè kudiye, mufwanyine kumupetela nsòmbelu ne mufwanyine kwikala ne musangeelu kudiye. Mêmè mvwa anu mufwanyine kwikala ne musangeelu kudiye, kadi m—m—mvwa mpeta bicyele anu makumi abidi cyanaana ku dîbà dimwe. Pa nanku ncivwa mufwanyine kumupetela nsòmbelu wa mwîmpè menemene to. Ke mêmè... Ne famiye mujima awu uvwa ukengela bwa twètù kwangata mu byanza awu, ne bukole bwa mubidi bwa Papa bukaavwa bunyanguke abu, nenku bivwa bikengela mêmè kubatacila bônso abu, nenku mvwa nsanganyiibwa mu kantu kaluka.

¹⁰⁵ Ke mêmè kudyambidila ne: “Ee, cintu cimwepele cidi cikengela mêmè kwenza nkumwambila ne ndi—ndi... yêyè... ne ncyâ—ncyakwalukilaku cyanyima to, bwalu mvwa mmwelela meeji àbûngì be bwa ncilu kumunyangila nsòmbelu ne kumulekela utatakana naanyi mêmè.” Ke mêmè kudyambidila ne: “Bu muntu mwa kumwangata ne kumusela, kumupetela dîkù dilenga. Ne pâmwâpa bu mêmè mwa kupanga mushindu wa kumwangata, ndi mufwanyine—ndi mufwanyine kumanya ne yêyè udi mu disanka.”

¹⁰⁶ Ke mêmè kudyambidila ne: “Kadi paanyi mêmè—mêmè ncyêna—mêmè ncyêna mwa kumulekelaku nansha!” Nenku mêmè—mêmè kwikala mu mushindu wa bwalu bukole. Ke kwenza ku dituku ne ku dituku ngelangana anu meeji pa bwalu abu. Nenku mvwa mutambe kulaala mashi be bwa kumwasa bwalu bwa dimusela. Diloolo dyônsò mvwa anu mwa kwangata dipangadika ne: “Ndi nya kamwasa bwalu.” Kadi, mêmè piine apu, hee, ncinyi ciine aci, bibeyibeyi, anyi bintu kampanda byûdi upeta mu mutù...? Nwênù bânà beetu baa balume aba pâmwâpa nuvwaku peenu bapete dilabula dyôdi dimwedimwe adi mu maalu awu. Kadi cintu cya lukutukutu menemene cîmvwâ ngumvwa, mumpala mvwa munteema mudilu’s. Nci—ncivwa mumanye to. Ncivwaku mwa kumwasa bwalu to.

¹⁰⁷ Pa nanku nudi nudikonka ne ngâkafika mene ku diselangana bishi. Nudi bamanye? Mêmè kumufundila mukanda bwa kumwasa bwalu. Ke yêyè...Mpindyewu, kabivwa bya ne “Nsongakaji munanga” to, bivwa ndambu (nudi bamanye) biye ku bwalu bwa dinanga kutamba aci. Kacivwa anu dyu—dyumvwangana to, civwa...Mvwa—mvwa muwufunde, ne dyanyi dimanya dyônsò.

¹⁰⁸ Kadi mvwa ndambu ne bwôwà bwa mamwëndè. Mamwëndè uvwa...uvwa mwenze bu udi ne maalu makole. Nenku, kadi tatwëndè uvwa mukulumpe mwena Hollande wa kale wa musangeelu, mukulumpe mwikale anu wa maalu mîmpè. Yêyè ke uvwa mwashi wa kasumbu kaa beena mudimu, beena mudimu baa ku kawulu, pa njila wa njanja, mwikale upeta ndola mitwe ku nkama itaanu ku ngondo mu biine bikondo abi. Kadi mêmè mpeta bicyele makumi abidi ku dîbà, bwa mêmè kusela mwaneta. Hee! Mvwa mumanye ne aci kacivwa mwa kukumbanaku to. Ne mamwëndè mwine pende uvwa mutambe kwikala...Mpindyewu, yêyè utu inâbânzà wa maalu mîmpè. Kadi u—uvwa mu mushindu kampanda umwe wa ku bakaji baa milongo ya kuulu, nudi bamanye, ne mwenze wa kayi muswe bilele to, nudi bamanye, nenku kavwa kummona menemene ne dikwacisha to. Mêmè mvwa anu mwânà wa balume wa mfwalakasa wa kale wa ku musoko wa kayi udyangana mukana to, nenku uvwa yêyè wela meeji ne bivwa bikengela Hope kuyaye ne mwânà wa balume wa nsômbelu mwikale ndambu mubande, mêmè—mêmè—mêmè ndi ngela meeji ne uvwa mubinge. Nenku ewu...Kadi mêmè—mêmè ncivwa nkwelela meeji ciine cikondo aci to.

¹⁰⁹ Pa nanku mêmè kudyambidila ne: “Ee, mpindyewu, ncyêna mumanye mushindu wa dibyenza to. Ncyêna—ncyêna mwa kwasa papa wende bwalu to, ne mêmè mwine ndi—ndi mutwishiibwe ne ncyakwasa mamwëndè to. Nenku bikengela mmwase yêyè kumpala.” Ke mêmè kufunda mukanda. Nenku mu dinda adi mu njila wa ku mudimu, mêmè kuwela mu kasheete kaa mikanda. Mikanda...Tuvwa tuya mu ekeleeziya mu diisâtù

diloolo, kadi tuvwa mu dimwe mu dinda. Mvwa muteete dituku dijima dya dyalumingu bwa kumwasa ne mvwa njinga kubwela mu dibaka, kadi nciyi mwa kupeta dikima dikumbane to.

¹¹⁰ Pa nanku mêmè kuwela mu kasheete kaa mikanda. Nenku ku mudimu dituku adi kwenzekabi ne ndyãmbidilè ne: “Amba tũng mwavwa mamwëndè kulwa kutwa cyanza pa mukanda awu?” Ekelekele! Mêmè kuumvwa ne ngabwelakanyi bu—bu yêyè anu mwa kuwutwa cyanza, bwalu kavwa yêyè ungelelaku mêmè meeji a bushuwa to. Ee, kadi ke mêmè kufwa naayi aku’s.

¹¹¹ Nenku mu diisâtù adi diloolo pângààkafikà, kaa, ekelekele, mêmè kudyambidila ne: “Kwine kwaka nênkùbàndè bishi’s? Mamwëndè yêyè anu mudidinge mutwe cyanza pa mukanda awu’s yêyè neangenze cyesu, cibi ndi ntekemena ne mmuwupete.” Mêmè mvwa muwufundile “Hope.” Ke dinà dyende ndyôdì adi, Hope. Ke mêmè ne: “Bwa apa nêngùfundilè anu Hope.” Nenku ewu. . . Nenku mêmè kudyambidila ne bidi anu mwa kwikala byenzeke ne kiikadi mutwepu cyanza to.

¹¹² Nenku mvwa ne dimanya dya ne kabivwa bikengela mêmè kwimanyina pambelu kadi kwela mpungi bwa kupatukaye to. Ekelekele! Nenku mwànà wa balume yònsò udi kayi ne dikima dikumbane bwa kuya tamakatamaka too ne kumbelu ne kukookola ku ciibi bwa kukonka mwànà wa bakaji, kêna ukumbana kupatukaku nende to nansha bya munyi. Ncya bushuwa menemene. Aci’s ndikutakana. Aci’s ndishaadila.

¹¹³ Ke mêmè kwimanyika kashinyi kaanyi kaa kale kaa Ford aku, nudi bamanye, mvwa mukalaabishe mukubu pambidi pajima kashaale kakenka. Ke mêmè kuya kukookola ku ciibi. Luse’s we, mamwëndè ke kulwa ku ciibi! Mêmè kupanga mwa kukwata mupuuya wa munda, mêmè ne: “We—we—wetwawu, Mandamu Brumbach!” Eyo.

¹¹⁴ Yêyè ne: “Wetwawu, William.”

Ke mêmè mundamunda ne: “Kaa-kaa, ‘William!’”

Ke—ke yêyè ne: “Bwela’s?”

¹¹⁵ Mêmè ne: “Twasakidila.” Mêmè kubwela mu nzubu. Mêmè ne: “Hope ukaadi mudilongolole anyi?”

¹¹⁶ Nenku anu piine apu ke Hope ulwalwa mu nzubu ewu wenda utupika, kânà kaa bakaji kaa bidimu dikumi ne bisambombo cyanaana. Ke yêyè ne: “Wetwawu, Billy!”

¹¹⁷ Ke mêmè ne: “Wetwawu, Hope.” Ke mêmè ne: “Ukaadi mudilongolole bwa kuya mu ekeleeziya anyi?”

Yêyè: “Indila katanci kakese cyanaana.”

¹¹⁸ Mêmè kudyambidila ne: “Ekelekele! Kî mmuwupeteku to. Kî mmuwupeteku to. Mbîmpè, mbîmpè, mbîmpè. Ne Hope mwine pende kî mmuwupete to, nanku nebiikale bîmpè, bwalu nunku mmubungase.” Ke mêmè kudyumvwaku bîmpè.

119 Nenukũ pãngãàakapwekà ku ekeleeziya, kwenzekabi ne ndyãmbidilè ne: “Amba tũng nè mmuwupete?” Nwamonu anyi? Nenukũ nciyi mwa kuumvwa bivwa Docteur Davis wamba to. Mêmè kumwosha dísù, ndyambidila ne: “Pãmwãpa yèyè nî mmuwulame, nenukũ neangambe maalu makole pãngãàpàtukà mwaba ewu, ne dimwasa dya bwalu abu.” Nenukũ ncivwaku mwa kuumvwa bivwa Docteur Davis wamba to. Ke—ke mêmè kumwosha dísù, kudyambidila ne: “Ekelekele, bingenza bibi ku mwoyi bwa kumulekela, kadi . . . Nenukũ mêmè—mêmè . . . bwa diteetangana dya makanda’s didi ne cya kulwa bushuwa.”

120 Nenukũ paanyima paa disangisha ke twètù kwasa lwendu cyapamwe twenda tupweka ne müsèèsù, batangile kumbelu, ke—ke twètù kuya too ne ku Ford wa kale awu. Nenukũ dîbà dyònsò adi ngondo uvwa anu mukenkeshe bikole, nudi bamanye, mmutangila e kumona mwikale mulenga be. Balumyana, ke mêmè kutapa dísù kudiye, kudyambidila ne: “Kelekele, mushindu mwine ûndì njinga bwa kumupeta, kadi ndi ngela meeji ne ncyèna mwa kumupeta to.”

121 Ke mêmè kudyanjila ndambu, nudi bamanye, ntapa kabidi dísù kudiye. Mêmè ne: “Udi muumvwe bishi—bishi diloolo edi?”

Yèyè ne: “Kaa, mêmè’s ndi bîmpè.”

122 Nenukũ twètù kwimanyika Ford wa kale awu kadi kubanga kupatuka, nudi bamanye, tunyungulukila ku luseke aku, tunyungulukila lwa ku ditumba kadi kuya batangile ku nzubu wabo. Nenukũ mvwa ngenda nya nende batangile ku ciibi. Mêmè kudyambidila ne: “Udi mumanye, pãmwãpa kî mmupeteku mukanda awu to, nanku mbipiciibwe ne mêmè mubipwe mene mwoyi. Byôbi biine nêmpetè anu lumingu lukwabo lwa ngâsâ.” Ke mêmè kubanga kudyumvwaku bîmpè ndambu.

Yèyè ne: “Billy?”

Mêmè ne: “Yè.”

Yèyè ne: “S’ngaapeci mukanda webe awu.” Ekelekele!

Mêmè ne: “Wawupeci?”

123 Yèyè ne: “Uh-huh.” Ee, ke kutungunukaye anu ne kwenda kuya, kayi wambaku diyì dikwabo to.

124 Ke mêmè mundamunda ne: “Mukaji, ngambila’s bwalu. Anyi ungi pate anyi ungambile mùdì wela meeji bwa bwalu abu.” Ke mêmè kwamba ne: “Udi—udi muwubale anyi?”

Yèyè ne: “Uh-huh.”

125 Ekelekele, nudi bamanye mùtù muntu mukaji mwa kukulama mwoyi kuulukuulu amu. Kaa, mêmè—mêmè ncivwa nswa kwamba menemene mushindu awu to, nwamonu’s. Nwamonu anyi? Kadi, nansha nanku, nudi bamanye, mêmè—mêmè kudyambidila ne: “Mbwa cinyi kuyi wambaku bwalu?”

Nwamonu's, nenku mêmè kutungunuka anu ngenda nya. Mêmè kwamba ne: "Udi muwubale wònsò anyi?"

Ke yêyè... [Katupa kaa mukaba wa mêyi munda mutupu—Muf.] "Uh-huh."

¹²⁶ Nenku tukaavwa anu lwa pabwîpi ne ku ciibi, ke mêmè kudyambidila ne: "Kaa, kuyi naanyi too ne mu lutanda to, bwalu mbifwanyine kwenzeka ne ncipeci mwa kubapita ku lwendu, nenku ngambila mpindyewu." Ke mêmè kushaala mwindile.

¹²⁷ Ke yêyè ne: "Billy, ndi munange kwenza nanku." Yêyè ne: "Ndi mukunange." Nzambi abeneshe musuuka wende mpindyewu, ukaadi mu Butumbi. Yêyè ne: "Ndi mukunange." Yêyè ne: "Ngela meeji ne bivwa bikengela kwambila muledi wetu... baledi beetu. Kwêna wela meeji nanku anyi?"

¹²⁸ Mêmè ne: "Munanga wanyi, teelesa, tubange bwalu abu biikale tubwabanyangana nzevu mwongo." Mêmè ne: "Mêmè nêngâmbilè papa webe pawikala mwa kwambila mamwêbè." Mmushiila luseke lwa lubi menemene alu, byôbi biine.

Yêyè ne: "Mbîmpè, pawikala mwa kwambila wêwè Papa kumpala."

Mêmè ne: "Mbîmpè, nêmmwambilè mu dyalumingu diloolo."

¹²⁹ Ke dyalumingu diloolo kulwadi, mêmè kulwa kumwaluja kumbelu patuvwa tufumina mu ekeleeziya nenku ke mêmè... Kushaalaye kacya wantangila. Nenku dya ntangila, tukaavwa dîbâ citeema ne tusunsa makumi asatu, dîbâ dikaavwa dikumbane bwa mêmè kwasa lwendu kuya. Nenku Charlie uvwa musòmbè ku birô byende, utuuta mikanda ku mashinyi. Ne Mandamu Brumbach musòmbèle mu ditumba, mwikale bu uvwa uluka bupilu nanku awu, nudi bamanye, anyi tuntu tukese twa bijengu tutubo baadija pa bintu kampanda, nudi bamanye. Ncyêna mumanye ne nutu nutubiikila ne ntunganyi to. Nenku uvwa munkaci mwa kwenza tumwe twa ku tuntu atu. Ke Hope kushaala anu kacya wantangila, nenku uvwa wenza kungosha disù dya kayi musanke to, nudi bamanye, umfunkwina tatwèndè. Ke mêmè... Ekelekele! Mêmè kudyambidila ne: "Kadi bu yêyè mwa kwamba ne: 'To'?" Ke mêmè kwasa lwendu mutangile ku ciibi, mêmè ne: "Ee, ngela meeji ne bikengela nye's."

¹³⁰ Ke mêmè kuya mutangile ku ciibi, ne—ne yêyè pende kwasa lwendu mutangile ku ciibi pamwe naanyi. Uvwa misangu yònsò mwa kulwa ku ciibi bwa kungamba ne "diloolo dilenga." Ke mêmè kuya mutangile ku ciibi, ke yêyè ne: "Kucyena umwambila kabidi?"

¹³¹ Ke mêmè ne: "Huh!" Mêmè ne: "Ncyá bushuwa ne ndi nteeta bwa kucyenza, kadi ndi—ndi—ndi mupange too ne mushindu mwine wa kucyenza's."

132 Ke yêyè ne: “Ndi ngalukila nenku wêwè umubiikidile pambelu.” Ke kwalukilaye kadi kunshiya mêmè mwimane mwaba awu.

Ke mêmè ne: “Charlie.”

Kukudimukaye e kwamba ne: “Yě, Bill?”

Mêmè ne: “Ndi mwa kuyiikilaku neebe kakese?”

133 Yêyè ne: “Eyowa’s.” Kukudimukilaye kùndi kadi kwela nyima ku birô byende aku. Mandamu Brumbach kumutapaye dîsù, kutapaye Hope dîsù, kuntapaye ne mêmè dîsù.

Ke mêmè ne: “Udiku mwa kupatukila pambelu lwa mu lutanda emu?”

Ke yêyè ne: “Eyo, ndi mvwila pambelu apu.” Ke kupatukilaye pambelu mu lutanda.

Mêmè ne: “Ncya bushuwa ne edi ndiloolo dilenga, kî mmwômò anyi?”

Ke yêyè ne: “Eyo, mmwômò.”

Mêmè ne: “Ncya bushuwa ne nkwenze luuya.”

“Ncya bushuwa nanku,” kuntangilaye.

134 Mêmè ne: “Ndi mwenze mudimu mukole be,” ngamba ne, “udi mumanye, nansha byanza byanyi mbipete ne bikudi.”

Yêyè ne: “Udi mwa kumwangata, Bill.” Ekelekele! “Udi mwa kumwangata.”

135 Mêmè kudyambidila ne: “Kaa, aci’s cyâpîci ne kulengela.” Mêmè ne: “Udi wambilamu anyi, Charlie?” Yêyè ne. . . mêmè ne: “Charlie, tangila, ndi mumanye ne mmwaneebe, ne wêwè udi ne mfranga.”

136 Ke kwololaye cyanza kunkwata ku cyanyi. Yêyè ne: “Bill, tangila, mfranga kî byônsò bitu mu mwoyi wa muntu nansha.” Yêyè kwamba ne. . .

137 Mêmè ne: “Charlie, mêmè—mêmè ndi mpeta anu bicyele makumi abidi ku dîbà dijima, kadi ndi mumunange ne yêyè pende munnange. Nenku ndi nkulaya, Charlie, ne nênkwaté mudimu too ne piikala ebi. . . bikudi ebi ne mwa kujika mu byanza, bwa kumupetela nsòmbelu mwîmpè. Nêngikalè ne lulamatu kudiye ne mwanyi mwônsò.”

138 Yêyè ne: “Ndi ngitabuuja aci, Bill.” Yêyè ne: “Teeleja, Bill, ndi muswe nkwambile bwalu.” Yêyè ne: “Udi mumanye, disanka, kabyena bikengela menemene anu mfranga bwa kwikala mu disanka nansha.” Yêyè ne: “Ikala wêwè anu bîmpè nende. Ne ndi mumanye ne ke ciwikala.”

Mêmè ne: “Twasakidila, Charlie. Ncya bushuwa ne ke cingenza.”

139 Pashiishe kumushaadilabi yêyê pende bwa kwambilaye Maman. Ncyêna mumanye mushindu wakenzaye to, kadi twâkasèlangana.

140 Nenku, patwakaselangana, katuvwaku ne kantu nansha kamwe to, kantu nansha kamwe bwa kubanza naaku. Ngela meeji ne tuvwa ne ndola ibidi anyi isatu. Ke twêtù kufucila nzubu, utulomba ndola inaayi ku ngondo. Kavwa kazubu kakese kaa kale, kaa tubambalu tubidi. Ke muntu mukwabo kutupaye bulaalu bwa kale bwa dibunya. Ndi ndikonka ne kudi muntu ukaadiku mumone bulaalu bwa kale bwa dibunya? Ke bwakatupabo. Ke mêmè kupweka kuya ku ba-Sears ne ba-Roebucks e kusumba kaameesa kakese ne nkwasana inaayi, kaa bwalu kakayi—kakayi kalaaba mukubu to, nudi bamanye, cibi twêtù kubipeta anu pa dîbà. Ke pashiishe mêmè kuya kwa Mukalenge Weber, musumbishi wa bintu bya maalu mantonde, mêmè kusumba difuwa dya kwipikila. Ngâkafuta bicyele makumi mwandamutekete ne bitaanu bwa dyôdi adi, ne ndola umwepele ne bya mu njila bwa tunshinga twa kwasaku. Twêtù kubanza. Ndi mvuluka ne ngâkangata kaadibeji kaa mitu isatu e kukazola ku nkwasana ayi, pângâakayîpentâ. Nenku, kaa, tuvwa mu disanka, nansha nanku. Twêtù kupetangana ewu upeta ewu ne ewu pende upeta ewu, ke cyônso mene civwa cikengediibwa. Nenku Nzambi, ku ngâsà Wende ne bwîmpè Bwende, twêtù kwikala beena dibaka baa twânâtwânâ bavwa baa disanka ditambidile pa buloba ebuni.

141 Mêmè kujandula ne, disanka kadyena dilaala ku bûngi bwa bintu bya pa buloba byûdi naabi nansha, kadi ku mushindu ûdi ne disanka bwa citupa cidibo bakwabanyine.

142 Nenku, paanyima paa cikondo, ke Nzambi kupweka e kusumba kaadîkù keetu kakese aku, twêtù kupeta mwânâ mukese wa balume. Dînâ dyende uvwa Billy Paul, wa bwena udi mwaba ewu mu disangisha emu mpindyewu mene. Nenku kupita anu kakese kuumukila piine apu, ngondo bu dikumi ne umwe nanku awu, ke Yêyê kutusamba cyakabidi ne mwânâ mukese wa bakaji dyende Sharon Rose, dînâ dyangata ku mwaku ewu wa “Cilongo cya Shalona.”

143 Nenku ndi mvuluka ne dituku dikwabo mvwa mulame mfranga yanyi mwikale njinga kuya bwa kwangataku diikisha dikese, mbanda nya ku mwaba kampanda, ku dijiba dya Paw Paw Lake, bwa kuya kaloba mishipa. Nenku mu dyalukila . . .

144 Nenku mu ciine cikondo eci . . . Ndi ndekela dikudimuna dyanyi dya mucima ku luseke. Nkaavwa mukudimune mucima. Nenku bakaavwa banjidile mu mudimu wa bwambi kudi Docteur Roy Davis, mu église Baptiste Missionnaire, ne nkaavwa mushaale mwambi ne mumane kwikala ne tabernacle ûndi nyiishilamu leelu mu Jeffersonville ewu. Nenku nkaavwa ngenza

mudimu bu mpaasata wa kaakeleeziya kakese aku. Nenku mêmè . . .

¹⁴⁵ Kakuyi mfranga to, mvwa mwenze mudimu bu mpaasata kukaavwa bidimu dikumi ne mwandamutekete nciyi ngangata nansha dyeya to. Ncivwa ngitabuuja mu dyangat- . . . Kamuvwa nansha dilongo dya kusangishila milambu to. Nenku bwa byadikumi bîmvwà mpetela ku mudimu ûmvwà nkwata, ne bikwabo, tuvwa ne kasheete kakese mundekeelu mwa nzubu amu, kamba ne, bafundepu kaacimanyinu kakese ne: “Misangu yônsò yûdi mwenzele umwe wa mutambe bukesa na ku bânâ Baanyi bakese aba, Mêmè ngûdi mucyênzèle.” Nenku mushindu awu ke uvwa ekeleeziya ufuciibwa. Twâkasomba mfranga ya bidimu dikumi bwa kufuta ekeleeziya, kadi twêtù kuyifuta munda mwa bidimu bishaadile ku bibidi. Ne mêmè ncyakangataku mulambu nansha wa mushindu kaayi to.

¹⁴⁶ Nenku mvwa, kaa, ne ndambu wa ndola îmvwà mulame bwa diikisha dyanyi. Yêyè pende uvwa wenza mudimu, ku cyapu civwa cyenza miteelu cya Fine’s Shirt Factory. Mwânâ wa bakaji munanga mulenga wa dikema. Lukita lwende pâmwâpa ndubwikila kudi nêjê leelu ewu, kadi uciidi anu mu mwoyi wanyi emu. Nenku ndi mvuluka paakenzaye mudimu mukole wa dikema bwa kungambulwisha bwa mêmè kupeta mfranga mikumbane bwa kuya ku diine dijiba edi bwa kuloba.

¹⁴⁷ Nenku pânkavwâ mfumina ku dijiba aku, mêmè kubanga kumona, pânkavwâ mbwela mu Mishawaka ne mu South Bend, Indiana, ke mêmè kubanga kumona mashinyi avwa ne mabeji mafunda malamika paanyima, ne: “Yesu Nkaayende.” Ke mêmè kudyambidila ne: “Aci’s cidi cimweka cya pabwaci: ‘Yesu Nkaayende.’” Ke mêmè kubanga kumona mabeji mafunda awu. Nenku avwa myaba yônsò cyanaana ku makalu, ma-Fords, ma-Cadillacs, ne bikwabo ne: “Yesu Nkaayende.” Nenku mêmè kupweka ngenda ndonda amwe a ku ôwò awu, nenku kufikabi too ne ku ekeleeziya munene menemene. Ke mêmè kujandula ne bavwa mbeena Mpenta.

¹⁴⁸ Nkaavwa muumvumvwè bamba bwa beena Mpenta, kadi bavwa musumba wa “bansantu babunguluki baa mu malaba bavwa balaala panshi biikale batuuka ntutu ku mishiku,” ne bintu byônsò byakandondelabo abi. Pa nanku ncivwa muswe kwikala ne bwalu nansha bukesa ne byôbi abi nansha.

¹⁴⁹ Ke mêmè kubumvwa bônsò benza bintu bya lukutukutu muntwamu, ke mêmè kudyambidila ne: “Ngela meeji ne bikengela ngânji kubwelamu.” Ke mêmè kwimanyika kashinyi kaanyi kaa kale kaa Ford ne kubwelamu, ne misambu yônsò yûkaadiku muumvwe kacya baakulela! Ke mêmè kufika ku dijandula ne muvwa ekeleeziya minene ibidi, umwe wayi bamubiikila ne P.A. wa J.C., ne P.A. wa W., bââbûngi beenu mbafwanyine kuvuluka malongolod- . . . a kale awu. Ngela meeji

ne ikaadi midisange, bayibiikila mpindyewu, bayibiikila ne église Pentecôtiste Unie. Ee, mêmè kuteeleja bamwe baa ku balongeshi baabo. Nenku bavwa biimane mwaba awu, kaa, bavwa balongesha pa bidi bitangila Yesu ne mushindu uvwaYe munene, ne mushindu uvwa bintu byônsò biikale binene, ne pa bidi bitangila “dibatiiza dya Nyuma Mwîmpè.” Mundamunda mêmè kwamba ne: “Cidibo bamba ncinyi?”

¹⁵⁰ Nenku, paanyima paa katanci, muntu mukwabo kutupika kwimana kuulu kadi kubanga kwakula mu myakulu. Ee, ncivwaku mwanji kuumvwa cintu bu nanku to kacya bandela. Nenku ke mukaji mukwabo ewu ulwa mwaba awu wenda uyeemakana ne mwèndè mwônsò. Pashiishe bôbò bônsò kujuuka kadi kubanga benda banyeemakana mbilu. Ke mêmè kudyambidila ne: “Ee, mwaneetu, kabeena anu ne ngenzeli ya maalu ya ekeleeziya to!” Beela mbila ne mbila ya ipandangana mitu biikale benza bintu bya lukutukutu, mêmè kudyambidila ne: “Ewu musumba s’ngwa dikema’s!” Kadi, nudi bamanye, cintu kampanda pa bidi bitangila cyôci aci, pângââkasombâ ntanta mule, ke mêmè kulwa kucinanga bya bîmpè bipite. Kuvwa cintu kampanda cimweka cîmpè menemene. Ke mêmè kubanga kubatangila bîmpè. Nenku byôbi kutungunuka. Mêmè kudyambidila ne: “Nêngânji kubatwala katanci, bwalu nèn- . . . Ndi pabwîpi ne ciibi. Cintu cyôci cibange anu ne mfyôn, nêndyèlè lubilu mu ciibi emu. Ndi mumanye kudi kashinyi kaanyi kiimanyine, anu paudi ukonya lwa ku ditumba kwaka.”

¹⁵¹ Ke mêmè kubanga kuteeleja bamwe baa ku bayiishi abu, bavwa bantu bapiluluke ne balongi baa dipoko. Mona’s, ke mêmè kudyambidila ne: “Mbîmpè.”

Ke dîbâ dya didya dya diloolo kukumbanadi, ke bôbò ne: “Muntu yônsò alwe kudya.”

¹⁵² Kadi mêmè kudyambidila ne: “Anji indilabi tûng. Nyewu ndi ne ndola umwe ne bicycle makumi mwandamutekete ne bitaanu bwa kumona mwa kwalukila kwanyi, ne ndi. . .” Ke yônsò îmvwâ naayi bu mfranga ya kusumba kasoloonyi. Anu ayi ke ivwa ikengela bwa kumfikisha kwanyi. Nenku mvwa ne Ford wanyi wa kale awu, uvwa Ford wa kale mwîmpè mutambe. Kavwa wa mutwe cimpinga to, uvwa anu bu ewu udi pambelu apa ewu, mwikale anu musunsuke. Nenku udi. . . Ndi ngitabuuja cya bushuwa ne Ford awu udi mwa kunyeema wenza miles makumi asatu [kilomeeta 48] ku dîbâ, kadi mu bushuwa bwa bwalu civwa ndikumi ne itaanu mu *nunku* ne dikumi ne itaanu mu *nunku*. Nwamonu’s, paudi uyisangisha, idi yenza makumi asatu. Nenku udi. . . Mêmè kudyambidila ne: “Ee, diloolo adi ngela meeji ne mvwa mwa kupatuka kadi paanyima. . .” Mvwa mushaale bwa mfike too ne ku disangisha dya diloolo.

¹⁵³ Nenku, kaa, ke awu ne: “Bayiishi bônsò, katuyi tutangila dingumba to, balwe pa cibumba cya cyambilu apa.” Ee, tuvwa

batwe ku nkama ibidi mwaba awu, mêmè mvwa paanyi mubandepu. Ke kwambaye ne: “Mpindyewu, katwena ne dîbà dikumbane bwa nwênù bônso kuyiisha to.” Yêyè ne: “Seemena anu cyanaana wâmbè ne udi nganyi ne udi mufumine penyi.”

¹⁵⁴ Ee, ke dyanyi dîbà kufikadi, mêmè kwamba ne: “William Branham, Baptiste. Jeffersonville, Indiana.” Paanyi kuumuka.

¹⁵⁵ Mvwa mwa kuumvwa bakwabo bônso abu baditeeja bamba ne: “Mwena Mpenta, mwena Mpenta, mwena Mpenta, P.A. wa W., P.A.J.C., P.A.W., P. . . .”

¹⁵⁶ Mêmè kuumuka. Mêmè kudyambidila ne: “Ee, ngela meeji ne mêmè kadi ke kânà kaa dibata kaa kwîsù kubi.” Ke mêmè kusômba panshi, kwindila.

¹⁵⁷ Nenku, dituku adi, bôbò kupicisha bayiishi bîmpè, bânà batekete kuntwaku, ke kuyiishabo ne bukole. Ke pashiishe bôbò ne: “Wîkala mwa kutwala diyîsha dya diloolo edi udi. . . .” Ngela meeji baakamubiikila ne: “Mukulu.” Nenku bambi baabo, pamutu paa “Révérènd,” civwa “Mukulu.” Ke kupatulabo muntu wa bafîike mukulakaji mwaba awu, nenku yêyè uvwa ne umwe wa ku nkoozi ya bayiishi beebe baa cyena kale ayi. Ncyèna ngela meeji ne nwênù aba nukaadiku bamone wa nanku to. Mwikale ne mulùndù wa nkudimba paanyima, nudi bamanye, ne nshingu wa bwoyabwoya, mwikale anu ne kajengu kaa mvyà kanyunguluke ku mutu wende awu. Mukwacikwetu mukulakaji awu, kupatukaye mushindu *ewu*, nudi bamanye. Ke kwimanaye mwaba awu kadi kukudimukaye. Nenku pavwa bayiishi bônso bayiisha bwa Yesu ne bwa bunene. . . . mushindu uvwa Ye munene, ne bikwabo apu, mukulumpe awu kwangataye yêyè bwende bwalu mu Yobo. “Uvwa penyi pâmvwà nteeka bishimikidi bya dyulu ne buloba, anyi pavwa mitooto ya mu dinda yimba misambu pamwe ne bânà baa Nzambi beela mbila ya disanka?”

¹⁵⁸ Nenku mukwacikwetu mukulakaji awu, ndyambidila ne: “Bwa cinyi kî mbateeke bamwe baa ku nsongalume yaya bwa kuyiishayi?” Munene. . . . mwaba uvwa mûle tente ne bantu mupate patapata. Ke mêmè kudyambidila ne: “Kî mbenze nanku bwa cinyi?”

¹⁵⁹ Ke pashiishe mukulumpe ewu, pamutu paa kuyiishaye pa bivwa byenzeka panshi paa buloba apa, kubangaye yêyè kuyiisha pa bivwa byenzeka mu Dyulu dîbà dyônso. Ee, ke yêyè kuMwangata muulu ku cibangidilu lwa ku cibangidilu cya cikondo, ne kuMwalujaye mu Dilwa dya Cyakabidi kwinshi kwa mwanzankongolo udi mutwe eku ne eku kwa buloba awu. Mona's, mêmè ncivwaku mwanji kuumvwa diyîsha bu nanku to kacya bandela to! Pa diine dîbà adi Nyuma kadi kumulenga, ke kutupikaye kuya muulu kufika bu *apa* ne kutuutakajaye bikankanya, kusakaye makaaya paanyima kadi kuumukaye pa cibumba apu wenda utupika, wamba ne: “Kanwena ne mwaba

mukumbane wa mêmè kuyiishila to.” Kadi pende’s uvwaku ne mwaba mupite ùndì mêmè naawu apa ewu.

¹⁶⁰ Mêmè kudyambidila ne: “Piikala Cyôci aci mwa kufikisha muntu mukulakaji ku dyenza nanku awu, nCifwanyine kwenza cinyi bu Cyôci mwa kungikila mêmè ewu?” Mêmè—mêmè kudyambidila ne: “Pàmwăpa bidi binkengela Cyôci aci cyàbúngi.” Mona’s, kupatukaye muntwamu, mêmè kuumvwila mukulumpe awu luse lwàbúngi. Kadi, mmwenze anu uumuka, ke mêmè kushaala ndyumvwila mêmè mwine luse. Ke mêmè kushaala mumutangile pavwaye wenda uya apu.

¹⁶¹ Mêmè kupatuka diloolo adi, ke mêmè kudyambidila ne: “Mpindyewu, maalaba mu dinda ncyakulekela muntu umanya ne ndi penyì, anyi ne ndi nganyi to.” Ke mêmè kuya, nenku diloolo adi mêmè kuya kwolola mupanu wanyi. Mêmè kwangata . . . kupatuka kuya mu budimi bwa blé bwa kulaalamu, nenku mêmè kupweka e kuya kasumba ndambu wa tuumâmpà tûme. Nudi . . . Ke mêmè kutusumba búngi cyanaana ku cicyele cimwepele. Kuvwa mulonda wa mâyi lwa kwìnshi aku, mêmè kupeta mâyi. Nenku mvwa mumanye ne mvwa mufwanyine kushaala naawu ntanta, ke mêmè kupeta mâyi e kuânwa, nenku mêmè kuya kadya tuumâmpà twanyi atu. Ke mêmè kwalukila e kunwa mâyi makwabo. Mêmè kupatuka kuya mu budimi bwa blé, kwangata nkwasu ibidi kadi kuteeka mupanu wanyi mukese wa cilâmbà cya ndândà awu, kuwupampanyika munkaci mwa nkwasu ayi.

¹⁶² Nenku, bufuku abu, mêmè kusambila kwamba kuciisha. Mêmè ne: “Mukalenge, eci cîndì mulwe kubwelamu ncinyi? Ncitu mwanji kumonaku bantu batendeleedi baa nunku ewu kacya bandela.” Ke mêmè ne: “Nkwacisheku bwa mmanye ne byònsò ebi bidi byumvwija cinyi.”

¹⁶³ Nenku paakacyabu mu dinda mêmè kupweka kuntwaku. Kutubiikilabo bwa didya dya mu dinda. Mu bushuwa bwa bwalu, ncivwa muswe kulwa bwa kuya naabo to, bwalu ncivwa ne kantu nansha kamwe kaa kwela mu kabondo kaa milambu to. Ke mêmè kwalukila anu cyanaana. Nenku paakacyabu mu dinda pângààkabwelà, mona’s (mvwa mudye tuumâmpà twanyi atu), nenku mêmè kusòmba. Nenku bavwa ne cikolokolo. Kadi mêmè ncivwaku paanyi mwanji kumona cikolokolo kwònsò aku to, nenku mvwa ngumvwa bwôwà bwa cintu aci. Nenku bôbò . . . Nenku civwa ne nshinga mukese mukudika kuulu lwa mwaba ewu, cyôci ciikale cilembelele. Cimwe cya ku bikolokolo bitubo balemeleja abi, cya nanku awu. Ke yêyè ne: “Diloolo dya makeelela, pa cibumba cya cyambilu apa, pavwa muyiishi wa kânàkânà mwaba ewu, Baptiste.”

Mêmè kudyambidila ne: “Kakaa, ngaabwelakanyi leelu.”

¹⁶⁴ Ke yêyè ne: “Yêyè awu nguvwa muyiishi mwânà ku bònsò pa cibumba cya cyambilu. Dyende uvwa Branham. Kudiku muntu

mumanye mwaba udiye anyi? Amwambile abande kuneeku, tudi nende dijinga bwa yèyè kutwala diyiiisha dya mu dinda emu.”

¹⁶⁵ Ekelekele! Mwva muvwale kaabupilu kaa maboko a bitupà, ne kapanu kaa cilàmbà cya ndàndà, nudi bamanye. Kadi twètù ba-Baptistes tutu twitabuujà ne bivwa bikengela kwikala muvwale nkooci, bwa kubanda mu cyambilu, nudi bamanye. Nenku . . . Ke mêmè—mêmè kushaala musòmbè mupuwe anu vii. Nenku mu ciine cikondo aci. . . Bavwa bacyènzèle mu Nord bwalu (mpungilu wabo wa buloba bujima awu) bantu bafiike kabavwa mwa kulwamu to bu mwikadile mu Sud. Bavwa ne bantu bafiike muntwamu, nenku mêmè mwva mwena mu Sud, mucikàle ne dyumakana mu nshingu wanyi wa muteelu awu, nudi numona, ndyambidila ne mwaku ndambu bimpè kupita kampanda mukwabo. Ke kwenzakabi mu dinda amu ne, muntu uvwa musòmbèle ku luseke lwanyi uvwa mmu—mmuntu wa bafiike. Mêmè kusòmba kadi kwambula mèsù kumutangila. Mêmè kudyambidila ne: “Ee, s’mmwaneetu.”

¹⁶⁶ Ke awu kwamba ne: “Kudiku muntu mumanye mwaba udi William Branham anyi?” Mêmè kupwekelela mu nkwasu wanyi mushindu *ewu*. Ke yèyè kwamba, kumanyishaye musangu mwibîdi, ne: “Muntu kampanda pambelu paapa” (kukokelaye cikokoloko cyende aci pabwîpi) “mumanye mwaba udi William Branham anyi? Amwambile ne tudi nende dijinga pa cibumba cya cyambilu apa bwa diyiiisha dya mu dinda emu. Mmuyiishi wa ba-Baptistes mufumine ku Indiana wa ku sud.”

¹⁶⁷ Mêmè kushaala musòmbè mupuwe anu vii ne mwiname bikole, nudi bamanye. Muntu nansha umwe kavva mumanye to, byòbì biine. Nsongalume wa bafiike awu kwambula mèsù kuntangila, kwambaye ne: “Udi mumanye mwaba udiye anyi?”

¹⁶⁸ Mêmè kwela meeji. Bivwa—bivwa bikengela anyi ndinge anyi ngènzè cintu kampanda. Ke mêmè ne: “Pwekelelabi lwa kuneeku nkuleeje.”

Yèyè ne: “Eyo, mukalenge?”

Mêmè ne: “Ndi muswe nkwambile cintu kampanda.” Mêmè ne: “Mm—Mmêmè.”

Yèyè ne: “Ee, bandaaku kwaka’s.”

¹⁶⁹ Ke mêmè ne: “To, ncyèna mwa kubandaku to. Wamonu’s,” mûngàakamba, “muvwale kapanu kaa kale aka kaa cilàmbà cya ndàndà ne kaabupilu kaa maboko a bitupà aka.” Mêmè ne: “Ncyèna mufwanyine kubanda kwaka to.”

¹⁷⁰ Yèyè ne: “Bantu aba kabatu ne bwalu ne mushindu ûdi muvwale to. Banda wèwè kwaka.”

Mêmè ne: “To, to.” Mêmè ne: “Sòmba mupuwe, kwambi bwalu to mpindyewu.”

171 Ke kulwabo cyakabidi ku cikolokolo paanyima paa kasunsa kamwe, ne: “Kudiku muntu mumanye mwaba udi William Branham anyi?”

172 Yèyè ne: “Nyèyè ewu! Nyèyè ewu! Nyèyè ewu!” Ekelekele! Ke mèmè awu kubanda kuntwaku muvwale kaabupilu kaa maboko a bitupà aku, nudi bamanye. Nenku ke mèmè awu. . .

173 Yèyè ne: “Banda kuneeku, Mukalenge Branham, tudi baswe ututwadile diyiisha.” Ekelekele, kumpala kwa bayiishi bônso abu, uhm, bantu bônso abu! Ke mèmè kukuya mwenze bu lungonyoonyo, nudi bamanye. Kwìsù kunkunze, mu maci muntuuke kapyà. Ke mèmè kuya mwenze bu lungonyoonyo, muvwale kapanu kaa cilàmbà cya ndàndà aku ne kaabupilu kaa maboko a bitupà, muyiishi, muyiishi wa ba-Baptistes uya mutangile ku cikolokolo, cituye kayiku mwanji kumona kacya, nwamonu’s.

174 Ke ngimana apu, ngamba ne: “Ee, mèmè—mèmè—mèmè nciitu mumanye ebi to.” Mvwa nkaadi ngàtwa mu nsampu ngàtwa mu kaleji, mubinduluke anu bya menemene ebi, nudi bamanye. Nenku—nenku mèmè kubuulula mwaba ewu wa mu Luuka 16, mwikale ndyambidila ne: “Ee, mpindyewu. . .” Ke mèmè—mèmè kufika ku cyena bwalu cya ne: “Ke yèyè kutupula mèsù mu iferno amu, kwasaye mwadi.” Ke mèmè kufika ku. . .Nenku mèmè—mèmè kubanga kuyiisha, nudi bamanye, ke mèmè kufika ku diyiisha ne kudyumvwa ndambu bìmpè. Ke mèmè ne: “Muntu mubanja uvwa mu iferno, ke kwasaye mwadi.” Tuumyaku tukese tusatu atu, bu muntù ne mayiisha àbùngì a mushindu awu ne: “Udi Witabuuja Eci,” ne “Akula Ne Lubwebwe,” nukaadi bangumvumvwe ngayiisha. Ke mèmè ne: “Ke pashiishe kwasaye mwadi.” Ke mèmè ne: “Kamuyi bânà muntwamu, ncyà bushuwa ne kabeenamumu iferno to. Ke kwasaye mwadi.” Mèmè ne: “Kamuyi bilòngò. Ke kwasaye mwadi. Kamuyi Nzambi. Ke kwasaye mwadi. Kamuyi Kilisto. Ke kwasaye mwadi.” Ke mèmè kwasa mwadi. Cintu kampanda kunkwataci. Ekelekele! Kaa, ekelekele! Pashiishe, ncyèna mumanye cyakenzeka to. Pângààkenzà bu wàpingànyì mu mèmè, nkaavwa mwimanyine lwa pambelu. Bantu abu kuditwa mu dyela mbila ne mbila ya mikole ne didila dya myadi, ne mèmè, twètù kwikalà ne cikondo cya dicyonkomoka cya dikema.

175 Pângààkapàtukilà pambelu apu nyawu pavwa mulumyana mukwabo mwase cifulu cinene cya beena Texas, ne bikumba binene, kusemenaye kùndì, ne: “Mèmè ndi Mukulu *Kampanda*.” Muiishi, ne bìkumbà bya balami baa ngombe, muvwale bilàmbà bya balami baa ngombe.

Mèmè kudyambidila ne: “Ee, kapanu kaanyi kaa cilàmbà cya ndàndà kakeena anu kabi to.”

176 Yèyè ne: “Ndi muswe ulwe ku Texas bwa ungenzele ditabulujá.”

177 “Uh-huh, lekela ngǎnjì mfunde bwalu abu, mukalenge.” Ke mêmè kufunda bwalu abu mushindu awu.

178 Ke mulumyana mukwabo ulwalwa ewu muvwale kapanu kakese, kaa mushindu, kavwabo banaya naaku golf aku, nudi bamanye, ne kapanu kadi ne cyakuulu bilamakaja aku. Yèyè ne: “Mêmè ndi Mukulu *Kampanda* wa ku Miami. Ndi njinga ne. . .”

179 “Ekelekele, pàmwápa mvwadilu kèna anu ne mushinga to.” Mêmè kucitangila, ke mêmè kudyambidila ne: “Mbîmpè.”

180 Ke mêmè kwangata bintu abi, kwalukila kwanyi kumbelu. Mukajaanyi ulwa umpeta, kwambaye ne: “Mbwa cinyi udi umweka ne disanka búngì nunku, Billy?”

181 Mêmè ne: “Ndi muye kangulangana ne cya panshi paa lwesu. Ekelekele, mbantu badi batambe bwîmpè baa kuyiku mwanji kumona kacya to. Baba bantu kabeenaku bôbò ne bundu bwa ntendeleelu wabo to.” Nenku, kaa, ke mêmè kumulondela byònsò abi. Ke mêmè ne: “Kadi tangila kuneeku, munanga wanyi, mulongolongo wa mabiikila. Bantu biine abu!”

Yèyè ne: “Kî mbansantu babunguluki baa mu malaba to, mmwómò anyi?”

182 Mêmè ne: “Ncyèna mumanye ne bôbò abu mbansantu babunguluki baa mu malaba ba mushindu kaayi to, kadi badi ne cintu kampanda cîmvwàku mêmè ewu naaci dijinga.” Nwamonu anyi? Mêmè ne: “Aci—aci ke cintu cimwepele cîndì mutwishiibwe.” Mêmè ne: “Ndi mukamone muntu mukulakaji, wa bidimu makumi citeema, mwalukile mushaale mwànà.” Mêmè ne: “Ncitu mwanji kuumvwaku mayiisha a mushindu wawa kacya bandela. Mona’s, ncitu mwanji kumona Baptiste uyiisha naka to.” Mêmè ne: “Badi bayiisha too ne padi mweyelu wimana, nenku bakonya binù byabo too ne panshi, bajuuka cyakabidi, bapingaja mweyelu. Udi mwa kubumvwa too ne mu ntanta wa mpangu inaayi, bayiisha anu kuyiisha.” Ke mêmè ne: “Mêmè—mêmè ncitu mwanji kuumvwa bya nanku kacya bandela.” Ke mêmè ne: “Badi baakula mu mwakulu mwenyi, ne muntu mukwabo wamba bidibo bamba abi. Ncitu mwanji kuumvwaku bya mushindu wawa to kacya bandela!” Mêmè ne: “Neuye kamfíla’s?”

183 Yèyè ne: “Munanga wanyi, pândi musediibwe kûdì, mêmè’s nènshaalè mukulamate too ne piikala lufu mwa kututapulula.” Yèyè ne: “Nènye.” Yèyè ne: “Mpindyewu bikengela twambile baledi beetu.”

184 Ke mêmè ne: “Ee, wèwè newambile webe mamwèbè ne mêmè paanyi ngambile wanyi mamwányi.” Ke twètù. . . Mêmè kuya kambila wanyi Maman.

185 Maman kwamba ne: “Ee, cya bushuwa, Billy. Cyònsò cidi Nzambi mukubiikile bwa kwenza, nda ukacyénzè.”

186 Ke Mandamu Brumbach kumbiikidishaye. Mémè kuyamu. Yèyè ne: “Ebi ke binganyi byûkaadi wamba ebi?”

187 Ke mémè ne: “Kaa, Mandamu Brumbach,” mémè ne, “nwènù bònsò kanutu banji kumona bantu baa naka to.”

Yèyè ne: “Tuukija! Tuukija!”

Mémè ne: “Eyowa’s, inăbànzà.” Mémè ne: “Mfwile luse.”

Ke yèyè ne: “Utu mumanye ne bôbò abu ke musumba wa bansantu babunguluki baa mu malaba?”

188 Mémè ne: “To, inăbànzà, ncivwa mumanye aci to.” Mémè ne: “Paabu’s—paabu’s mbantu anu balenga baa bushuwa aba.”

189 Yèyè ne: “Anu mmwenenu mwine’s! Wèwè udi wela meeji ne udi mufwanyine kwikala wenda upulumuna mwanaanyi mémè upatuka uya nende mu bintakanyi bya mushindu awu!” Yèyè ne: “Macimbu’s we! Aci’s cidi anu ciina cya bucyafu cya bidi ekeleeziya mikwabo miimanshe.” Yèyè ne: “Eku mmwômò! Wèwè kwakupatukaku ne mwanaanyi mushindu awu nansha.”

190 Ke mémè ne: “Kadi, udi mumanye’s, Mandamu Brumbach, munda mwa mwoyi wanyi mémè ndi ngumvwa ne Mukalenge ngudi muswe bwa mémè kuya ne bantu abu.”

191 Yèyè ne: “Alukila ku ekeleeziya webe too ne paapetabo mushindu wa kukupetela webe paroisse, nenku ikala wenza maalu bu muntu udiku ne lungenyi.” Yèyè ne: “Kwakwangata mwanaanyi mémè kupatuka kuya nende kuntwaku to.”

Ke mémè ne: “Eyowa’s, inăbànzà.” Mémè kukudimuka kadi kupatuka.

192 Ke Hope kwasa mwadi. Kupatukaye pambelu, wamba ne: “Billy, kunangidi bidi Maman wamba abi to, mémè nênshaalè anu neebe wèwè.” Mwoyi wende ubeneshiibwe!

Ke mémè ne: “Kaa, aci’s ncîmpè be, munanga wanyi.”

193 Kadi mémè kubilekela’s. Yèyè nyawu kavwa muswe kulekela mwanende kuyaye ne bantu baa mushindu awu ne bwalu “Kacivwa cîngà cintu to civwa nciinà cya bucyafu.” Ke paanyi kubilekela’s. Ke cilema cya citambe bubi cîndîku mwenze kacya bandela, cimwe cya ku bidi bitambe bubi.

194 Paanyima ndambu, paanyima paa ndambu wa bidimu, bânà kulediibwabo. Nenku dîngà dituku tuvwa...Mâyì kuula e kubwela ne mu mbanza, mu cidimu cya 1937. Kulwaku mâyì mùle ne mu mbanza. Nenku wetu...Mvwa mu mudimu wa bukontononyi cikondo aci mwikale ngenza ne mwanyi mwònsò bwa kupatula bantu mu mâyì awu, nzubu biikale byupuka. Ke mukajaanyi mwine kukwacika disaama, ke kusaamaye bikole, disaama dikole dya bisulusulu. Ke kupatukabo nende... Lupitaadi lwa ciibidilu luvwa lûle tente mu mushindu wa

katuyiku mwa kumuteekamu to, ke twêtù kupatuka kuya nende ku nzubu wa—wa mbulamatadi kuvwabo ne cibambalu kuntwaku. Ke kumbiikilabo bwa mêmè kupatuka kwalukilaku. Ne mêmè mwine mvwa kwônsò eku musòmbèle anu pa musulu awu, anu mwendeshi wa bwâtù wetu wa menemene ewu, pa nanku mvwa nteeta bwa kusungila bantu, kubapatula mu mâyi avwa mûle mu mbanza awu. Nenkuashiishe mvwa mwa. . . muntu kampanda. . .

¹⁹⁵ Kumbiikilabo, bamba ne: “Kudi nzubu kampanda mu mùsèèsu wa Chestnut Street, ukaadi ukeba kudiina. Mudi maamu kampanda ne musumba wa bânà munda amu,” ne, “pawikala wela meeji ne bwâtù bwebe, moteur webe udi mwa kukubweja ne kukufikisha too ne mwaba udibo awu.”

Mêmè ne: “Ee, nêngènzè ne mwanyi mwônsò.”

¹⁹⁶ Nenku mêmè, mvwa munkaci mwa kubanda pamutu paa mavwala awu. Nkila ukaavwa mukoseke lwa kumutu kwaka, nenku, kaa, ekelekele, kùdi. . .mâyi mapaasalale mu cimenga. Nenku mvwa ngenda mushoone lubilu ne mwanyi mwônsò, nenku ndekeelu wa byônsò kupweka nsambuluka tujila ne mpicila mu mbanza. Ke mêmè kufika too ne pavwa nkila wa kale, mâyi apongoloka apicilamu. Ke mêmè kuumvwa muntu wela mbila mikole, kumona maamu mukwabo mwimane pambelu kuulu kwa lutanda. Nenku kuvwa mavwala a manene awu apicilamu mushindu awu. Ee, mêmè kutungunuka ne kubanda mu mushindu *ewu* nya kule ne mwanyi mwônsò, kukosolola nkwaka kadi kwalukila ne kufika lwalwa luseke. Mvwa mwimanyike bwâtù bwanyi anu pa dîbà bwa kubuswika ku dikunji, dya cibumba, dya cibumba cya ciibi anyi cibumba cya lutanda. Ke mêmè kubwela lubilu e kukwata maamu awu ne kumwelamu, ne bânà bende babidi anyi basatu. Ke mêmè kukutulula bwâtù bwanyi kadi kuya nende ku. . .paanyima. Mêmè kupatukila lwa kwînshi ndambu, nenku kumufikisha lwa ku mwelelu, mu ntanta wa mile mujima ne cipupa [kilomeeta 2,4] batangilangane ne cimenga, too ne pângàâyî kamufikisha ku mwelelu. Nenkuashiishe pângàâfikî kwôkò aku, ukaavwa mufwe cipuuka. Nenku ukaavwa mubange. . .uvwa wela mbila mikole ne: “Mwanaanyi wa mu dibokwee! Mwanaanyi wa mu dibokwee!”

¹⁹⁷ Ee, mêmè kudyambidila ne uvwa uswa kwamba ne mmushiye mwanende wa mu diboko awu mu nzubu. Ekelekele! Mêmè kwalukila cyakabidi pavwabo bamutangila apu. Nenku, mêmè kufika ku dijandula ne, civwa. . .anyi uvwa uswa kumanya ne mwanende wa mu diboko awu uvwa mwaba awu. Kuvwa kânà kakese kaa bidimu bu bisatu nanku awu, kadi mêmè ndyambidila bu ne uvwa wamba mwânà wa ku dibeele anyi cikampanda.

198 Ke mêmè kwalukila ne kuya kakufika. Nenku pângàngàci bwâtù abu ne kubwela too ne munda nciyi mwa kusanganamu mwânà mwine wa mu diboko awu, ke lutanda kuupuka ne nzubu kudiinaye. Ke mêmè kuya lubilu kukwata ci—citupa cya mucu civwa cishaale cilelemija bwâtù bwanyi, kubwela mu bwâtù, kukoka cyôci aci kadi kubukutulula.

199 Ke cyôci aci kungangata e kukambweja mu nkwaka wa musulu mwine pa dîbà adi. Nenku tukaavwa bu pa dîbà dikumi ne dimwe ne tusunsa makumi asatu wa bufuku, piinaapu kwikale kuloka mabwe a mvula ne nêjè. Ke mêmè kukwata nshinga wa kòntakì ne kuteeta bwa kukoka bwâtù, kadi kabuyi mwa kuteema to, ke mêmè kuteeta kabuyi mwa kuteema to, ke mêmè kuteeta kabidi. Nkaavwa mupweke ne nkwaka muye kule, cibila paaci anu kwinsi kwanyi aku. Nenku mvwa nteeta anu bikole menemene, ke mêmè kudyambidila ne: “Ekelekele, ke—ke wanyi ndekeelu nyewu! Ke yèyè ewu!” Ke mêmè kuteeta anu bikole menemene. Ke mêmè kwamba ne: “Mukalenge, bu Wèwè mwa kuswa kundekediku mfwa lufu lwa nunku to,” nenku mêmè kukoka anu kukoka.

200 Ke bwalu abu kumvwila ne: “Kadi musumba wa bantu baa mu ciina cya bucyafu kuwakabenga bwa kuya aku?” Nuumvu anyi? Uh-huh.

201 Mêmè kupingaja kuteeka cyanza paanyima kuciteeka pa bwâtù, kwamba ne: “Nzambi, mfwileku luse. Kwitabi bwa mêmè kushiya mukajaanyi ne mwanaanyi wa mu diboko mushindu ewu to, biikale basaama kuntu kwaka! Bu Wèwè mwa kuswa!” Nenku mêmè kutungunuka anu ne kukoka mushindu awu, kadi kabuyi mwa kuteema to. Nenku mvwa mwa kuumvwa mukungulu kwinsi aku, bwalu mêmè. . .Mu tusunsa tukese cyanaana, nenku, kaa, ekelekele, bwanyi’s buvwa butuuke. Ke mêmè kwamba ne: “Mukalenge, bu Wèwè mwa kumfwilaku luse, nènKulayè ne nêngènzè cintu kampanda cyònsò.” Mêmè kutwa binù mu bwâtù amu, ne mabwe a mvula antuuta mumpala. Mêmè ne: “Nêngènzè cyònsò cyûdi Wèwè muswe bwa mêmè kwenza.” Ke mêmè kukoka kabidi, ke kuteemabu. Ke mêmè kwela biteshi ne mwanyi mwònsò, ke ndekeelu wa byònsò mêmè kuya kafika ku mwelelu.

202 Nenku mêmè kwalukila bwa kuya kapeta kààmìnyô, kààmìnyô kaa bakontononyi. Nenku mvwa ndyambidila bwa. . .Kuvwa bângà bantu bavwa bamba ne: “Aka, nzubu wa mbulamatadi mwine wapweki ne mâyi.” Mukajaanyi ne mwanaanyi paabo biikalemu, bânà baanyi bònsò babidi.

203 Ke mêmè kuya ku nzubu wa mbulamatadi awu nyeema ne mwanyi mwònsò, mâyi mabande too ne pa bule mwa makàsà dikumi ne ataanu [mètres 4,5] miikale apicilapu. Nenku pavwa major wa basalaayi mwaba awu, ke mêmè ne: “Major, lupitaadi ndwenzeke cinyi?”

Yèyè ne: “Mona, kwikadi waditacisha mu meeji to. Udimu ne muntu anyi?”

Mêmè ne: “Eyo, mu—mukaji usaama ne bânà babidi.”

204 Yèyè ne: “Bònsò mbapatuke.” Yèyè ne: “Badi mu dikaadika dya bintu batangile ku Charlestown.”

205 Mêmè kwasa lubilu, kubwela mu bwâtù bwanyi ne . . . anyi kubwela mu kashinyi kaanyi, ne bwâtù bwanyi paanyima apu, ne mêmè kuya lubilu mutangile kwaka ku . . . Nenu tusulu tukaavwa tupweke too ne ku miles ibidi ne citupa anyi isatu [kilomeeta 4 anyi 5] mu bunene. Nenu bufuku bujima abu mêmè kuteeta bwa . . . Bamwe baa kudibo bavwa bamba ne: “Dikaadika, dikaadika dya bintu adi, mbadyümüshe mu njila wadi kudi mâyi pa cilamba cya njanja paapa.”

206 Ee, ke mêmè kudimona mushaale nkaayaanyi mwamwa mu kaacisanga kakese, kushaalamu munda mwa matuku asatu. Mêmè kupetamu dibà dyàbûngì dya kwelangana meeji bwa kumanya ne Cyôci aci civwa ciinà cya bucyafu anyi kî ncyôci. Mwikale anu nditacisha ne: “Mukajaanyi udi penyi?”

207 Ndekeelu wa byônsò pângààlu kumupeta, mu ndambu wa matuku ûmvwà mupatuke ne mukosolole awu, ukaavwa mwamwa mu Columbus, Indiana, mu Dibalaasa dya ba-Baptistes mukaavwabo benze cintu bu—bu lupitaadi nanku awu, tubambalu twa babeedi mu tulaalu twa mbulamataadi. Ke mêmè kuya lubilu kudiye ne mwanyi mwônsò, ntata bwa kupeta ne udi penyi, ngenda ngela mbila mikole ne: “Hope! Hope! Hope!” Nenu dya ntangila, ke yèyè wawa mulaadika mu kalaalu, disaama dya cyâdi dimukwate.

Kujuulaye kaacyanza kende kàkaavwà kashaale anu mifuba aku, wamba ne: “Billy.”

Ke mêmè kuya kudiye lubilu, ne: “Hope, munanga wanyi.”

Yèyè ne: “Nkaadi mmweka anu bu ciikùlùkùkù, kî mmwômò?”

Mêmè ne: “To, munanga wanyi, udi umweka anu bîmpè.”

208 Munda mwa ngondo mitwe ku isambombo twêtù kwenza mudimu ne mwetu mwônsò, bwa kuteeta bwa kufika ku disungila mwoyi wende, kadi yèyè wenda unyaanunuka anu kunyaanunuka.

209 Dîngà dituku mvwa mu mudimu wa bukontononyi mwikale mukangule cisanji cyanyi, ke mêmè kudyambidila ne mvwa muumvwe bamba, benza dibiikila ku cisanji, ne: “Bwa William Branham, badi nende dijinga ku lupitaadi anu patudi twakulangana apa, mukajende ukaadi ùpunga ne lufu.” Mêmè kwalukila lubilu ku lupitaadi ne mwanyi mwônsò, midilu mikunze ya mashinyi miteemesha ne kaacipungi kaa disopweshangana naaku kenda kadila, mêmè kuya. Ke pashiishe mêmè—mêmè kubanda ku lupitaadi e kwimana, kubwelamu

lubilu. Pâmvwà ngenda nkosolola lwa—lwa mu lupitaadi amu, mèmè kumona mulunda wanyi mukwabo wa ku bwànà utuvwa tuloba nende, utuvwa twendakana nende patucivwa bânà, Sam Adair.

²¹⁰ Ngangabuka Sam Adair, nyêyè wa bwena ûmvwà mumwene cikeena-kumona kî nkwanji kupita matuku ûmvwà mwambile bwa clinique awu. Ke kwambaye ne, muntu yêyè anu mudidinge mwele mpata bwa cikeena-kumona aci, amubiikile anu yêyè cyanaana ku telefone bwa yêyè ufuta, paudi muswe kumanya ne ncyà bushuwa anyi ncyà mafi.

²¹¹ Nenku ke yêyè udi upatuka ewu mushindu ewu, mukwate cifulu cyende ku cyanza. Mmwenze anu utangila kadi kubanga anu kudila mwadi. Ke mèmè kuya kudiye lubilu, kumwela citupà. Kungelaye citupà, wamba ne: “Billy, nyawu ukàadi uya.” Yêyè ne: “Mfwile luse. Ndi mwenze ne mwanyi mwônso mwa kwenza, ndi mwangate ne bangangabuka baa mamanya a pabwawu ne bikwabo byônso.”

Mèmè ne: “Sam, ncyà bushuwa ne kèna uya to!”

Yêyè ne: “Eyi, yêyè’s udi munkaci mwa kuya.” Ke yêyè ne: “Kubwedimu to, Bill.”

Ke mèmè ne: “Bikengela anu mbwelemu, Sam.”

Ke yêyè ne: “Kwenji nanku to. To, bu wêwè mwa kuswa.”

Mèmè ne: “Ndekela mbwele.”

Yêyè ne: “Nanku tuyaaya neebe.”

²¹² Mèmè ne: “To, shaala wêwè pambelu apa. Ndi muswe kushaala nende mu tusunsa twende twa ndekeelu.”

Yêyè ne: “Ûkaadi kaciya wa uumvwa kabidi to.”

²¹³ Mèmè kubwela mu cibambalu amu. Ne munganga mukaji uvwa musòmbe mwaba awu, udila mwadi bwalu yêyè ne Hope bavwa balonge kaaba kamwe. Nenku ndi mwenze anu ntangila, pende wasa mwadi, wela cyanza muulu. Ke mèmè kuseemena.

²¹⁴ Ke mèmè kutangila, kumunyungisha. Ke yêyè awu mwaba awu, ukaavwa bujitu buumuke ku livres de poids lukama ne makumi abidi [kilô 55], mishaale mwinshi mwa makumi asambombo [kilô 27,5]. Ke mèmè—mèmè kumunyungisha. Ne bu mèmè mwa kushaala ne mwoyi too ne ku bidimu lukama, ncyakupwaku mwoyi cyakenzeka aci to. Yêyè kukudimuka, ke mèsù ende a manene mimpè awu kuntangilawu. Yêyè kufukisha mimwemwe. Kwambaye ne: “Udi mumbiikile mumpingaje bwa cinyi, Billy?”

Mèmè ne: “Munanga wanyi, s’ndi mfuma ku dipeta bwalu ku cisanji.”

²¹⁵ Bivwa bikengela anu mèmè kwenza mudimu. Tukaavwa babwele dibanza dya nkama ya ndola ya kufuta bangangabuka, kadi katuyi kantu bwa kufuta. Nenku bivwa bikengela anu

mêmè kwenza mudimu. Nenku mvwa ngenza kamumona misangu ibidi anyi isatu ku dituku, ne diloolo dyònsò, kabidi ne pakaavwaye mu mushindu ukaavwaye awu.

Mêmè ne: “Udi uswa kwamba cinyi ne: ‘Kukubiikila’ ne ‘kukwaluja?’”

216 Yèyè ne: “Bill, wêwè ewu’s utu muyiishe pa Cyôci aci, utu mwakule pa Cyôci aci, kadi kwêna ne cingenyinyenyi nansha cikese bwa kumanya ne Cyôci aci ncinganyi to.”

Mêmè ne: “Cyûdi wamba ncinyi?”

217 Yèyè ne: “Dyulu.” Yèyè ne: “Tangila,” yèyè ne: “Nkaavwa mu njila ngenda nya Kwetu mushindikija kudi bantu bakwabo, bantu balume anyi bakaji anyi cikampanda. Bavwa bavwale bilâmbà bitooke.” Ke yèyè ne: “Mvwa musuulakane mwikale mu ditalala.” Yèyè ne: “Nyuunyi minene menemene ibuuka yikila ku mucu ne ku mucu.” Yèyè ne: “Kwikadi wela meeji ne ndi ndi mujimije lungenyi to.” Yèyè ne: “Billy, imana nkwambile cilema citudi benze.” Yèyè ne: “Sòmbelâ panshi.” Ncyâkasòmba to; mêmè kutwa binù, kumukwata ku cyanza. Yèyè ne: “Udi mumanye mwaba utudi benzele cilema?”

Ke mêmè ne: “Eyo, munanga wanyi, ndi mumanye.”

218 Yèyè ne: “Katuvwa ne cya kwikala bateeleje Maman to. Bantu abu bavwa mu bulelela.”

Ke mêmè ne: “Ndi mumanye nanku.”

219 Yèyè ne: “Anji kundayaku bwalu ebu ne, neuye kudi bantu abu,” ne, “bwalu badi mu bulelela.” Ke yèyè ne: “Ukoleshe bânâ baanyi mushindu awu.” Ke mêmè . . . Yèyè ne: “Ndi muswe nkwambile cintu kampanda.” Yèyè ne: “Ndi mfwa, kadi,” ne, “kí . . . ncyêna—ncyêna ne bwôwâ bwa kuya to.” Yèyè ne: “M—mbilenga bya dikema.” Yèyè ne: “Cintu cimwe ncyâ ne, ncyêna muswe kukushiya to, Bill. Kabidi ndi mumanye ne udi ne twânâ tukese tubidi twa dikolesha.” Yèyè ne: “Undayeku ne—ne kwakushaala kuyi mukaji bwa kushiya bânâ baanyi bakaadi baabakokela eku baabakokela eku to.” Aci civwa ncintu cya meeji bwa maamu wa bidimu makumi abidi ne bibidi.

Ke mêmè ne: “Ncyêna mwa kulaya aci to, Hope.”

220 Yèyè ne: “Undayeku bu wêwè mwa kuswa.” Yèyè ne: “Cintu cimwepele cîndi nginga kukwambila.” Yèyè ne: “Udi muvuluke cingoma aci?” Mêmè bwa bingoma ntu anu bu ne ndi ngamba kupaala. Ke yèyè ne: “Uvwa ne dijinga dya kusumba cingoma aci dituku adi kadi kuyi ne mfranga mikumbane bwa kufuta citupa cya mushinga civwa cishaale.”

Mêmè ne: “Eyo.”

221 Yèyè ne: “Mvwa mulame mfranga yanyi, tuubicycle twanyi, bwa kumona mwa kukufucila citupa cya mushinga wa cingoma civwa cishaale aci.” Yèyè ne: “Mpindyewu, piikala bwalu

ebu bujike wêwè mwalukile kumbelu, watangila pamutu paa nkwaswa wa muleepa awu . . . anyi paa bulaalu bwa dibunya abu, mwinshi mwa dibeji dya mukanda didi lwa kumutu adi, nenku neusangane mfranga ayi muntwamu.” Yêyè ne: “Undayeku ne neusumbe cingoma aci.”

222 Kanwena bamanye mûngààkadyûmvwà pângààkamònà ndola umwepele ne tuubicyele atu makumi mwandamutekete ne tutaanu to (twa binjanja) biteeka muntwamu. Ngâkasumba cingoma aci.

223 Ke yêyè ne: “Udi uvuluka musangu awu ûvwà upweka uya mu cimenga bwa kansumbila nshesheete ya mitwe mu cifuka ayi, twètù biikale twenda tuya ku Fort Wayne?”

Mêmè ne: “Eyo.”

224 Mvwa mwalukile mfuma ku diloba, ke yêyè ne. . . Bivwa bikengela twètù kuya ku Fort Wayne, bivwa bikengela bwa nyiishe diloolo adi. Ke yêyè ne: “Udi mumanye ne, mvwa mukwambile ne: ‘Kutu mishindu yaayi ibidi.’” Umwe bawubiikila ne “ya swâ.” Kadi mukwabo awu ngwèpì, ya ndundu? Mmwômò anyi? Ya ndundu ne ya swâ. Ee, nì ngwèpì mwine awu, ya swâ ke ivwa mwîmpè mupite mukwabo. Mmwômò anyi? Ke yêyè ne: “Mpindyewu, unsumbile ya swâ, mushindu wa cyena leelu.” Nutu bamanye cintu cidi ne kaacintu kakese lwa paanyima paa nshesheete miine ayi, lwa kumutu eku? Bya bwalu ncivwa mumanyeku cintu pa bidi bitangila bilâmbâ bya bakaji to, ke mêmè. . .

225 Nenu mvwa ngenda mpweka ne mùsèèsù awu ngenda ngamba ne: “Ya swâ, ya swâ, ya swâ, ya swâ,” nteeta bwa kushaala mulame mu meeji ne, “ya swâ, ya swâ, ya swâ.”

Muntu mukwabo kwambaye ne: “Wetwawu, Billy!”

226 Mêmè ne: “Kaa, wetwawu, wetwawu.” “Ya swâ, ya swâ, ya swâ, ya swâ, ya swâ, ya swâ.”

227 Ke mêmè kufika mu disangu kutuutakeena ne Mukalenge Spon. Yêyè ne: “Wè, Billy, udi mumanye ne mishipa idi idiila lwa kwaka ku luseke lwa dikunji dya ndekeelu dyadya anyi?”

Mêmè ne: “Ncyâ bushuwa’s, mmwômwè?”

“Eyo.”

Mêmè kudyambidila mpindyewu, pângààkashiyanganà nende ne: “Cilumyana ciine aci civwa ncinyi?” Mucipwe mwoyi.

228 Nenu Thelma Ford, nsongakaji ûmvwà mumanye, uvwa wenza mudimu ku makajiinyi a mishanga mikole. Nenu mvwa mumanye ne batu basumbishamu nshesheete miine ya bakaji ayi, ke mêmè kukuya. Mêmè ne: “Wetwawu, Thelma.”

Ke yêyè ne: “Wetwawu, Billy. Maalu kaayi? Bishi Hope?”

229 Ke mêmè ne: “Bîmpè.” Mêmè ne: “Thelma, ndi nkeba mukolo wa nshesheete bwa Hope.”

Yêyè ne: “Hope katu mwa kujinga nshesheete to.”

Mêmè ne: “Eyowa’s, inăbànzà, s’mmuyiswe cya bushuwa.”

Yêyè ne: “Udi uswa kwamba nshesheete ya ifikila mu cifuka.”

²³⁰ “Aka, bushuwa’s,” ke mêmè awu, “nyôyi ayi’s we.” Mêmè kudyambidila ne: “Eleele, ngaamanyi kuleja bunyonga bwanyi.”

Ke yêyè ne: “Nyaa mushindu kaayi idiye ukeba?”

Mêmè kudyambidila ne: “Eleele!” Mêmè ne: “Nya mushindu kaayi inudi nwênù naayi?”

Yêyè ne: “Ee, tudi ne ya ndundu.”

²³¹ Ncivwa mumanye dishiilangana to. Ya ndundu, ya swâ, byônsò bidi byumvwika anu bya mwomumwe. Mêmè ne: “Ke ìndi nkeba nyôyi ayi.” Yêyè ne. . . Mêmè ne: “Indongolwele mukolo umwe, mushindu wa cyena leelu.” Ke yêyè. . . Mwva mucikwate bibi. Idi bishi? Ya cyena kale. “Ya cyena kale.” Ke mêmè ne: “Ndongolwele mukolo umwe wa yôyi ayi.”

²³² Nenku paayiye bwa kuyimpa, iwva mushinga anu wa bicyele makumi asatu cyanaana, bicyele makumi abidi anyi bicyele makumi asatu, mwinshi mwa cyabibidi cimwe cya mushinga. Ee, mêmè ne: “Mpeeshe mikolo ibidi yaa yôyi ayi.” Nwamonu anyi?

²³³ Ke mêmè kwalukila kumbelu, ke mêmè ne: “Udi mumanye, munanga wanyi, nwênù bakaji nutu nutambakana bwa kukeba bya disumba nwenda cimenga cijima.” Nudi bamanye munutu banange kupeta tusingila amu. Ke mêmè ne: “Kadi monaaku, tangila kuneeku, ndi muyisumbe mikolo ibidi ku mushinga ûvwâ wêwê musumbe mukolo umwepele awu. Wamonu anyi?” Mêmè ne: “Aci’s ke dimanya didi anu dyanyi mêmè.” Nwamonu’s, mêmè ne—mêmè ne: “Udi mumanye’s, Thelma ngudi munsumbishe eyi ewu.” Mêmè ne: “Mbifwanyine kwikala ne mmungitabile bwa nyipete ku cyabibidi cimwe cya mushinga wayi.”

Yêyè ne: “Yûdi mupete nyaa swâ anyi?”

²³⁴ Mêmè ne: “Eyowa’s, inăbànzà.” Ivwa yumvwika ku maci anu mushindu wa mwomumwe bwanyi mêmè, ncivwa mumanye ne kuvwa dishiilangana nansha dikese to.

²³⁵ Ke kungambilaye, wamba ne: “Billy.” Mêmè kwela meeji ne civwa cintu cya cikemesha paakafikaye ku Fort Wayne, kukengelabi bwa yêyè kusumba mukolo mukwabo wa nshesheete ayi. Yêyè ne: “Ndi mukayipe mamwêbè,” yêyè ne, “ayi nyaa bakaji bakole.” Yêyè ne: “Umfwile luse bwa cîmvwâ mwenze aci.”

Ke mêmè ne: “Kaa, abi’s bidi anu bîmpè, munanga wanyi.”

²³⁶ Ke yêyè ne: “Mpindyewu, kushaadi—kushaadi kuyi mukaji to.” Ke yêyè ne. . . Kavwa mumanye ne ncinyi civwa pabwîpî ne kwenzeka mu ndambu wa mēbâ kuumukila apu to. Ke mêmè kushaala mukwate twanza twende twa dinanga atu

pavwa Banjelo baa Nzambi munkaci mwa kumwangata bwa kuya nende.

237 Mêmè kwalukila kumbelu. Mêmè kupanga cya dyenza. Mêmè kudyolola panshi bufuku abu mwaba awu kadi mêmè kuumvwa. . . Ngela meeji civwa nkosa mukese, mwikale mu mafuwa a kale mutuvwa bateeke mabeji kampanda mwômò amu. Ke mêmè kwinjila ciibi ne dikàsà, ke kimono wende wawa mukudika paanyima, (yèyè pende mumana kulaadika mu nzubu wa bitalu mwamwa). Ke mu katanci kakese emu muntu krombiikilaye, wamba ne: “Billy!” Uvwa m’Mwaneetu Frank Broy. Yèyè ne: “Mwaneebe wa mu diboko ukaadi ùpùnga ne lufu.”

Mêmè ne: “Mwanaanyi mêmè?”

238 Yèyè ne: “Eyo, Sharon Rose.” Yèyè ne: “Ngangabuka ukaadiku mpindyewu, yèyè ke wambi ne: ‘Udi ne méningite mafume ku disaama dya cyâdi, mmudyâmwine mu dibeele dya mamwëndè.’” Ke yèyè ne: “Ukaadi ùpùnga ne lufu.”

239 Mêmè kubwela mu mashinyi, kukuya. Ke yèyè awu, kânà kaanyi kananga. Ke kuyabo nende lukasalukasa ku lupitaadi.

240 Mêmè kupatuka kuya bwa kamumona. Sam kulwa kùndi ne: “Billy, kubwediku mu cibambalu amu to, bikengela wèlèku meeji bwa Billy Paul.” Yèyè ne: “Awu ukaadi ùpùnga ne lufu.”

Mêmè ne: “Ngangabuka, bi—bikengela mmone mwanaanyi.”

241 Yèyè ne: “To, kwèna mwa kubwela to.” Yèyè ne: “Mmupete méningite, Billy, nkwepì kuwalwa kuàtampakajila Billy Paul.”

242 Ke mêmè kwindila too ne paakatukaye. Ncivwa mwa kutwala bwa kumumona ufwà to, ne mamwëndè mulaadika mwamwa mu nzubu wa bitalu. Nyawu nzwambila, njila wa mushipi wa mikenji udi bwalu bukole. Ke mêmè—mêmè kubwela, kubwela ku ciibi bu udi wibila, nenku paakatuka Sam ne paakatuka munganga mukaji awu, ke mêmè kupweka mu nzubu wa mwinshi mwa buloba. Nkaalupitaadi kakese menemene. Uvwa usanganyibwa mu mwaba wa nkaayende, nenku njiji ivwa mu twisù twende tukese atu. Nenku bavwa ne cinnani cikese. . . citudi tubiikila ne “mushetekele” eci, anyi kantu bu kaabukondo pamutu paa mèsù ende apu. Nenku yèyè uvwa mwa. . . ne didikoka ndambu dya misunya, mukolo wende ùvwà mudyunde awu uvwa unyunga ubanda upweka mushindu awu, ne twanza twende tukese atu, ne didikoka dya misunya adi. Nenku ke mêmè kumutangila, kadi uvwa anu mu cipimu cikumbane bwa kwikalaye ukoka ntema, bwalu uvwa ne ngondo mitwe ku mwandamukulu.

243 Ne mamwëndè uvwa ne ciibidilu cya kumuteeka pambelu paapa muvwale kaacikamà kende kakese kaa nsongo isatu, nudi bamanye, mu bulà amu, pâmvwà mfika kumbelu. Nenku mvwa

ngela mpungi, ne yêyè uvwa wenza ne, “guu-guu, guu-guu,” ungolwela byanza, nudi bamanye.

244 Kadi ke munanga wanyi nyêyè awu mulaadika paapa, ùpùnga ne lufu. Mémè kupwekesha mèsù kumutangila, ke mémè kwamba ne: “Sharry, udi mumanye Papa? Udi mumanye Papa anyi, Sharry?” Nenku paaluye kutangila. . . Uvwa usaama bikole bikole mu mushindu wa ne kamwe kaa ku twisù tukese tulenga twa bleu atu kakaavwa kaye luseke. Cyakaswa kumpanda mwoyi wa munda.

245 Mémè kutwa binù, kwamba ne: “Mukalenge, cîndi mwenze ncinyi? Ncyêna muyiishe Evenjeeliyo mu masangu a mîsèsù anyi? Ndi mwenze cyònsò cîmvwà mumanye mwa kwenza aci. Kumbalulwidi mémè bwalu abu to. Mémè ewu nçitu mubiikileku bantu abu ne ‘nciinà cya bucyafu’ to. Yêyè awu nguvwa mubabiikile ne ‘nciinà cya bucyafu.’” Mémè ne: “Umfwileku luse mudi miine maalu ônsò awu menzeke. Umfwile luse. Kwangaci—kwangaci mwanaanyi to.” Nenku pâmvwà nsambila apu, kwenzabi anu bu. . . drap anyi cilàmbà cifiike cyakapweka. Mémè kumanya ne Wakambengela.

246 Mpindyewu, ke cikondo cya mwoyi wanyi cya citambe kunkolela ne cya bandiile citungu civwa ncyôci aci. Pângààkabàndulukà bwa mémè kumutangila, ke mémè kudyambidilà. . . Sataana kunteeka mu meeji ne: “Ee, muwâmbi mwine ne mushindu ûdì muyiishe ne bukole ewu, ne mushindu ûdì mwende mu nsòmbelu webe ewu, mpindyewu pakaadibi bitangila webe mwânà mulela, Yêyè ajuuke akubengele?”

247 Ke mémè ne: “Aci nçya bushuwa. PiikalaYe kayi mwa kusungila mwanaanyi, nanku ncyêna. . .” Mémè kwimanyina apu. Ncivwa—ncivwa anu mumanye cya dyanza to. Ke pashiishe mémè kwamba nenku ewu, mémè ne: “Mukalenge, Wêwè ngwâkamumpà ne Wêwè ngwâmwangàci ewu, Dîna dya Mukalenge ditumbe! Nansha Wêwè mungangate mémè mwine, nêntungunukè anu ne kuKunanga.”

248 Ke mémè kuteeka cyanza cyanyi pambidi pende, mémè ne: “Beneshiibwa, munanga wanyi. Papa uvwa ne dijinga dya kukukolesha, ne mwoyi wanyi wònsò mvwa ne dijinga dya kukukolesha, ne kukukolesha bwa wêwè kunanga Mukalenge. Kadi Banjelo nyawu bakaadi balwa bwa kukwangata, munanga wanyi. Papa neangate kaamubidi keebe kakese aka e kuya kakateeka mu maboko a Maman. Nênkujikè pamwe nende. Dîngà dituku Papa neatuutakeene neenu, wêwè ndaaku ukindle anu kwòkò aku ne Maman.”

249 Pacivwa mamwëndè ùpùnga ne lufu, wakamba, mêyì ende a ndekeelu akambaye’s, wakamba ne: “Bill, ushaale mu budimi bwa bwambi.”

250 Mémè ne: “Nên-. . .” Yêyè ne. . . Mémè ne: “Mémè mwikale mu budimi bwa bwambi piikalaYe mwa kulwa, nêngangate

bâna bwa twêtù kutuutakeena. Kabiya nanku to, nebanjiike ku luseke lwebwe. Nenku wâya ku luseke lwa dyabalume lwa ciibi cinene aku, nenku pawamona bônso babwela, imana anu mwaba awu ubange anu kwela mbila mikole ne: ‘Bill! Bill! Bill!’ ne dîyi dikole menemene. Nêmpetanganè neebe mwaba awu.” Mêmè kumutwa mishiku ya dilayangana nende. Ndi mu cyalu cya mvita leelu ewu. Kukaadi bidimu bitwe ku makumi abidi. Ndi mupunge dîyi dya kupetangana ne mukajaanyi, nêmpetanganè nende.

²⁵¹ Ke mêmè kwangata mubidi wa mwanaanyi mukese awu, paakafwaye, kuwuteeka mu maboko a mamwëndè, ke twêtù kubambula bônso kuya naabo ku nkita. Ke mêmè kwimana mwaba awu nteeleja Mwaneetu Smith, muyiishi wa ba-Méthodistes wâkayiisha ku citalu awu ne: “Butu ku butu, lupwishi ku lupwishi.” (Ke mêmè kudyambidila ne: “Mwoyi ku mwoyi.”) Ke yêyè uyaaya wawa.

²⁵² Kakwanji kupita matuku àbûngì paanyima paa cyôci aci to, mêmè kwangata Billy mutekete awu kuya nende kuntwaku mu dinda kampanda. Uciwva anu mwânà mukese menemene. Uvwa . . .

²⁵³ Ke cidi cyenza ne yêyè utu anu mundamate ne mêmè mumulamate, byakakengela ne ngikale bônso babidi Papa ne Maman (bônso babidi) kudiye. Mwawa mwa kwangata kaacindundu kende kakese kaa mabeele. Katuvwa mwa kupeta mushindu wa kuteemesha mudilu bufuku bwa kubabaja mabeele awu to, nenku mvwa mwa kukateeka paanyima paanyi mushindu ewu bwa mabeele akwate luuya lwa mubidi wanyi.

²⁵⁴ Tutu bashaale balamatangane bu balunda, nenku dimwe dya ku matuku abidi adi panshi aa pângikalà mwa kuumuka mu budimi bwa bwambi ndi muswe kumupa Dîyi mu byanza, ngamba ne: “Tungunuka, Billy. Shaala wêwè naaDi.” Bantu bâàbûngì batu badikonka bwa cinyi ntu nende dîbà dyônso. Ncyêna mwa kumulekelaku to. Nyewu ukaadi muselangane ne kuselangana, kadi ntu anu mvuluka ne yêyè wakangambila ne: “Ushaale nende.” Nenku tutu balamatangane anu bu balunda.

²⁵⁵ Ndi mvuluka patuvwa baye kendakana mu cimenga, mwele kaacindundu kaa mabeele aku mu dyâpà, ke kubangaye kudila mwadi. Bufuku kampanda yêyè mwikale . . . tuvwa biikale twendakana pambelu mu bulà bwa kumfundu mvwa anu . . . (Pakaavwaye pabwîpi ne kumulela, uvwa upata mweyelu, nenku mêmè . . . mucikàle anu nsongakaji, nudi bamanye.) Nenku mêmè ngenda ntwà kumpala ntwà paanyima lwa ku mucu wa cilombalomba uvwa mu bulà bwa kumfundu awu. Nenku yêyè munkaci mwa kudila ukeba Maman wende, paanyi nciyi ne Maman kûmvwà mwa kuya nende to. Nenku mvwa mwa kumwambula, ngamba ne: “Kaa, munanga wanyi.” Mêmè ne . . .

256 Yèyè ne: “Papa, mamam wèpì? Udi mumwele mu buloba mwamwa anyi?”

Mêmè ne: “To, munanga wanyi. Udi bîmpè, udi mu Dyulu.”

257 Ke kwambaye cintu kampanda mwaba awu, cyakamba kunshipa, mu mapingaja kampanda. Uvwa munkaci mwa kudila mwadi, dîbà dikaavwa diye bikole ku ma diloolo aku, mêmè mumwambule paanyima nunku *ewu*, mumwambule pa dikaaya mmutuuta cyanza nunku *ewu*. Ke yèyè ne: “Papa, bu wèwè mwa kuswa nda kangata Maman ulwe nende mwaba *ewu*.”

Ke mêmè ne: “Munanga wanyi, ncyèna mwa kuya kangata Maman to. Yesu . . .”

Yèyè ne: “Ee, ambila Yesu antumine maman wanyi. Ndi nende dijinga.”

258 Ke mêmè ne: “Ee, munanga wanyi, ndi . . . mêmè ne wèwè ke baaya kamumona musangu kampanda.”

Ke kwimanaye, kwambaye ne: “Papa!”

Ke mêmè ne: “Yè?”

Yèyè ne: “Ngămònu Maman muulu mwamwa pa divuba dyadya.”

259 Ekelekele, aci ke kwambaci kunshipa! Mêmè kudyambidila ne: “Ekelekele! ‘Ngămònu Maman muulu mwamwa pa divuba dyadya.’” Mêmè kwamba kufwa cipuuka. Mêmè kuupukila kânà kakese aku mu cyâdî cyanyi nunku *ewu*, ke kushaala anu kacya ngînamija mutu, mêmè kubwela mu nzubu.

260 Matuku kupitawu. Ncivwa mwa kucipwa mwoyi to. Mvwa nteeta kukwata mudimu. Ncivwa mwa kwalukila kumbelu to, kacivwa mene lubanza to. Nenku mvwa njinga kushaala musòmbe. Katucivwa mene ne cintu to anu miine nkwasikaavwa misunsuke ayi, kadi civwa ncintu cituvwa mêmè ne yèyè bashaaleku naaci bônso pamwe mu disanka. Civwa anu ndubanza mene’s.

261 Nenku ndi mvuluka dîngà dituku pâmvwà ngenza mudimu mu midimu ya mbulamatadi. Mvwa mubande kuulu bwa kulongolola nshinga wa nzembu kampanda wa mulondele, uvwa mulebelele, tucivwa anu dinda bwebwebwe. Ke mêmè kubanda ku nkuruse *ewu*. (Nenku ncivwa mwa kulekelaku mwanaanyi awu to. Mvwa mwa kumona mukajaanyi uya, kadi bwa mwanaanyi wa mu diboko awu uya, mwikale anu kaamuntu kakese.) Nenku mvwa kuulu aku, mwikale ngimba ne: “Pa mukuna wawa, pavwa Nkuruse wa kale wa mabaya kâyi makoona.” Nshinga ya minene ya nzembu ivwa ipweka too ne ku cishintulwidi cya nzembu kadi kupatuka kuya kayibweja (munudi bamanye amu) mu ya milondele. Nenku mêmè mvwa mukulame kuulu aku pa cyôci aci. Nenku kwenzabi ne ntangile, dîbà dibanga kupatuka paanyima paanyi. Nenku mwaba awu, byanza byanyi byolola ne cimanyinu aci cya Nkuruse awu ku—

ku luseke lwa mukuna. Mêmè kudyambidila ne: “Eyo, mpekaatu yanyi ke yakaMufikishapu.”

²⁶² Mêmè ne: “Sharon, munanga wanyi, Papa wajingi kukumona bibi be, munanga wanyi. Mushindu mwine ùndi mujinge kukwambula cyakabidi mu maboko aanyi emu, wêwè mwanaanyi mukese munanga.” Mêmè kubanga kujimija lungenyi. Kukaavwa kupite mbingu. Mêmè kuvuula gant wanyi wa cindundu awu. Kuvwa nzembu ya volts binunu bibidi ne nkama isatu ipicila anu ku luseke lwanyi menemene aku. Mêmè kuvuula gant wanyi wa cindundu awu. Mêmè kwamba ne: “Nzambi, ntu mukine kwenza nunku. Ndi muntu mutulumuke.” “Kadi, Sharry, Papa neanumone wêwè ne Maman mu tusunsa tukese menemene emu.” Mbanga kuvuula gant wanyi awu, bwa kukwata ne cyanza ku nzembu ayi ya volts binunu bibidi ne nkama isatu. Ivwa mwa kwenza dikubakuba. . . Mona’s, kwèna mufwanyine kushaala nansha ne kandambu kaa mashi mu wêwè to. Ke mwaba awu mêmè—mêmè—mêmè kubanga kuvuula gant awu, ke cintu kampanda kwenzekaci. Pângàakapinganà mu mêmè, nkaavwa musòmbè panshi mu buloba ne byanza bibandisha nunku *ewu*, biteeka kwîsù, ndila mwadi. Civwa nngàsà wa Nzambi, cyanaana ncivwa mwa kwikala ngenza disangisha dya dyondopa diloolo edi mwaba ewu to, ndi mutwishiibwe bwa aci nanku. Uvwa n’Yèyè ukuba dipà Dyende, kî mmêmè to.

²⁶³ Mêmè kwalukila kumbelu. Mêmè kulekela bya midimu abi, kuteeka byamu bya mudimu ku luseke. Ke mêmè kwalukila, kwamba ne: “Ngaapinganyi kwanyi.”

²⁶⁴ Mêmè kuya ku luseke lwa nzubu, mêmè kwangata mikanda mitufundila mu nzubu, kuvwa ndambu wa mashika, ke mêmè kubwelela mu nzubu. Tuvwa ne kaacibambalu kamwepele, ne mêmè mwva ndaalumu pa kalaalu kakese kaa kamponyi, nenku mashika a makole abanda, ne difuwa dikulakaji adi. Mêmè kwangata mikanda mitufundila ayi e kubanga kutangila mu mikanda amu, nenku kaacintu kakese kaa kumpala muntwamu kavwa ntufranga twende tukese tuvwaye mulame bwa Noël, tuubicyele makumi mwandamukulu ne: “Mademoiselle Sharon Rose Branham.” Ke bwalu abu, byònsò bingalukidila cyakabidi.

²⁶⁵ Nkaavwaku mukubi wa nyama ya mwitu. Mêmè kwolola cyanza muntwamu e kwangata cingoma cyanyi, kaacingoma kaa ku cyanza, kukapatula mu cimanga. Mêmè kwamba ne: “Mukalenge, mêmè—mêmè ncyèna mwa kutwala kabidi ebi bintu to, ndi—ndi mfwa. Byătàmbi ku—kuntacisha be.” Mêmè kukoka mwànà wa kaacingoma aku, kuditeekaku ku mutu, mutwe binù mwaba awu ku kalaalu aku mu kaacibambalu mùvwà mîdimà amu. Mêmè ne: “Taatu wetu udi mu Dyulu, Dîna Dyebe ditumbe. Bukalenge Bwebe bulwe, diswa Dyebe dyenzeke,” nenku pândi nteeta, mêmè kukoka bikole ndènde awu ne mwanyi mwònsò, ngamba ne, “pa buloba bu

mudidi dyenzeka mu Dyulu. Utupe leelu dyâmpà dyetu dya bwacyabwacya.” Kadi kakayi anu kateema to!

266 Ke mêmè kudyambidila ne: “Eyi Nzambi, s’ke Wêwè kunshipa anu menemene eku? Cîndî mwenze ncinyi? Kuyi nanshà undekela mfwa to.” Ke mêmè kwimansha kaacingoma aku panshi, ke kuteemaku ne dizaji kwasa mwa cibambalu amu. Mêmè ne: “Nzambi, mbwa cinyi ncyêna mwa kufwa bwa mêmè kumba kupatuka mu biine ebi? Ncyêna anu mwa kutungunuka to. Bikengela ungenzele cintu kampanda.” Mêmè kudyela panshi kadi kwasa mwadi, pa kalaalu kaanyi kakese kaa kale aku mwaba awu.

267 Nenku mvwa ne cya kwikala anu mulaale tulu. Ncyêna mumanye ne mvwa mulaale anyi cyakenzeka ncinyi to.

268 Mêmè ntu anu mujingejinge kupatuka kuya ku Wesete. Ntu anu mujingejinge cimwe cya ku bifulu abi. Taatu uvwa wibidija tubalu mu bikondo bya ku bunsonga bwende, nenku mêmè mvwa anu njingajinga cimwe cya ku bifulu abi. Nenku Mwaneetu Demos Shakarian mmucinsumbile makeelela awu, ke cya kumpala cîndî mupete (kacya) mushindu awu, cimwe cya ku bifulu bya bantu baa kudi dibà dibwelela.

269 Ke mêmè kwenza bu ne mvwa nya ngenda mpicila mu mpata, ngenda ngimba musambu awu wa ne: “Kudi lukata lucibuke ku ditempu, cimanyinu mu ferme ne: ‘Cya Kusumbisha.’” Pâmvwà ngenda nya apu, mêmè kumona ditempu dya kale dibwikila, cyenze bu ditempu dya kale dinene dibwikila ntenta, kadi lukata luvwa lucibuke. Mu bushuwa bwa bwalu, aci ciwva cileeja famiye wanyi uvwa mupanduluke. Kadi pângàakaseemenà pabwîpî, ntangila, pavwa piimane nso—nsongakaji, mwîmpè be, wa bidimu bitwe ku makumi abidi, ne nsuki mitooke miikale ipeepa ne mèsù a bleu, muvwale bilàmbà bitooke. Mêmè kumujooja bîmpè, kwamba ne: “Wetwawu?” E kutungunuka ne lwendu.

Yêyè ne: “Wetwawu, Papa.”

270 Ke mêmè kukudimuka, kwamba ne: “Papa?” “Mona’s,” mûngàkambà, “mmunyi, wêwè Nsongakaji ewu, mùdî wêwè ewu. . . mùndî mêmè ewu mwa kwikala papa webe paudi wêwè bukole bumwe naanyi?”

271 Yêyè ne: “Papa, cyûdî mbwalu kwêna mumanye mwaba ûdî usanganyiibwa to.”

Ke mêmè ne: “Udi uswa kwamba cinyi?”

272 Yêyè ne: “Apa mmu Dyulu.” Yêyè ne: “Pa buloba, mêmè ke uvwa Sharon webe mutekete awu.”

“Mona’s,” ke mêmè awu, “munanga wanyi, s’uvwa anu kânà kakese kaa mu diboko.”

273 Yèyè ne: “Papa, twânà tukese twa mu maboko katwena twânà tukese twa mu maboko muneemu to, bakaadi kabaciyi mwa kufwa to. Kabeenaku mwa kukulakaja anyi kukola to.”

274 Ke mêmè ne: “Ee, Sharon, munanga wanyi, wêwè—wêwè’s udi nsongakaji mulenga be.”

Yèyè ne: “Maman’s mmukwindile.”

Mêmè ne: “Kwěpì?”

Yèyè ne: “Ku nzubu wenu mupyamupya kwaka.”

275 Ke mêmè ne: “Nzubu mupyamupya?” Ba-Branhams batu balalakanyi, kabatu ne nzubu to, batu anu. . . Ke mêmè ne: “Ee, mêmè nciwu mwanji kupetaku nzubu to, munanga wanyi.”

276 Yèyè ne: “Kadi nudi ne nzubu muneemu emu, Papa.” Ncyêna nswa kwikala mwânà wa mu diboko to, kadi bwalu ebu mbwa bushuwa anu menemene bwanyi mêmè. [Mwaneetu Branham udi wasa mwadi—Muf.] Pântù anu mbanga kubyelela meeji, byònsò abi bitu anu bimpinganyina cyakabidi. Yèyè ne: “Nudi ne nzubu muneemu emu, Papa.” Ndi mumanye ne ndimu ne nzubu, dituku dikwabo nênyemù. Yèyè ne: “Billy Paul udi penyì, mwaneetu wa balume awu?”

277 Ke mêmè ne: “Ee, ndi mumushiye kwa Mandamu Broy, anu mu tusunsa tukese emu.”

Yèyè ne: “Maman mmuswe kukumona.”

278 Ke mêmè kukudimuka e kutangila, kuvwa nzubu ya bukalenge minene menemene, ne Butumbi bwa Nzambi bwikale bubanda buyinyungulukila. Ke mêmè kuumvwa kasumbu kaa Banjelo bimbi baa misambu bimba ne: “Nzubu wanyi, Nzubu mwîmpè be.” Mêmè kubândakù ngenda ngela bidya bile, nyeema ne mwanyi mwònsò. Neku mfika ku ciibi, ke yèyè udi mwimane wawa, muvwale cilàmbà citooke, ne nsuki mifiike ayi, mile, mimupwekele too ne paanyima. Kujuulaye maboko, muvwaye wenzenza pâmvwà ngalukila kumbelu mfuma ku mudimu ne dicyoka anyi cintu kampana. Mêmè kumukwata ku byanza, ke mêmè kwamba ne: “Munanga wanyi, ngàmònu Sharon lwa kuntu kwaka.” Mêmè ne: “Ukaadi nsongakaji mulenga be, kî mmwòmò anyi?”

279 Yèyè ne: “Eyo, Bill.” Yèyè ne: “Bill.” Kunjingilaye maboko, (ke yèyè kwamba) muànjingile anu ku makaaya eku, kubangaye untuuta cyanza, wamba ne: “Ulekele kwikala uditacisha bwanyi mêmè ne Sharon.”

Mêmè ne: “Munanga wanyi, ncyêna mwa kupanga kuditacisha to.”

280 Yèyè ne: “Patudi twakulangana apa’s mêmè ne Sharon tudi bîmpè kukupita wêwè.” Ke yèyè ne: “Kuditacishiku kabidi bwetu twètù to. Udi mwa kundayaku nanku anyi?”

281 Ke mêmè ne: “Hope,” mûngàakambà, “ndi mushaale nkaayaanyi bwa bwalu bwebe wêwè ewu ne Sharon, ne Billy udi anu mu myadi dîbà dyônsò edi bwebe wêwè.” Mêmè ne: “Ndi mupange cya kwenza nende.”

282 Ke yêyè ne: “Nebikumbane’s, Bill.” Yêyè ne: “Undaye wêwè anu ne kwakwikala uditacisha kabidi to.” Ke yêyè ne: “Kwêna mwa kusòmbela panshi?” Dya nkenzakana mwaba awu pavwa nkwaswa munene menemene.

283 Nenku ndi mvuluka ne ngâkateeta bwa kusumba nkwaswa kampana. Mpindyewu, nkaadi njikija. Ngâkateeta bwa kusumba nkwaswa musangu kampana. Tuvwa anu ne nkwaswa ya ciibidilu ya kale—ya kale ya cisòmbelu cya mabaya itu ya nzubu wa cidiilu ayi. Ke ivwa ikengela twètù kwikala kusòmba, ke yònsò ituvwa peetu naayi. Nenku twâkapeta mushindu wa kusumba umwe wa ku nkwaswa eyi itubo bateeka paanyima lwa mundekeelu, mu. . . Nyewu ngâpù mwoyi mushindu wa nkwaswa fòtèyè awu. Nenku yêyè awu uvwa ne mushinga wa ndola dikumi ne mwandamutekete, nenku muvwa mushindu wa kufuta ndola isatu pa cibanza kadi kwikala kufuta ndola umwe ku lumingu. Nenku twètù kumupeta. Nenku, kaa, pângàakaalukilà kumbelu. . . Mvwa mwa kwikala ngenza mudimu dituku dijima, ne nyiisha too ne mundankulu mu misèèsù ne myaba yònsò ìmvwà mwa kuyiisha ayi.

284 Nenku—nenku ke mêmè dîngà dituku kushaadila mu difuta dyanyi. Twètù kupanga mushindu wa kukumbaja bwalu, ne byakenzeka nanku ku dituku ku dituku, nenku ndekeelu wa byònsò ke kulwa kwangatabo nkwaswa wanyi awu e kuyabo nende. Diloolo adi, ncyadyakupwaku mwoyi nansha, uvwa mungooshile dyâmpà dyela minyinyi dikalanga ne cherry. Mukwacikwetu, uvwa—uvwa—uvwa mumanye ne nebintekeshe mu maboko. Nenku paanyima paa didya dya diloolo mêmè kwamba ne: “Mûdi musangale nunku mmunyi, munanga wanyi?”

285 Ke yêyè ne: “Twămbè ne, mvwa mulombe twânà twa balume twa beena mutumba bwa kukuumbwilatu misanda ya wêwè kuloba naayi. Kwêna wela meeji ne bivwa bikengela twètù kupweka ku musulu bwa kulobaku ndambu wa dîbà?”

Ke mêmè ne: “Eyo, kadi. . .”

286 Ke kwasaye mwadi. Mêmè kumanya ne kuvwa cintu kampana civwa kacyi cyenda bîmpè to. Mêmè kupeta cingenyingenyi bwalu bakaavwaku bamane kuntumina mukanda bwa ne nebalwe kwangata nkwaswa awu. Peetu katuyi mushindu wa kukumbaja difuta adi dya ndola umwe ku lumingu to. Katuvwa ne mushindu to, katuvwa. . . katuvwa ne mushindu wa kukumbaja to. Yêyè kunjingila maboko, nenku mêmè kuya lwa ku ciibi kumona ne nkwaswa wanyi awu uvwa muye.

Kungambilaye mu Dyulu amu, wamba ne: “Udi muvuluke nkwasu awu, Bill?”

Ke mêmè ne: “Eyo, munanga wanyi, ndi muvuluke.”

Yèyè ne: “Ke kùvwà wela meeji, kî mmwômò anyi?”

“Eyo.”

²⁸⁷ Yèyè ne: “Ee, kabaakwangata ewu nunku to, ewu nunku mmufucila mushinga.” Yèyè ne: “Anji sombelabi panshi ndambu, ndi njinga kuyiikilangana neebe.”

Ke mêmè ne: “Munanga wanyi, eci ncyèna ncyumvwa to.”

²⁸⁸ Ke yèyè ne: “Ndaya, Billy, ndayaku ne kwakwikala kabidi uditacisha to. Ukaadi walukila mpindyewu.” Ke yèyè ne: “Ndayaku ne kwakwikala uditacisha to.”

Ke mêmè ne: “Ncyèna mwa kwenza aci to, Hope.”

²⁸⁹ Anu piine apu ke mêmè kwalukila mu mêmè, mu cibambalu muvwa mîdimà. Mêmè kukenzakana, ke mêmè kuumvwa diboko dyende dingela kunshingu. Mêmè ne: “Hope, udi apa mu cibambalu emu anyi?”

²⁹⁰ Kubangaye untuuta cyanza. Yèyè ne: “Neungenzeleku mulayi awu anyi’s, Bill? Ndayaku ne kwakusela . . . kwakwikala uditacisha kabidi to.”

Mêmè ne: “Ndi nkulaya.”

²⁹¹ Nunku mwaba awu ke kuntuutaye cyanza misangu ibidi anyi isatu, umbu uya. Mêmè kujúuka kuulu lubilu kumba kuteemesha ne bukênkè, kutangila myaba yônso, ukaavwa muye. Kadi muvwaye mupatuke muvwa anu mu cibambalu amu. Kî mmuye to, uci anu ne mwoyi. Uvwa mwena Kilisto.

²⁹² Billy ne mêmè tuvwa baye ku nkita mwaba ewu kukaadi cikondo ndambu, bambule kaacilôngò kakese bwa mamwèndè ne mwanaabo wa bakaji, anu mu dinda dya Paasaka amu, ke twètù kwimana. Kalumyana kubanga kudila, kamba ne: “Papa, maman wanyi’s udi mwinshi mwamwa’s.”

²⁹³ Mêmè ne: “To, munanga wanyi. To, kèna mwinshi mwamwa to. Mwaneenu wa bakaji kèna mwinshi mwamwa to. Bwa mwaba ewu tudi ne lukita lukanga, kadi luseke lukwabo lwa mbú lwalwa kudi lukita bwashi muvwa Yesu mubiike. Nunku dîngà dituku Yèyè nealwe, Yèyè nealwe ne Mwaneenu wa bakaji ne Maman pamwe Nende.”

²⁹⁴ Ndi mu cyalu cya mvita leelu ewu, balunda baanyi. Kamwena mushindu wa mêmè—mêmè kubilonda kabidi to. Ndi . . . [Mwaneetu Branham udi wasa mwadi—Muf.] Nzambi anubeneshe. Twinyikaayi mitu yetu bwa katanci.

²⁹⁵ Eyi Mukalenge! Misangu yàbûngì, Mukalenge, cya bushuwa ndi mutwishiibwe ne bantu kabatu bumvwa to, patubo beela meeji ne bintu ebi bitu bidivwila anu bipeepele. Kadi kudi dituku dinene dyalwa Yesu ne diikala tunyinyanganya twônso

etu ne cya kukupudiibwa. Ndi ndomba, Taatu wa mu Dyulu, bwa Wêwê kutukwacisha bwa twêtù kwikala badilongolole.

²⁹⁶ Nenku mulayi wa ndekeelu awu, pângàakamutwà mishiku ku ditama mu dinda adi, bwa ne nêntuutakeenè nende mu dituku adi. Ndi ngitabuuja ne yêyê neikale mwimanyine lwa ku dikunji adi, wela mbila mikole umbiikila mu dînà. Ntu mushaale ne lulamatu ku mulayi awu, Mukalenge, pa buloba bujima, mu myaba ya mishindu yônsò, nditacisha bwa kutwala Evanjeeliyo. Nkaadi nkulakaja mpindyewu, ngenda ncyoka, nkaadi muzengele. Abidi adi panshi aa nêmbwikilè Bible ewu bwa musangu wa ndekeelu. Nenku, Nzambi, ndama mu lulamatu ku mulayi awu. Lama ngàsà Webe munyungulukile, Mukalenge. Kundekedi ntangila ku bintu bya panu ebi to, kadi ngikale ne mwoyi bwa bintu bidi dyamwamwa. Nkwacisheku bwa mêmè kwikala ne meeji matooke. Ncyêna ndomba bulaalu bwadija bilôngò bya maalu mapepele nansha, to, Mukalenge, padibi ne Kilisto wanyi wakafwa kwaka mwikale ukenga. Ne bakwabo baabo baakafwa anu mushindu awu. Ncyêna ndomba cintu cipeepele nansha cimwe to. Ndekela anu ngikale ne meeji matooke, Mukalenge, mwambi wa bulelela. Enza bwa bantu bannange bwa mmone mwa kubalombola kûdi Wêwê. Nenku dîngà dituku paajika byônsò ne patwadisangisha mwinshi mwa mici idi ne mabeji anu mabishi, ndi muswe bwa kumukwata ku cyanza kadi kubanda nende, bwa kuleeja beena mu Angelus Temple ne bakwabo bônsò. Neciikale cikondo cya butumbi mwine musangu awu.

²⁹⁷ Ndi ndomba bwa luse Lwebe lwikale kudi muntu ne muntu wa kutudi mwaba ewu. Nenku aba badi mwaba ewu aba, Mukalenge, badi mwa kwikala kabayi nansha baKumanye to. Kadi pâmwăpa badi mwa kwikala ne munanga wabo mukese dyamwamwa dya mbû. Piikalabo kabayiku banji kukumbaja mulayi wabo to, enza bwa bawukumbaje mpindyewu, Mukalenge.

²⁹⁸ Patudi ne mitu yetu miinyika apa, ndi ndikonka ne mu dibalaasa dinenaanaale edi mu mapîngaja emu, mbanganyi baa kunudi badi mwa kwamba ne: “Mwaneetu Branham, ndi muswe ngâpetangana ne bananga baanyi, mêmè paanyi. Ndi—ndi—ndi ne bananga baanyi dyamwamwa dya musulu”? Pâmwăpa wâkenza mulayi wa ne neupetangane naabo, pâmwăpa mpawakambila Maman ne “wâya bilenga” ku lukita kwaka dituku adi, pâmwăpa mpawakambila Mwakunyebe wa bakaji ne “wâya bilenga,” anyi Papa, anyi umwe wabo ku lukita, mwikale umulaya ne neupetangane nende, kadi kuyi—kuyi mwanji kwikala mwenze didilongolola to. Kwêna welaku meeji ne ke cikondo cîmpè ncyôci eci mpindyewu cya kucyenza anyi?

²⁹⁹ Numfwileku luse bwa cintekanteka cyanyi. Kadi, kaa, ekelekelee, kwêna ufika ku dyumvwa to, mulunda wanyi.

Kwêna uumvwa ne ndidifila kaayi—kaayi to! Aci kaciyena nansha kasunsukila to, nansha kakese, kaa bwalu bulonda bwa nsombelu.

³⁰⁰ Mbanganyi baa kunudi aku badi bafwanyine kuswa bwa kujuuka kuulu ne kulwa apa bwa disambila, ne: “Ndi muswe bwa ngâpetangana ne bananga baanyi”? Juuka upatuke mu bateeleji amu upweke kuneeku. Udi muswe kucyenza anyi? Piikala muntu kayi mwanji kwenza didilongolola adi. Nzambi akubeneshe, mukalenge. Ndi mmona muntu wa bafiike mukulumpe mwikale upatuka, bakwabo biikale balwa. Asaayi lwendu, nwênù badi mu bisasa baba, juukaayi anu naka nupatukile mu kajila kakese amu. Anyi juukila kuulu, wêwè udi muswe bwa bakuvuluke mu disambila mpindyewu mene. Ke mudi bwalu nanku. Juuka anu cyanaana wimane kuulu. Mbîmpè. Juukilaayi kuulu, myaba yônsò, nwênù badi baswe kwamba ne: “Ndi ne taatu dyamwamwa, ndi ne maamu anyi ne munanga wanyi dyamwamwa. Ndi muswe kuya kabamona. Ndi muswe ngâpetangana naabu mu ditalala.” Swaku ujuukile kuulu, kwimanyina anu kuulu cyanaana, mwaba wônsò mu bateeleji emu. Juuka wimanyine kuulu, wamba ne: “Ndi muswe kwitaba.”

³⁰¹ Nzambi akubeneshe, inâbânzà. Nzambi akubeneshe lwa paanyima paapa. Ne akubeneshe lwa kuulu kwaka. Nzambi akubeneshe apa, mukalenge. Ncya bushuwa. Mwamwa kuulu mu cisasa, Mukalenge akubeneshe. Eku ne eku, myaba yônsò, juukilaayi nwimanyine kuulu mpindyewu bwa kwambaku mwaku mu disambila, padi Nyuma Mwîmpè apa mwikale unyungakana mu myoyi yetu, bwa—bwa—bwa kucibulula.

³⁰² Nudi bamanye, cidi cikengela ekeleeziya leelu ewu nkucibuludiibwa. Bikengela tupweke tuye ku Nzubu wa Mufumbi wa ngeesu. Mamanya etu a Nzambi mu tulaasa a bashaale buumakane atudi badikwatakajile ku mbanza yetu awu misangu mikwabo kaatu anu enda bîmpè to. Cidi citukengela ndicibuludiibwa, kanyinganyinga mu myoyi yetu, bya mushindu wa cyena kale, tushaala bateketangane kumpala kwa Nzambi. Aba ke bônsò badi badilongolole bwa kujuuka kuulu anyi?


Nanku twinyikaayaaku mitu yetu bwa disambila.

³⁰³ Eyi Mukalenge, Wêwè wâkaabiishaa Yesu bwa...ku bafwe, bwa kutubingisha twêtù bônsò ku diitabuuja, biikale twitabuuja. Nyewu ndomba, Mukalenge, bwa aba badi biimane kuulu mpindyewu aba baKwitabe, ndi ndomba bwa difwidiibwa dya luse diikale kudibo. Kabidi, Eyi Mukalenge, ndi ndomba bwa baKwitabe bu Musungidi ne Mfumu ne Munanga wabo, ne pâmwäpa badi ne maman anyi ne papa anyi ne muntu kampanda dyamwamwa dya mbû. Kudi cintu cimwe cya bushuwa ne, mbapete Musungidi. Enzaku bwa bafwidiibwe luse ku mpekaatu

yabo, ne bubu bwabo bwônsò bukupudiibwe, bwa misuuka yabo yamona mwa kusukudiibwa mu Mashi a Mwânà wa mukooko, ne baamona mwa kusòmba mu ditalala kubangila pa dîbà edi.

³⁰⁴ Nenku dîngà dituku dya butumbi paajika byônsò abi, enzaku bwa twadisangisha ku Nzubu Webe, bwa kwikalaku bu famiye idi kayiyi mipanduluke to, bwa kupetangana ne bananga beetu badi bindile luseke lwa dyamwamwa. Eci, tudi tubalambula kûdi Wêwè, bwa “Wêwè kulama mu ditalala dipwangane ewu mwena mwoyi udi mushaale muMweyemene.” Twënzëlèku nanku, Mukalenge, patudi tuKulambulabo apa. Mu Dînà dya Mwânà Webe, Mukalenge Yesu. Amen.

³⁰⁵ Nzambi anubeneshe. Ndi mutwishiibwe ne beena mudimu mbamone mwaba unudi biimanyine, nenku nebiikale anu neenu mu tusunsa tukese menemene emu.

³⁰⁶ Nenku mpindyewu bwa aba biikala mwa kupeta twarta twa disambila. Billy, Gene ne Leo badi penyi, badi paanyima paapa anyi? Badi mwaba ewu bwa kwabanya twarta twa disambila mu tusunsa tukese cyanaana. Mwaneetu wa balume neikale mwa kutangalaja bateeleji mu disambila, ne twarta twa disambila netwabanyiibwe. Netwalukile apa anu mu katanci kakese emu, bwa kusambidila babeedi. Mbîmpè, mwaneetu. 

BWALU BULONDA BWÀ NSÓMBELU WANYÌ LUA59-0419A
(My Life Story)

Diyiisha edi dya Mwaneetu William Marrion Branham, dyakayiishabo musangu wa kumpala mu Anglais mu dyalumingu mu mapingaja, dya 19 ngondo mwinâyi, 1959, mu Angelus Temple mu Los Angeles, Californie, U.S.A., ndyumusha pa mukaba wa mêyî ne dituuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2016 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org